

**NATIONAL ASSEMBLY OF
SEYCHELLES**

Tuesday 13th May 2025

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour bann Manm Onorab. Bonzour nou bann zofisye ki pe asiste nou. E bonzour nou bann viziter dan Galeri ki en group etidyan e ansennyan sorti Plaisance. En group viziter sorti Plaisance an tou ka. E bonzour osi nou piblik ki pe swiv nou fidelman. Mersi bokou pou zot latansyon. E mersi pou zwenn nou pou sa premye zournen travay dan sa trimes - dezyenm trimes sa lannen.

I en plezir pou vwar zot tou ankor, apre sa lenterval *recess*. E mon espere zot in pas en bon moman. E pare pou rebran travay serye pou sa sesyon. Nou a komans avek enn de kominikasyon. E pou komanse mon a donn Onorab Regina Esparon laparol, pou en mesaz lo Lazournen Ners ki ti selebre yer. Onorab.

HON REGINA ESPARON

Mersi Mr Speaker. Bonzour tou dimoun a lekout. Bonzour tou Manm Onorab. Tou bann lezot a lekout, spesyalman nou bann ners, koleg ki selebre Lazournen Enternasyonal yer. E nou bann viziter dan Galeri.

Mr Speaker, Lazournen Enternasyonal Ners sa lannen in ganny selebre anba tenm, “*Nurses our future economic power of care*”. En tenm, ki met bokou lanfaz lo zot byennet, e zot fitir. Ozordi lemonn, in rekonet kontibisyon valab ki sak ners i fer dan sosyete. E bokou lanfaz in ganny mete lo promouvoir lasante e byennet nou bann ners, pou ki zot osi zot reste an bonn sante.

An menm tan i enportans ki nou kontinyen investir dan zot fitir, e promouvoir zot lentere e lentegrit. E i evidan ki atraver sa profesyon bann ners i ede pou kit nou pep an bonn sante, pou ki an retour zot fer kontibye pozitivman anver nou lekonomi.

Mr Speaker, profesyon ners i en ki nob. E zot reste enn bann pilye enportan dan nou Sistem Lasante, ansanm ek lezot kad travayer ki zwe en gran rol dan promouvoir lasante nou pep. E nou bann ners i bezwen tou nou lankourazman, dan sa

profesyon ki pa en travay fasil, me plito i en vokasyon ki demann bokou pasyans, bokou limour, ek limilite.

E annan konpasyon e senpati pou lezot; pare pou travay bann long erdtan, e perdi sonmey, e menm sakrifye letan personel pou fer sir nou pep i reste an bonn sante. Mr Speaker, sa bann bon kalite, e valer ki en dimoun in bezwen pou vin en ners in'n bezwen ne avek, pou li kapab poursiv dan sa domenn. E en mesaz tre enportan pou nou pep, se ki nou bezwen annan respe pou nou bann ners, e toultan montre sa lapresiasyon, pou zot dedikasyon e servis ki zot pe donn.

Parey en ansyen ners e fanm saz kanadyen Carole Rogers ki ti fer 45an dan sa profesyon, i dir dan en son liv '*Born to be a nurse*' ki i ti ekri apre ki in ti'n pran son retret, mon *quote*, "*It implies a strong desire to care for others, combined with the ability to effectively handle the demands and complexities of the nursing role.*" *Unquote*.

E *quote* ki'n enspir bokou ners dan sa profesyon. Mr Speaker, mon pou dir ki nou vwar ozordi ki bann zenn fiy e garson pe dousman, dousman pran sa

vokasyon pli an plis serye. E la nou fek vwar en *cohort* zenn ki'n *graduate* semen pase e mon pran ankor sa lokazyon pou mwan felisit zot.

An menm tan mon salye e mon rekonnet zot lanbisyon, zot kouraz e mon swet zot bonn sans dan sa profesyon. Koman en ansyen ners ki'n konmans par *training*, anploye e osi ansarz serten klinik lo zil dan mon letan, mon kapab dir ki kantmenm sa travay par ler ou vwar li difisil, me i osi annan bokou satisfaksyon dan bann moman kot ou war nou pep pe ganny sa swen e servis nesaser pou reste an bon sante.

Donn nesans en nouvo ne i touzour anmenn lazwa lo figur sa manman, e en lankourazman pou sa ners, me ler ou bezwen konsol leker, sa en ki'n ferm lizye en son pros, i pa fasil. E ou touzour bezwen annan sa pti parol, pou konsol son leker. Pou nou bann ners ki'n la bokou letan, nou osi mazin zot dan sa moman kot zot lekspertiz, zot lasazes in kapab ede pour soulaz bokou nou bann pasyan la deor.

Reste sa *role model* pour bann nouvo ki pe antre dan sa vokasyon. Pou bann ki'n kit nou ki zot larm i repoz dan lape, e la nou mazin nou defen ser Rosie.

A sa moman mon anvi dir tou ners dan sesel, en gran mersi pou zot dedikasyon anver sa profesyon. Mersi e kontinyen sa bon travay ki zot pe fer. Se zot kouraz, zefor e dedikasyon ki fer nou Sistenn Lasante progrese. Ozordi nou selebre zot e nou dir zot kontinnyen kit sa laflam alimen parey Florence Nightingale. Bon fet tou bann ners. Mon remersi ou Mr speaker.

(APPLAUSE)

MR SPEAKER

Mersi Onorab. Mon devret mansyonnen ki Onorab ti demann mwan laparol koman en ansyen ners. E osi koman en Reprezantan Group Madanm dan Lasanble. Mon siport bann santiman ki nou ser Onorab in eksprimen.

E mon swete ki Lasanble i kontinyen siport travay e devouman bann ners, e tou bann zofisye medikal dan nou pei. Mersi ankor enn fwa Onorab.

Lo mon kote mon ti a kontan pran lokazyon pou dir detrwa mo, pou rekonnet lakonplisman remarkab pou Lorganizasyon Lakoup Mondyal *Beach Soccer* par nou pei.

E sa levennman in deroul dan semenn pase. E bokou nou

e popilasyon Sesel antye in swiv. Mon krwar nou aksepte ki i en levennman istorik dan lefe ki i premye tel levennman pou Lafrik. E osi pou bann Pti Leta Zil parey nou. I sertenman ti en gran defi. Nou a rapel ki detrwa mwan pase nou ti napa ni en Stad *Beach Soccer*. E ni menm en tim *Soccer*.

Donk, lefe ki nou'n fer sa levennman an sa kourt peryod letan in montre en gran defi. Me osi en gran repons pou sa defi. Mon krwar nou devret eksprim remersiman e felisitasyon pou tou bann ki'n enplike dan sa zefor. Depi bann dirizan, bann zofisye, bann volonter. E tou bann ki'n zwe en rol dan sa lorganizasyon.

Byensir nou annan santiman spesyal pou nou bann zwer dan tim *Beach Soccer* Sesel ki'n vreman defann loner nou pei, menm si zot in pli pti pei ki'n partisip dan sa levennman. Mon krwar zot in fer fas avek bann tim avek gran lenvitasyon enternasyonal. E zot in alaoter.

Donk, felisitasyon e mersi pou tim Sesel. Me osi felisitasyon e mersi pou bann siporter ki'n deryer zot e ki'n montre en gran lantouzyazm pou sa deroulman. Mon krwar a levennman in kit en leritaz presye pou nou pei, non selman

an term lenfrastriktir. Me sirtou an term en nouvo sport ki dapre sa ki nou konstate i al tre byen avek limaz nou pei. E mon ekspekte ki i en *sport* ki bann zenn pou kapab pran e ki nou pou kapab fer bokou progre ladan.

Donk, mon pou envit Lasanble montre zot sipor avek en laplodisman pou tou bann ki'n enplike dan sa levennman.

(APPLAUSE)

MR SPEAKER

Mersi bokou pou sa lekspresyon sipor e lankourazman. Nou a retourn lo biznes en pe pli regilye Madanm Clerk. E nou ava apel ou pou fer prezantasyon dokiman.

MADAM CLERK

Mersi Mr Speaker. Bonzour Mr Speaker. Bonzour tou bann *staff* Lasanble, nou bann envite dan Galeri. E tou dimoun a lekout. Bann papye ki pe ganny prezante bomaten i;

S.I. 20 of 2025 Value Added Tax (Amendment of First Schedule) Regulations, 2025.

S.I. 21 of 2025 Business Tax (Transfer Pricing) Regulations, 2025.

S.I. 22 of 2025 4.50% Five Year Treasury Bond Debt Order, 2025.

S.I. 23 of 2025 4.50% Five Year Treasury Bond Debt Order, 2025.

S.I. 24 of 2025 5.0% Five Year Treasury Bond Debt Order, 2025.

S.I. 25 of 2025 Land Reclamation (Retrospective Authority) Order, 2025.

S.I. 26 of 2025 International Trade Zone (Declaration of Zone) Notice, 2025.

S.I. 27 of 2025 International Trade Zone (Declaration of Zone) (Revocation) (No. 1) Notice, 2025

S.I. 28 of 2025 International Trade Zone (Declaration of Zone) (Revocation) (No. 2) Notice, 2025.

S.I. 29 of 2025 Delegation of Statutory Functions (Civil Status Act) (Amendment) Order, 2025.

S.I. 30 of 2025 Broadcasting and Telecommunication (Mobile

Number Portability)
(Amendment) Regulations, 2025
Mersi Mr Speaker.

MR SPEAKER

Mersi Madanm Clerk. Nou a *move* lo prosen item lo *Order Paper*. E mon a demann Madanm *Hansard Raporter* pou apel Vis-Prezidan, e son delegasyon pou *Private Notice Question*.

Bonzour Vis-Prezidan Amed Afif e bonzour Mr Patrick Payet Sekreter Deta dan Minister Finans, Plan Nasyonal e Komers. E byenveni zot tou le de pou partisip avek nou dan *Private Notice Question*. Avek sa mon ava apel *Leader* Lopozisyon pou poz kestyon.

HON SEBASTIEN PILLAY

Mersi Mr Speaker bonzour. Bonzour tou dimoun ki dan Galeri e tou koleg Onorab. E bonzour Vis-Prezidan ki'n zwenn nou. Mon remersi tou dimoun ki a lekout.

Mr Speaker, ou a permet mwan mon osi lo mon kote pou felisit Lekip Sesel pou son performans dan sa *Beach Soccer World Cup*. Zis en pti koreksyon Mr Speaker, nou pe pratik *Beach Soccer* pou en pe letan. E la mon mazin lekip *One Stone* ki Alpha Baldé ti form

par. E lezot lekip parey *MLUH* ki'n annan en pe letan ki pe pratik *Beach Soccer*.

E mon krwar i en bon... sa *World Cup* in en bon lelan pou nou kontinyen devlop sa *sport*. Akoz i kler i nou annan tou lans Sesel e i fasil pou nou bann zwer devlope, nou bann zenn devlope pou zwe *Beach Soccer* zisteman parey, parey *Brazil*.

Mr Speaker, mon oule osi felisit bann ankadre Lekip Sesel bann *coach* pou travay ki zot in fer. E mon swete ki zot kontinyen avek sa lekip. E nou kontinyen donn zot tou sipor pou zot kapab kontinyen avek sa lekip. Pli gro felisitasyon Mr Speaker i al pou Lepep Seselwa ki'n ralye deryer zot lekip, ki'n montre en sans patriyotik.

E ki nou'n kapab met tou nou bann diferans de kote. Menm si i annan diferans. Menm lo kote familyal, domestik, politik *whatever* pou nou zwenn nou tou pou siport lekip Sesel. E mon krwar sa byen, e mon swete ki dan lefitir Mr Speaker, nou fer mwens politik avek bann levennman parey. Avek sa mon ava demann mon kestyon, akoz i tonm lo mwan Mr Speaker.

(Interruptions)

MR SPEAKER

Onorab. Avek gran kourtwazi, mon'n permet ou sorti dan lord ki nou'n etabli pou ou fer en remark lo *Beach Soccer*. I regretan, i regretan ki ou annan serten komantr ki ou'n fer ki mon krwar pa apropiye. Mon oule dir osi ki Onorab Bernard Georges, ti demann mwan spesifikman pou li kapab adres Lasanble lo size *Beach Soccer*.

E mon ti dir li poudir mon a plifere fer li mwan menm. Me mon rekonnet ou zenerozite Onorab Georges. Me selman vi ki'n ariv sa Onorab si ou ti a kontan azout en mo lo *Beach Soccer*, mon ti ava donn ou laparol. Onorab Georges, si... Onorab Pillay, ou a tenny ou mikro silvouple.

HON SEBASTIEN PILLAY

Ahh ok. Mersi.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab. E bonzour tou nou bann vizite dan Galeri. E tou dimoun ki pe swiv nou.

I malere Mr Speaker, ki sa dimoun ki dir ki fodre pa nou anmenn politik dan en levennman Nasyonal parey *Beach Soccer* li menm li son premye *PNQ* dan premye zour sa dezyenm term sa Lasanble i anmenn en kestyon politik.

(APPLAUSE)

HON BERNARD GEORGES

Mr Speaker, mon ti a kontan zis siport ou bann parol bomaten. Ou bann parol remersiman, ou bann parol lankourazman. E nou, nou lo sa kote latab nou partaz sa. 2 keksoz in sorti tre for; enn se ki sa levennman i non selman anmenn Sesel lo lasenn enternasyonal. Me i donn en souf nou bann zenn Seselwa.

E dezyenmman, natirelman parey tou dimoun ki'n koze bomaten in rekonnet, in en gran levennman linite nasyonal kot nou'n met tou keksoz de kote. E pandan 11 zour nou tou nou'n ralye deryer Sesel. E Sesel se touzour sa ki nou bezwen met an premye.

Mr Speaker, mon annan zis 2 mo pou dir bomaten. Avek ou permisyon. E sa de mo se "Boum Sesel!". Mersi Mr Speaker.

(APPLAUSE)

MR SPEAKER

Mersi Onorab. *Leader* Lopoziyon aprezan met son kestyon *Private Notice Question*.

HON SEBASTIEN PILLAY

Mersi Mr Speaker. Mon Kestyon i en kestyon *oversight*, menm si nou'n anmize, nou'n kontan i enpor...

MR SPEAKER

Ou kestyon silvouple Onorab.

HON SEBASTIEN PILLAY

Mersi Mr Speaker. Mon kestyon i al koumsa;

Swivan lanons ki Prezidan e son komite ti'n nobou ganny senk milyon dolar koman sponsor pou *Beach Soccer World Cup*, eski Minis dan sa a Vis-Prezidan ki prezan dan Lasanble i kapab eksplike akoz ki sa larzan in sorti dan *Consolidated Fund* e anba ki *budget head* zot in tir sa larzan akoz nou bezwen *account* pou bann depans ki nou fer?

MR SPEAKER

Ou kestyon ganny lir mannier i ete lo *Order Paper* Onorab, pa bliye. Vis-Prezidan mon apel ou pou larepons.

VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour *Leader* Biznes Gouvernman. *Leader* Lopozisyon, tou bann Manm Lasanble e tou dimoun a lekout. Premyerman Mr Speaker, les mwan profite pou

mwan osi dir enn de mo lo sa levennman *Beach Soccer 2025* otour lekel sa kestyon *PNQ* ozordi i baze.

Premyerman mon oule partaz sa lazwa, sa lafyerte, sa gran sans lakonplisman ki nou pei, nou tim e nou lekip e tou son bann ankadre, siporter e pep Seselwa in pas atraver sa 2 semenn dan lanmour, lazwa, linite, lanmizman, travay dir, moman sportif e konbativ e byensir moman kot nou'n kriye, siporte, plere, konsole. Finalman reisi fer flote nou paviyon tre o pou lemonn antye vwar e admir nou.

Les mon a dir mersi nou lekip Tim Sesel ki'n fer nou fyer dan sa konpetisyon. Mon demann nou tou dan sa Lasanble avek ou permisyon Mr Speaker, pou aplodi sa sikse ki zot in fer lo lasenn enternasyonal.

(APPLAUSE)

VICE-PRESIDENT AHMED AFIF

E mon dir mersi nou bann frer, e zot paran, zot fanmir, zot tou ki'n fer nou fyer koman Seselwa. E nou fyer pou nou pei ki'n reisi en tel lakonplisman. Mersi osi pou tou ki'n partisip dan lorganizasyon sa

levennman nasyonal e enternasyonal.

Mon remersi Prezidan larepublik Mr Wavel Ramkalawan, son Minis *Sports* Minis Zialor, NSC bann teknisyen ki'n ansarz proze, arsitek ek enzenyer, QS, kontrakter, Zofisye Gouvernman, lapolis, militer, sekirite, lentelizans, servis medikal, servis telekominikasyon, Minister Finans, tourizm, Komite Lokal ek tou lezot ankor enkli Manm Lasanble Nasyonal, ou menm Onorab e plizyer lezot Onorab ki'n vin siporte. Lalis i tro long. Me pou zot tou mersi pou fer nou fyer. Mersi pou donn nou sa moman leksitasyon, lafyerte ek patriyotizm.

Mon pa konnen ki zour Sesel pou vwar en levennman lo sa nivo ankor, pli o nivo enternasyonal. E mwan personnelman, e mon konnen Onorab osi li in vwar pou li menm ki kantite travay ki'n al ladan e bann rannman pozitiv ki sa in anmennen pou sa pei. Mr Speaker, annou retourn prezan lo kestyon Onorab.

Si Minis i kapab eksplike aköz ki sa larzan i sorti dan *Consolidated Fund*, e anba ki *budget head* zot in tir sa larzan. I annan en larepons ki tre kourt. I sorti anba *Consolidated*

Fund, aköz se larzan ki Gouvernman in depanse ki'n al dan sa levennman. Ki *budget head* i sorti anba la? Proze *FIFA World Cup Beach Soccer 2025*.

Mr Speaker, i enportan pou gard antet bann pwen swivan. Premyerman tou larzan Bidze ki Gouvernman i depanse i sorti dan *Consolidated Fund*, enkli larzan ki nou ganny prete oubyen menm ki nou gannyen koman en don. Plizyer legzanp i egziste ozordi. E sa i nou prosedir e nou Lalwa.

Dezyenmman, nou ti met plizyer depans pou *Beach Soccer 2025* dan Bidze 2025 ki sa Lasanble ti aprouve lafen 2024 sonm anba sekirite, NSC eksetera, pou preparasyon. Ti annan en total annefe si ou azout tou sa bann sonm ki ti'n eparpiye dan diferan Bidze R6.3 milyon.

Trwazyenmman, se pa Gouvernman Sesel ki ti sipoze depans bann pli gro kou kapital pou sa proze.

Sa sete responsabilite Federasyon Foutbol Sesel ki ti pou rod son *sponsorship*, e fer tou sa bann gro depans selon sa ki ti ganny dir par zot *Chairman* Mr Elvis Chetty. Sa parey nou konnen pa'n zanmen materyalize. Alors, koman en Gouvernman responsab ki al pou defann non Sesel e son

repatasyon apre ki nou'n vwar ki Mr Chetty koman *Chairman* Federasyon pa'n delivre lo son promes finansman sa tournwa, nou'n pran li dan nou menm pou nou rod finansman pou konstri sa stad e tou lenfrastruktir ki vin avek.

Se pou sa rezon ki nou'n kre en lot laliny spesifik dan Bidze pou *Beach Soccer* prensipalman koman en proze kapital, pou met bann pli gro kou. Enkli konponan stad li menm, transportasyon, montaz, lofis *FIFA*, lofis pou medya, lalimyer dekorasyon, *landscaping*, *catering* eksetera.

Tou sa bann depans pou ganny reflekte dan revy Bidze milye lannen. E tou depans ki an plis ki sa ki ti deza dan Bidze pou ganny met dan en Bidze Siplemanter, ki pou ganny met devan Lasanble Nasyonal. A sa pwen Mr Speaker, mon ti a kontan eksplik tou dimoun ki pe ekoute Lepep Seselwa byen poudir sa Gouvernman *LDS* ki la ozordi se en Gouvernman ki annan en komitman anver bonn governans e latransparans e sirtou kot i konsern larzan Leta.

Se pou sa rezon, ki ozordi nou 18enm lo *Perception of Corruption Index* dan lemonn - par devan en kantite pei enkli Eropeen e endistriyalize. Sesel i

enn bann pei ki montre nou komitman ver latransparans. E letan Prezidan li in fer sa demars parske i ti konnen Federasyon atraver Mr Chetty pa ti pe reisi, pa ti pe fer naryen. E ler i ti pe fer sa demars, pa lo son non, lo non Sesel.

Me le moman ki i ti ganny lenformasyon e komitman ki ti pou annan serten don pou antre i ti anonse ankor dan sa fason latransparans e bon governans. E enn fwa i anonse se Minister Finans prezan ki pou donn detay lo bann kont pou sa bann dimoun ki anvi fer zot kontribisyon pou zot kapab fer.

Sa larzan pa pou antre *State House* oubyen pou al dan en kont prive, aköz i en don. I antre koman en larzan Gouvernman Sesel dan Labank Santral. E tou sa i ganny fer dan latransparans. Tou sa pou ganny rann kont anba *Consolidated Fund*. Tousala pou tonm anba tou Lalwa ki konsern larzan piblik, enkli pou ganny odite par Oditer Zeneral.

E enn fwa i prodwir son rapor, byensir ou menm Onorab koman *Chairman FPAC* ou pou ganny en rapor. E si ou annan kestyon ou kapab demande. Be nou pe fer tou keksoz selon prosedir ki egziste e sak sou ki ganny depanse. Ki

larzan ki'n ganny donnen koman en don sorti deor, i antre an kont Gouvernman Sesel detay ganny anmase.

Si i pa dan Bidze 2025 ki ti ganny soumet devan Lasanble, i a pas dan *Mid-year review* i a vin koman en Bidze Siplemanter. Se sa ki nou, nou travay sa lafason ki nou, nou travay. E zot a ganny tou lenformasyon, e tou letan pou demann tou kestyon ki annan. I enportan mon dir sa Mr Speaker, pou fer rapel tou dimoun enkli Onorab ki nou depans menm bann ki finansye atraver bann don i rantre dan depans anba *Consolidated Fund*.

Parske si non nenport dimoun i kapab dir be mon'n ganny tel larzan, i al met dan en kont an deor Gouvernman, pa ganny odite personn pa konnen ki mannyer i marse apre nou a dir sa ti en larzan Gouvernman. Non. Si in deza mars koumsa nou, nou pa pou zanmen aksepte ki i pa swiv Lalwa Sesel.

Alors mwan mon pa tro konpran onnetman Onorab akoz ou pe demande, akoz nou depans i anba *Consolidated Fund* kan tou larzan Gouvernman i ganny depanse anba *Consolidated Fund*, enkli donasyon ki nou gannnen. Vwala Mr Speaker, mon espere

mon kapab eklersi sa size. Mersi.

MR SPEAKER

Mersi Vis-Prezidan. Nou a pran kestyon Siplemanter lezot Manm. Onorab Gabriel.

HON CONRAD GABRIEL

Mersi Mr Speaker. Bonzour tou dimoun a lekout. Bonzour bann envite dan Galeri. Parey mon bann dimoun ki'n fer oparavan, mon ti a kontan Mr Speaker atraver ou mon remerisi tou bann dimoun ki'n ede dan en fason ou en lot pou deroulman sa *World Cup Beach Soccer*. Felisitasyon spesyal pou bann zwer e *management* lekip. Sirman sa leksperyans pou inoubliab parmi nou popilasyon.

I montre ou ki mannyer *sport* i inifye en nasyon e nou met tou nou diferans de kote. Mersi. VP, prenon kont larepons ki ou'n donnen, eski VP e atraver Gouvernman i pare pou donn sa Lasanble en *breakdown* konplet, e osi lekel pli gro depans ki zot in fer vizavi sa zwe ziske ozordi la? Mersi.

MR SPEAKER

Mersi. Mon krwar VP in fini donn sa lasirans klerman. Vis-Prezidan ou ti a kontan azout keksoz?

VICE-PRESIDENT AHMED AFIF

Mr Speaker, mersi bokou. E mersi Onorab. Mr Speaker, kestyon prensipal pe demande aköz larzan i sorti dan *Consolidated Fund* e anba ki *budget head*. E mon'n reponn sa.

Sa ki mon kapab dir ek ou Onorab se ki depans pou sa *Beach Soccer* i pou en depans ki pou ganny konsolide, nou pou met li dan *Consolidated Fund*. I pa ankor fini ganny depanse menm ki konpetisyon in fini parske i ankor annan depans ki ankor pe antre. Me selman nou pou *compile* tou sa bann kou pou zot.

I pou dan *Consolidated Fund*, i pou ganny odite. E rapor i a ganny fer parey tou bann proze kapital e zot a vwar en total ladan. Mersi.

MR SPEAKER

Mersi. Onorab Uranie ?

HON ROCKY URANIE

Mersi Mr Speaker. Bonzour panel. Ankor enn fwa mon osi mon pou zwenn avek mon koleg Onorab Conrad Gabriel, pou felisit tou bann dimoun ki'n partisip da sa zwe. Bann organizater, prensipalman bann zwer ki'n desann ki'n fer

nou fyer. Nou tou nou konnen poudir ler *it come to sport* nou tou nou kontan inifye pou siport nou tim Sesel.

VP mon'n tann ou nonm plizyer lofis ki ti pe ganny kree pou sa aktivite *Beach Soccer*, lofis medya eksetera pou *FIFA*. E apre ou'n nonm sekirite, lapolis. Eski ou pou ganny detay larzan ki sa bann lapolis ki'n travay, eski zot pou ganny donn nou en detay si zot pou ganny bann *allowance* pou sa bann travay ki zot in fer sa zour ? Mersi.

MR SPEAKER

Mon pa konnen konbyen fwa nou bezwen dir poudir tou detay pou ganny donner. Silvouple VP, ou kapab adrese.

VICE-PRESIDENT AHMED AFIF

Mersi Mr Speaker. Mr Speaker, sa levennman in deroul ekstrememan byen. Ekstrememan byen, sekirite in enn parmi bann ki'n fer en louveraz ekselan dan sa *Beach Soccer*. Ti annan gard, ti annan militer, ti annan bann lezot sekirite ki ti pe travay sa 2 semenn in mars ekstrememan byen.

Tou laranzman in ganny fer. Gard i ganny peye, militer i ganny peye. Tou keksoz ki zot in

ganny dir zot pe gannyen, tou keksoz ki par anba zot kondisyon zot travay zot pou gannyen. Napa okenn person ki pou ganny trete dan okenn fason diferan. Zot pou ganny sa ki kondisyon ki zot travay anba la. Mersi bokou Mr Speaker.

MR SPEAKER

Mersi. Onorab Bistoquet.

HON ANNE BISTOQUET

Mersi Mr Speaker. Bonzour Mr Speaker, Manm, koleg Onorab e tou dimoun a lekout. Mr Speaker, mon krwar felisitasyon in fini ganny donnen zeneral. E permet mwan mon ti a voudre felisit en zabitan Roche Caiman Mr James Bill ki en *Beach Soccer Coach*.

E in antrenn 2 atlet ki in perform dan sa konpetisyon, e nou dir li felisitasyon li osi koman en *coach*.

(APPLAUSE)

HON ANNE BISTOQUET

Mr Speaker, *VP* in dir ki a fason fer pou ganny odite par Oditer zeneral. Eski ou kapab konfirm ek sa Lasanble e manm piblik si sa i meyer fason fer pou en pei? Oubyen si ti annan lezot fason ki sa peyman ti kapab ganny fer

parey oparavan nou ti war bann peyman ti ganny fer?

E dezyenmman *VP*, *FIFA* in dir ki sa tournwa i meyer *Beach Soccer* ki zot in annan depi 2005. Eski ou kapab enform nou Lasanble e manm piblik, ki bann lezot komanter pozitiv ki Sesel in gannyen atraver sa tournwa, e ki sa i vedir pou repitasyon Sesel? Mersi.

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou Mr Speaker. Mr Speaker, sa ki mon kapab dir avek Onorab se sa fason ki nou pe rann kont lo depans i fason ki ganny dekrir anba *Public Finance Management Act*. Savedir tou larzan enkli bann don i ante dan en Kont Gouvernman. E dek ki i antre dan en kont Gouvernman, dek ki ou depanse i vin kontrol lo la. Kontrol premyerman bidzeter, prosedir.

Dezyenmman, i pou vin en kontrol Lasanble Nasyonal aköz i pou bezwen evantyelman si i siplemanter par egzanp pas devan ankor Lasanble Nasyonal. Alor, i annan tou sa bann kontrol. Eski i annan lezot fason fer? Mon mazine i kapab

annan bann lezot fason fer, me i pa swiv Lalwa.

Par egzanp ou kapab dir be pey sa larzan ki pou al pou Gouvernman Sesel dan en kont an deor ki pa dan *Consolidated Fund*. Sa osi ti kapab ganny fer mon mazine. Me sa pa fason fer Gouvernman LDS. Sa pa swiv nou Konstitisyon, sa pa swiv nou Lalwa Finans ozordi e nou pa pou zanmen azir dan sa fason. Nou, nou pou fer li dan latransparans dan en fason ki Oditer Zeneral pou satisfè. E dan en fason ki Lasanble Nasyonal i ganny rann kont sak sou ki ganny depanse anba la.

Mr Speaker, bann komantr ki nou'n gannyen lo FIFA zeneralman pa zis lo nou depans, akòz kestyon i lo lafason ki nou'n depans larzan. Mwan mon pa pe dir komantr ki nou eternalman nou pe dir. Mon pe dir komantr FIFA zot dir ek nou dan sa konpetisyon zot in ganny pli gro *attendance* ki zanmen zot in deza gannyen e ti 79 mil 750 dimoun pou tou sa bann *match*.

(APPLAUSE)

VICE-PRESIDENT AHMED AFIF

70 pousan bann tiket in ganny fer in ganny vann. E sa zot dir

enn bann pli gran ki zot in deza gannyen. Pli gran ki menm ler ti ganny vann *Dubai* e menm Larisi kan i ti fer. Zot dir koumsa zot in dir nou poudir sif dafer reveni tiket i pli o ki FIFA in deza gannyen pou en *Beach Soccer*, pli o.

Reveni ki zot in fer lo ospitalite, savedir bann pti manze an deor, bann pti keksoz *burger* tousala pli o ki zanmen zot in deza fer dan en konpetisyon.

(APPLAUSE)

VICE-PRESIDENT AHMED AFIF

Lo bann pti souvenir ki dimoun i aste pli o zanmen zot in deza. Annefe zot dir ek nou premye zour ki dimoun ti aste *Dubai* dan konpetisyon *Dubai*. Lakantite ki zot ti aste, *ok* zot dir koumsa ki nou zis lo premye zour ki nou'n fer lavant nou'n van plis ki antye dan tournwa *Dubai*. Zis premye zour.

Se FIFA bann sif ki FIFA in donn nou. Premye fwa ki zot dir ki in deza annan en tenm komemorativ pou *Beach Soccer* dan en pei. E Sesel in fer li. *Fan Park* pli gran *attendance* ki'n deza annan. E zot dir koumsa pou final ek semi final zot ti annan 200 milyon *hits* lo *social media*. 200 milyon *hits* lo la.

E sa tournwa ti ganny transmet dan 170 pei dan lemonn. Alor, pou nou i ti en tournwa ekselan, en sikse eksepsyonnel pou Sesel. en *marketing* ki mon konnen pou anmenn rannman pou Sesel. E in met nou bann marmay, nou bann foutboler lo en pedestal sitan o. E mwan mon konnen se koumsa ki nou devret ale. Koumsa ki nou devret pe promouvwar *sport*. E sa Gouvernman i la pou met Sesel pli nivo posib.

(APPLAUSE)

MR SPEAKER

Mersi VP. Ou'n terminen? Onorab Woodcock.

HON WAVEL WOODCOCK

Mersi Mr Speaker. Bonzour VP. Tou Manm e tou dimoun a lekout. VP, anvi ki Gouvernman Sesel, Prezidan ti bezwen *raise* larzan pou sa *arena* apre ki federasyon in *fail*, VP, eski ou kapab donn nou - konmsi i enportan pou donn nou sa garanti sa lasirans pou tou sa larzan ki Prezidan ki Gouvernman in *raised* in ganny servi pou sa *World Cup*.

Me ki napa okenn larzan ki'n ganny transfer dan en kont a aletranze parey sa 50 milyon dolar ki ti disparet ki nou ankor

pe rode ozordi. konmsi donn en lasirans ki tou larzan ki'n antre dan *Consolidated Fund* ki nou'n gannnen ki nou'n *raised* in ganny servi byen, sak sou ek sak kas. Me napa okenn larzan, okenn milyon dolar ki ganny transfer dan kont aletranze parey in arive anba ladministrasyon presedan. Mersi.

MR SPEAKER

Mersi Onorab. VP?

VICE-PRESIDENT AHMED AFIF

Mersi bokou Mr Speaker. Mr Speaker, mon oule dir ek Onorab poudir nou, nou pou swiv tou prosedir entern Minister Finans ek *Public Finance Act*. Tou sa bann don ki nu pou resevwar pou rantre dan bann kont dan Labank Santral dan Minister Finans. E tou sa larzan pou ganny *accounted for*.

Depi ler i antre ziska ler i ganny depanse, ziska dernyen sou. Sa se nou prosedir. Sa se nou repitasyon. Se pou sa rezon ki nou *perception of index* nou 18enm dan lemonn. Parske nou transparan, nou ganny odite non selman par Oditer Zeneral. Me ler *IMF* ek Labank Mondyal i vin kot nou, zot osi zot pas dan tou nou kont.

Si zot vwar okenn keksoz ki pa normal zot pou met li dan zot rapor. E zot in vwar tou sa bann rapor *IMF*, zot dir ou Sesel son bann kont i enn egzanpler pou lemonn antye.

(APPLAUSE)

VICE-PRESIDENT AHMED AFIF

Mersi bokou Onorab.

MR SPEAKER

Mersi *VP*. Onorab Aglae.

HON EGBERT AGLAE

Mersi Mr Speaker. Bonzour *VP* ek nou bann envite ki dan Galeri. *VP* dan ou larepons premye ou'n fer resorti ki i annan serten larzan konponan ki ti dan Bidze 2025 ki'n ganny servi. In eparpiye partou, partou ou'n dir. Mon rapel ou ti pe pas Bidze, me selman napa okenn moman letan ki ti annan larzan ki ti ganny mete pou *Beach Soccer*.

I dan bann *interview* bann premye *interview* ki ti ganny fer, sa ti komans an 2023 apre ki bann *management FIFA* ti fer bann vizit pou gete si Sesel i kapab *host* sa aktivite. *Chairman* Federasyon Foutbol ti fer resorti ki sete zot responsabilite pou kapab *raise* fon pou fer sa *World Beach*

Soccer Sesel. Ti napa okenn mansyon ki larzan pou sorti dan Kof Gouvernman.

So, sa ki'n arive apre se ki baze lo bann *failures* ki'n arive mon kapab dir, Gouvernman in bezwen vwar li *step in*. Premyerman, mon ti a kontan konnen vi ki ti annan en mansyon 5 milyon dolar, ki ti ganny *sponsor* pou sa levennman, lekel - aköz pa'n zanmen nonmen - lekel sa *sponsor* ki'n *sponsor* Sesel sa 5 milyon dolar?

E dezyenmman, si ou annan sa lenformasyon ka ki sa larzan in antre dan Fon Konsolide Gouvernman Sesel? Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, mon krwar Onorab pa ti lir son gro liv Bidze ki ti ganny donnen. E mon a fer referans dan sa liv, lo bann diferan sonm ki ti ganny mete. E zot ti aprouve dayer. Anba Lapolis ti annan R170mil. Anba Defans ti annan R1.177 milyon. Anba *Mayors Office* ti annan R927mil. Anba *NSC* ti annan 3milyon. Onorab, pe lir tou

bann sif selman Onorab lot kote i dir i ti napa.

(laughter)

VICE-PRESIDENT AHMED AFIF

Ou pe lir tou bann sif, selman lot i dir i ti napa. Mon pa konnen si ou anvi mon kontinyen Mr Speaker. Oubyen zot Onorab zot a partaz antre zot, akòz i pa paret zot partaz lenformasyon. Ed mwan partaz zot lenformasyon avek ou Onorab. So, i pa ava vin demann kestyon ki deza devan zot.

MR SPEAKER

Order! Onorab Pillay, mon ava demann ou pou aret enteronpe silvouple. Ou annan ou kestyon pou demande. Si ou anvi demann ou kestyon zis fer sir ki ou la pou demann li. Mersi. Onorab... *VP* ou'n fini reponn kestyon wi oubyen non? *VP*?

VICE-PRESIDENT AHMED AFIF

Mr Speaker, in demann mwan si bann *sponsorship*...

(Interruption)

MR SPEAKER

Onorab Aglae, ekoute.

VICE-PRESIDENT AHMED AFIF

Mon eksplik li poudir i pa'n lir son liv. E bann larzan in eksplik klèman dan sa gro liv i annan sa sonm ki ariv R6.331 milyon. Onorab Pillay, i annan tou detay i a fer ou gannnen. Ti a bon zot koze antre zot, parske i ti ava ed zot en kantite.

Dezyenmman, lo kote *sponsorship* ti nonmen sa osi bann *sponsorship*; ti annan enn lo kote *Asset Group* ki sorti *Qatar* ki ti promet fer en komitman \$3 milyon. E dezyenm nou annan en komitman 2 milyon dolar sorti *UAE* atraver *Etihad*. So, i 5 milyon dolar an tou.

MR SPEAKER

Mersi Vis-Prezidan. Onorab Loze, ou kestyon. Onorab Loze, ou kestyon. Onorab... nou pou pran kestyon

(Interruption)

MR SPEAKER

Onorab Loze. Si *Leader* Lopozisyon pa ti'n enteronpe, ou ti a ganny ou repons pli kler. Onorab Loze, si ou annan en kestyon poz li la konmela.

HON JOHAN LOZE

Ar mersi, Mr Speaker. Mon annan 2 kestyon mwan. Mon note selman *VP* pa'n reponn ler Onorab Aglae in demande si sa larzan in fini antre. Mr Speaker, mon kestyon.

Premye i en *matter* ki'n *arise from* larepons *VP*, ki'n enform nou poudir tou don e pre ki Gouvernman i gannyen i antre dan kont Gouvernman. E *VP* in *further* dir nou ki i pou i pa pou legal pou sa al okenn lot landrwa i bezwen antre dan kont Gouvernman. Mon note ki *VP* pe reponn sa dan son kapasite koman Minis Finans par enterim, mon krwar. Mon korek la Minister?

Ok. Be sa menm Minister Finans Mr Speaker, in asiz dan sa Lasanble in eksplik nou ki mannyer larzan don *West Coast Project* pa'n antre kot Minister ...

MR SPEAKER

Ou annan kestyon? Ou annan kestyon lo kestyon ki lo *Order Paper*?

HON JOHAN LOZE

Mr Speaker, mon kestyon - pou mon premye kestyon, mon anvi konnen ant Minis Hassan avek Minis *VP* Afif, lekel ki pe *mislead* Lasanble lo sa size? Sa i mon premye kestyon. Mon dezeyenm kestyon ki mon annan

Mr Speaker, i annan en zenn fiy Seselwa ki ti'n ganny *awarded* en Kontra Sekirite R5 milyon pou *Beach Soccer*.

Sa fiy son kontra in ganny frustrated, in al devan Lakour e Lakour in ordonnen ki i ganny peye en domaz R2 milyon. Eski sa i dan sa Bidze ki *VP* pe al anmenn devan nou sa R2 milyon domaz? Guillaume Albert ki mon zanmi Onorab Henrie.

MR SPEAKER

Mersi. Vis-Prezidan si ou pare pou adres sa kestyon.

VICE-PRESIDENT AHMED AFIF

Wi Mr Speaker. Mon ava eksplik li aköz zot pa tro konpran sa mo *accounting*. E ki mannyer larzan i ganny *accounted for*. Mon repet e mon *stand by* tou sa ki mon'n dir zot bomaten. Tou larzan menm si i en don i form parti *Consolidated Fund*.

Mon a donn ou en legzanp kot larzan i pa antre dan kont, selman i ganny *accounted for* dan *Consolidated Fund*. Mon a donn ou en legzanp, aköz mon pe *stand by* mon parol. Ler Gouvernman Lasin i fer kado en bato militer, i antre dan kont Gouvernman. Selman zanmen en larzan i ganny peye dan nou kont pou konstri sa bato.

Sa bato i ganny antre, e zot war e zot demann kestyon lo la zot i antre anler koman reveni. Selman reveni pa zanmen antre kont, aköz i reveni ki nou, nou reflekte pou nou balans li kont en depans anba *SDF*. Aköz sa bato i bezwen ganny reflekte dan kont Gouvernman.

E ler ou met li koman en depans, ou bezwen met anler ou'n resevwar en don. I pa *monnetary in kind* li, i en don. Zis parey si ou fer en semen, i donn ou en don. I pa pe donn ou sa larzan direktman pou pey en kontrakter ki ganny fer en don. Alor, i antre dan Kont Gouvernman koman en don. E sa *asset* i vin koman en depans anba larzan Gouvernman.

Zis parey ler ou resevwar en bato, i antre dan *Consolidated Fund*. Zot pa pe ekoute parske zot pa konpran, mon konpran zot mwan. Zot pa konpran kantmenm ou donn zot leksplikasyon, me zot anvi konfiz pep Seselwa. Larzan i antre...

(Interruption)

MR SPEAKER

Silvouple, si en Manm pou demann en kestyon an menm tan ler *VP* pe reponn i pe kontinyen argimante, nou pa

pou a lwen avek sa kalite konportman, *ok?* Si zot oule en repons demann zot kestyon, ekout larepons. Mersi. *VP*, ou'n terminen lo la?

VICE-PRESIDENT AHMED AFIF

Wi. Mon ti oule zis eksplike poudir mon *stand by* tou sa ki mon'n dir. tou larzan i ganny reflekte, i antre dan kont Gouvernman. Lo kote sekirite, ek bann laranzman si sa *Local Organizing Committee* ki organiz e fer son bann laranzman sekirite atraver *FIFA* zot annan zot problemm avek sekirite, sa se pa en konsern direk Gouvernman Sesel. Parske se zot organizater. Nou, nou'n finans lenfrastruktir nou'n fer sir poudir sa in ganny fer. Lafyerte Seselwa in monte, nou paviyon in flote se sa ki nou responsabilite. Mersi Mr Speaker.

MR SPEAKER

Mersi. Dernyen siplemanter bann lezot Manm. Onorab Naidu.

HON SATHYA NAIDU

Mersi Mr Speaker. Mon bezwen dir ki ler mon ti dan sa stad *Paradise Arena* pou debout avek mon paviyon Sesel, e pou lev li sak fwa nou bann zwer ti

lo boul pou dir “Ale Sesel !” in anmenn gran lafyerte pou mwan.

E mon fyer pou dir se atraver sa ladministrasyon - si Prezidan Ramkalawan pa ti pran sa proze amen, nou pa ti pou kapab fer *Beach Soccer*. Alors si ozordi lo kote....

MR SPEAKER

Ok. Ou kestyon. Onorab, ou kestyon si ou annan.

HON SATHYA NAIDU

Mon ava al lo kestyon Mr Speaker. Zisteman VP in fer resorti poudir in annan en provizyon bidzeter ki’n ganny fer lo en baz inisyal pou *Beach Soccer*. Me selman Gouvernman in trouv li pe enterfer dan en serten sans pou kapab fer sir ki nou fer *Beach Soccer* vin en realite.

Lo size federasyon, ki kalite komitman eski federasyon a en serten pwen i pe donn Gouvernman Sesel, ki finalman nou’n war a en dernyen moman Prezidan Larepiblik otour en lekip, in nobou kapab fer sa travay ? E an plis ki sa i annan en persepsyon deor kot dimoun i krwar poudir ki Gouvernman i devret pe enterfer dan gouvernans en federasyon.

Me nou konnen pou dir sa pa pou kapab arive, pou bann rezon ki relye avek zesyon en federasyon kot Gouvernman pa devret pe enterfer. Me ozordi nou rekonnet poudir foutbol Sesel, i annan en *question mark* lo la...

(Interruption)

MR SPEAKER

Ok. Onorab non, non, non. Nou pa pou al dan foutbol Sesel. VP, eski ou annan okenn repons pou so premye pwen?

VICE-PRESIDENT AHMED AFIF

Mersi bokou Mr Speaker. Mr Speaker, mon krwar Onorab ti pe met en pe lanfaz lo a ki pwen ki Gouvernman in deside i bezwen antre pou li degaz lasasen. Be nou, nou’n ganny bann parol ki’n ganny prononse depi *May 2023*.

2023, nou pe koz 2an pase. Kan federasyon ti pe fer serten demars. Zot dir zot annan lakonpannyen lokal zot in etabli. Zot pou fer fason zot pou anmenn bann fon pou met ladan pou fer tou sa bann depans. E nou’n al lo zot komitman, nou’n fer zot sa konfyans. Me pli letan in pase, ler in komans ariv 2024 komansman nou pa war en sou

depans pe ganny fer lo lenfrastriktir.

Sa *site* kot ti ete, pye dibwa, pye sed ti lo la ti ankor parey. Ni *survey*, ni komans fer plan pou al met kot *Planning* naryen ti napa. E ler ti ariv Desanm 2024, Prezidan ti konsernen parske i reste 5 mwan. E i demann zot “be kot zot ete?” Nou, nou pe fer tou le neser nou. Nou pe sey met lekip ansanm, nou pe sey aranz en pti pe *NSC Hall*. Nou pe sey aranz landrwa en pti pe, nou pe donn *training* nou bann marmay. Nou a fer en pe *landscaping*. Oli zot? Ou konnen i pe al ganny aranze. Pe vini menm, nou pe *order*. Zanmen in arive.

Ler in ariv Zanbye, Prezidan i dir, “*Enough is enough*” si Gouvènmman i bezwen entervenir pou nou fer sir nou defann non Sesel entegrite Sesel e repitasyon Sesel e pa les sa bann marmay tonbe ki’n *practice* pou zot fer monte nou paviyon, Gouvènmman in dir nou pou antre ladan. Parske se repitasyon Larepublik Sesel ki an ze la.

E nou pa pou les sa zanmen tonbe. E se la a sa pwen ki Prezidan ti dir mwan, mon pa pou enterfer ek federasyon ek son bann

desizyon. Me selman mon pou defann lentere Sesel e Seselwa. E Gouvènmman i a finansman, i ava met an plas lenfrastriktir e i pou fer sir ki sa bann zwe i ganny delivre.

E a sa pwen Onorab, ki Gouvènmman ti antre ladan aktivman. Pa dan federasyon, dan *Beach Soccer*. Gouvènmman pa enterfer avek en federasyon li. Gouvènmman i annan drwa annan son lopinyon lo lafason ki en federasyon i ganny marse. Mon krwar tou Seselwa i annan zot lopinyon. Me nou ti fer sir poudir nou’n met larzan de kote pou fer sir ki sa levennman i arive parey lekspektasyon pep Seselwa pou annan deor, pou annan en *Beach FIFA World Cup* sa nivo e nou’n fyer sa lakonplisman.

Prezidan in diriz sa loperasyon pou fer sir lenfrastriktir i ganny fer personnelman. Diriz bann lekip kontrakter, enzenyer, *project management* pou fer sir ki sa proze i ganny delivre ek *FIFA* le 27 Avril zis avan zot fer zot *test match*.

E in fer sir nou’n pas dan en ta parkour difikilte. Ti annan en keksoz ki nou ti apel en *buffer* ler ou pe sey fer en proze. En *buffer* ou a dir ou a fini en semenn avan oubyen 10 zour avan. Nou ti annan zero *buffer*

ler nou pe fer. Si nou fer en fot, nou pa pou komanse le 1 Me. I ti sitan, sitan pre nou ti pe travay koumsa anba direksyon Prezidan Ramkalawan.

E li i en dimoun in fer ki tou larzan in ganny depanse, tou larzan pou ganny rann kont, tou keksoz i pas dan Minister Finans atraver Labank Santral, e zot pou ganny tou detay. Mon fyer poudir ozordi ki sa tournwa in en sikse enkrwayab. Se pa nou ki dir, pep Seselwa ki pe dir, *FIFA* ki pe dir, zot ki pe dir lo rezo enternasyonal zot pe dir.

E nou, nou fyer nou'n kapab fer li. E mon kontan ki Seselwa in vwar ki mannyer ler tou dimoun i travay ansanm dan linite, ler nou tou nou vin ansanm pou nou siport nou lekip. Get rezilta ozordi, en tim parey *Belarus* ki in sorti dezyenm nou'n met 3 gol kont zot. Ozordi nou annan en zenn sorti La Digue Lienal Bibi i 3enm pli zenn dimoun dan lemonn pou score 2 gol kont Zapon dan son premye *match*.

(APPLAUSE)

VICE-PRESIDENT AHMED AFIF

Be i pa en depans ki'n vo lapenn sa? I pa'n en depans ki'n vo lapenn pou Sesel, menm ki

Gouvernman in oblize peye? I pa en bon keksoz ki demen en lenfrastriktir sa nivo i reste pou nou? i pou reste pou nou, pou nou fer ankor konpetisyon, pou nou donn sa loportinite nou bann zenn pou zot al ankor bokou pli o. Mersi bokou Mr Speaker.

MR SPEAKER

Nou a pran kestyon siplemanter Onorab Pillay.

HON SEBASTIEN PILLAY

Mersi Mr Speaker. Mr Speaker, mon pou retourn lo kestyon orizinal ki ti'n ganny demande pou nou ganny serten presizyon bann larepons ki *VP* in donner. So, baze lo larepons ki *VP* in dir nou... Mr Speaker, avan mon kontinyen ou'n mansyonn Prezidan - enn ler mon ti krwar li ki dan tim *Brazil* ler in al donn lakoup. Akoz i pa'n le sorti lo *stage*.

Me selman zis les mwan, zis permet mwan zis permet mwan...

(Interruptions)

MR SPEAKER

Order!

HON SEBASTIEN PILLAY

Mersi Mr Speaker. Permet mwan pran Bidze ki devan

mwan. E mon'n regard Bidze. An total ti annan apepre R6 milyon ki ti'n eparpiye dan diferan Bidze. E VP in mansyonn Lafors Defans, wi. In mansyonn *Mayors Office* ti annan en *roadshow*. NSC ti annan pli gro kopo 3 milyon, Lapolis 565 e Ledikasyon ti sipoze annan 552 li osi ti annan en zafer pou fer, ok 6 milyon.

However, Mr Speaker, VP in konfirman ler in donn larepons lo komansman ki sa 5 milyon dolar in sorti dan *Consolidated Fund*. E ki sa 2 donasyon *assess development* e *Qatari* e *Etihad* pa ankor antre pa ankor *account for* pou le moman aköz i pou ganny *account for* dan Bidze Siplemanter.

So, teknikman nou'n depans apepre R75 milyon pou sa zwe. Me baze lo larepons VP nou'n depans en pe plis ki sa prenon kont tou bann lezot keksoz ki VP in met devan nou. So, prezan nou ki nou pe demann VP, lefe ki tou sa larzan i sorti kot Gouvènan, ki *accounting* pou ganny fer nek an ler nou ganny en Bidze Siplemanter Mr Speaker avan Lasanble i al *recess* si nou gannnen.

Kan eski nou pou konnen egzaktman konbyen nou Gouvènan nou'n mete par

rapor sa ki *FIFA* in donnen pou sa zwe? Sa i enportan pou nou konnen pou nou etabli bann fe otour sa size.

Prezan Mr Speaker, sa i pou osi ed nou pou nou konpran ki kantite larzan ki nou'n mete dan preparasyon sa bann foutboler kot zot rezilta ti a kapab meyer si nou ti'n kapab donn zot plis preparasyon.

Sa i zis en konteks pou nou fer pli byen dan lot zwe. Prezan mon dezyenm kestyon Mr Speaker, Vis-Prezidan in sey donn nou en leksplikasyon lo size larzan antre dan Bidze, Proze *West Coast* i reste *UAE* i pe pey isi. Me selman la i pe dir nou tou larzan in vin dan Bidze. I pe koz nou 2 milyon *Etihad*, 2 milyon dolar *Etihad*. Eski Vis-Prezidan i kapab konfirman si sa 2 milyon *Etihad* i an relasyon ek en lagreman ki Gouvènan in sinyen pou *naming rights*, *Paradise Beach Soccer Arena* pou ki i sanz son non pou li vin *Etihad Arena*. Eski sa i a relasyon avek sa? E si sa i leka konfirm ek Lasanble sa pozisyon.

E prenon kont lefe ki sa bann larzan pou ganny *account for* nek an Bidze Siplemanter, eski bann zofisye Lafors Defans, mon pou retoun lo la Lafors Defans ek Lapolis ki'n ganny dir pou lenformasyon VP ki'n

ganny dir zot pa pe gannyen sa *allowance*, eski prezan Gouvernman pou onor sa *commitment* ki in fer e pou pey sa bann zofisye Lapolis sa *allowance* ki zot sipoze gannyen? Mersi Mr Speaker.

MR SPEAKER

Mersi. Vis-Prezidan mon'n note 3 pwen, si ou kapab adrese.

VICE-PRESIDENT AHMED AFIF

Mersi bokou Mr Speaker. Mr Speaker, sa ki mon kapab dir avek Onorab se tou larzan don pou ganny *accounted for*. I annan 5 milyon dolar. 3 *from Asset Group*, 2 sorti kot *Etihad*. Sa 3 milyon dolar *from Assent Group* in fini rantre dan kont Labank Santral. Sa 2 milyon dolar komitman *from Etihad* li i pa ankor antre. Me mon antisipe i pou antre tre byento.

Depans ziska ozordi, sa ki nou'n vwar nou'n depanse ziska ozordi i anviron R73 milyon. Sa ki nou'n depanse ziska ozordi. E sa *Local Organizing Committee*, ki en Komite i an sipervize. E zot travay an konzwent avek Federasyon Foutbol *FIFA*, zot pa ankor frenm zot kont parske zot ankor pe annan plizyer depans e rekonsilyasyon ki zot, zot pe fer. Alor, nou napa en sif final.

Me selman ler nou pou ganny en sif final pou sa Bidze, nou pou met li koman, nou pou met li dan revi milye lannen 2025. Okenn depans ki par lao sa R6.3 milyon ki dan Bidze deza, pou ganny mete dan en Bidze Siplemanter. Se sa nou lentansyon.

An sa ki konsern *allowance* ki bann diferan zofisye e gannyen, sa se bann kestyon administrativ mon pa'n vin la ozordi pou mwan regard bann kestyon administrativ. Mon'n vin la pou dir ou ki mannyer depans i ganny fer, e akoz i anba *Consolidated Fund* ki *heading* i tonm anba la. Sa ou kestyon ki ou'n demande.

Me si i annan bann kestyon pou fer avek peyman administrativ, bann kestyon administrativ nou byensir nou pozisyon se onor nenport komitman ki annan lo kote administrativ. E sa i en prosedir sa, mon pa'n vi la ozordi pou mwan reponn kestyon spesifik lo administrativ parske i pa dan o kestyon sa.

Alor, mwan sa ki mon kapab dir ou keksoz pe mars byen. Larzan ki pe antre i ganny rann kont. Pou annan en Bidze Siplemanter, definitivman pou annan en Bidze Siplemanter nou'n depans R73 milyon ziska ozordi. I annan \$3 milyon ki'n

fini antre, \$5 milyon ki pou antre koman en komitman an total. Se sa ki nou annan.

Vwala Mr Speaker, se sa ki mwan mon kapab dir ou pou reponn ou kestyon. Mersi.

MR SPEAKER

Mersi. Mersi Vis-Prezidan.

HON SEBASTIEN PILLAY

Mr Speaker, mon ti oule konnen si *Paradise Aren...*

MR SPEAKER

Mersi Vis-Prezidan. Nou a termin la avek sesyon PNQ. Mon remersye Prezidan pou son larepons. E mon remersye SS Patrick Payet pou son prezans, menm si i pa'n ganny sans donn okenn repons. Mersi SS, e mon swet ou bon depar.

Nou a kontinyen pou letan ki reste nou dan sa peryod Madanm Hansard Raporter, apel lezot manm delegasyon. Nou pe dir bonzour Mrs Sheena Max *Chief Registration Officer Seychelles Electoral Commission* pou li partisip dan premye kestyon ki nou annan la 58. Onorab Churchill Gill.

HON CHURCHILL GILL

Mersi Mr Speaker. Bonzour tou dimoun ki pe ekout nou. Kestyon i lir koumsa; eski Vis-Prezidan i kapab dir sa

Lasanble aköz ki ler en dimoun i vin verifiye son non lo lalis voter i pa ganny okenn dokiman avek zofisye dan biro? Mersi. Pardon i annan en dezyenm.

Ki formalite ki zofisye eleksyon i fer entern pou dimoun ki vin verifiye zot non?

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, premyerman sa prosedir donn dokiman apre ki en dimoun in enspekte son bann detay lo lalis voter, in aret donneren depi 2015. Savedir sa lannen i fer 10 ki sa prosedir i nepli egziste.

Alors, prosedir aktyel ki pe ganny servi i pa nouvo, pandan 10an in koumsa. Sa desizyon ti vin apre *forum* elektoral reform 2012/2013 ki ti fer avek tou bann parti politik ek obzervater lokal. E i ti annan en rekomandasyon pou fer lamannman anba Seksyon 10 sa letan. Sa rekomandasyon i lir koumsa; "*Section 10 of the Election Act should be deleted to provide for the Electoral Commission to instead of giving us certificate right to a person to inform that his or her details*

have been updated in the register.”

Pou dezyenm parti ou kestyon Onorab, letan en dimoun i vizit Sant Lanrezistremman pou fer lenspeksyon, bann zofisye rikord detay tel ki son limero Idantite, Sinyatir, non, son distrik tou dimoun ki vin fer i swiv sa prosedir. Zofisye i osi ekri remark baze lo okenn konsey ouswa rekomandasyon ki in fer avek sa voter.

En legzanp;

Si en voter i vin fer son lenspeksyon e tou son detay i korek e lo rezis, sa kliyan i ganny enformen lo la. E par kont si sa voter i pa lo rezis i ganny ankouraze pou anrezistre e bann formalite nesesser i ganny fer.

Si zofisye i osi idantifye okenn lerer dan detay en voter ki vin fer son lenspeksyon, sa zofisye i enform sa voter lo prosedir ki i bezwen fer. E tou remark i ganny de rikorde. Mon bezwen osi fer ou rapel Onorab ki ozordi avek sistenm lenformatik i annan en sistenm elektronik ki ou kapab verifye. E i servi *text* pou anvoy e *text* 9600 ki ou fer ou met ou limero *NIN*, ou anvoy lo sa limero *text* ki mon’n donner - 9600.

Koman ou anvoy ou limero *NIN*, ou pou ganny en larepons,

i pou dir ou, ou non, ou distrik ek ou detay si ou lo la. E si ou pa lo la *then* ou konnen ou annan en problem. Se sa ki mwan mon konpran i an legzistans ozordi avek *Electoral Commission*. Mersi Mr Speaker.

MR SPEAKER

Mersi VP. Siplemanter Onorab Gill?

HON CHURCHILL GILL

Mersi pou larepons. Parey ou dir depi 2013 ler en dimoun i vin verifye son non i sipoze ganny ekri fer konnen *outcome* letan in fini verifye. Si petet zofisye i kapab dir nou si sa pratik pe ganny fer? Akoz dimoun ki mwan mon’n koz avek dan distrik Baie Ste Anne, zot pa’n ganny okenn komunikasyon ki’n dir zot poudir zot non i *ok*.

Aprè dezyenm, dan lesans ki en dimoun i in vote zour eleksyon, son non pa lo lalis. Me selman in fer son prosedir in verifye son non i ti la, ki rekour sa dimoun i annan pou li kapab vote? Mersi.

MR SPEAKER

Onorab, ou dezyenm kestyon in al lwen, lwen, lwen avek kestyon ki lo *Order Paper* en? Silvouple, si... mon pou permet VP reponn. Selman si i pa donn

en repons ou a konpran se tou.
Vis-Prezidan.

VICE-PRESIDENT AHMED AFIF

Mersi bokou Mr Speaker. Mon antyerman dakor avek ou i pa vreman relevan. Me selman kekfw pou ed bann dimoun ki krwar zot annan en problem, avek ou permisyon mon a demann Mrs Max *from Electoral Commission* pou zis briyevman eksplike ki mannyer i marse.

MR SPEAKER

Byensir. Mrs Max, ou annan laparol.

CHIEF REGISTRATION OFFICER SHEENA MAX

Mersi Mr Speaker. bonzour tou dimoun. Onorab, apre ki en dimoun in soumet son laplikasyon pou li fer okenn tranzaksyon, i pas dan prosedir piblikasyon. Apre sa 7 zour piblikasyon, a dimoun an se moman la ki nou fer nou anvoy SMS. So, atraver SMS, nou enform sa dimoun poudir son prosedir in konplete e i kapab vin sers son let konfirmasyon.

E a sak fwa ki en dimoun i vin sers son let konfirmasyon, nou rikorde konmkwa sa dimoun in vin pran. Ouswa si en dimoun in pran lo son par rikord i ganny gard, konmkwa

sa dimoun i vin sers son let konfirmasyon, *ok ?* E sa i letan ki ou'n ganny sa let i enform ou poudir ou prosedir in konplete. E ou bann detay pou *feature on the next certified register*; sa i letan sa dimoun in fer son prosedir.

An term vote, letan en dimoun in al vote, letan en dimoun in al vote in fer son lenspeksyon avan. E si i arive letan i al vote i annan en erer ouswa i son non pa lo la, nou annan rikord ki nou garde, parey *VP* in dir pli boner nou gard tou rikord.

I annan sa *manual* ki nou'n ekrire. Me apre nou osi rikord li dan sistenm. Savedir si nou *go back* dan sistenm, nou vwar poudir be sirman sa dimoun i ti fer son lenspeksyon, tou keksoz ti annord, *then* sa dimoun i pou annan son drwa pou li vote. I pa pou ganny refize sa drwa pou li vote. Akoz i ti fer son responsabilite koman en sitwayen. Mersi.

MR SPEAKER

Mersi. Klarifikasyon Onorab.

HON CHURCHILL GILL

Pou sa rikord ki ou dir ou kite, eski sa rikord i ganny osi partaze ek parti politik oubyen i zis en rikord ki zis Biro Eleksyon ki kite? Mersi.

MR SPEAKER

Mersi. *VP*, oubyen Mrs Max, vitman silvouple. Mrs Max?

CHIEF REGISTRATION OFFICER SHEENA MAX

Sa rikord i en rikord entern. Savedir dan nou prosedir administrativman, i reste dan Biro Konmisyon Eleksyon. Sa lenspeksyon, tou rikord, tou lenspeksyon ki'n ganny fer i reste dan nou posesyon, i pa ganny partaze avek okenn parti politik. Me selman par kont letan sa dimoun pe fer son lenspeksyon i ganny enformen ki wi nou pe gard ou rikord pou nu fer sir ki tou keksoz i mars byen. Mersi.

MR SPEAKER

Mersi. Bon, pou rezon letan mon pou pran ankor en kestyon lo la. Onorab Pillay. Mon ti a kontan pas lo en lot kestyon apre. So, mon a pran ou kestyon.

HON SEBASTIEN PILLAY

Mersi Mr Speaker. Kestyon i *straight forward*. Lefe ki ou'n mansyonn sa sistenm verifikasyon *960 si mon pa tronpe, Eski zot rankontre okenn problemm avek sa sistenm, aköz parfwa i annan dimoun ki pe fer konplent.

E lefe ki *as* nou pe apros eleksyon, bokou plis dimoun pou pe servi sa sistenm. Eski problemm i avek *mobile carrier*, i avek sa sistenm menm kote ki annan sa problemm ki zot kapab sey rezourd li, pou fer ki ou pa ava ganny sa difikilte ki en pe dimoun pe rankontre sirtou ler ou annan en kantite dimoun ki pe vin ou sistenm pou demann sa verifikasyon?

E an pasan Mr Speaker, nou pa'n remersi *SFF - Seychelles Football Federation* osi pou *Beach Soccer*. Mon krwar nou'n bliye remersi zot. Mersi.

MR SPEAKER

Ok. Nou'n *VP* oubyen Mrs Max?

VICE-PRESIDENT AHMED AFIF

Mersi Mr Speaker. Mr Speaker, mwan mon'n fek sey 9600, mon'n met mon *NIN* mon'n ganny larepons deswit. Me selman mon pa konnen si i annan problemm avek sistenm, pou mwan in marse la. E avek ou permisyon Mrs Max petet i ava eksplike si zot annan okenn problemm teknik avek sa sistenm. Mersi.

MR SPEAKER

Sorry, mon ti'n konpran Mrs Max pou azout keksoz?

CHIEF REGISTRATION
OFFICER SHEENA MAX

Mersi Mr Speaker. Onorab, sa sistenm 9600 parey ou dir an mezir ki nou pe apros eleksyon, i annan bokou plis dimoun pe fer zot lenspeksyon ki sa nou apresye nou rekonnet e nou gard rikord osi sa bann lenspeksyon pe antre.

I annan lenstans kot i annan kliyan *Cable* ki pa pe ganny *issue*, *Airtel* i ganny *issue*. Me le moman ki nou *pick up* okenn sa bann *issue*, nou fer sir ki nou fe kontak neseler avèk *whoever* ki konsernen *DICT*, *Airtel* or *Cable* pou nou rektifye li osito ki posib. E i annan lesans osi kot si i annan *power cut* i kapab si i annan en kouran ki'n sote i afekte nou sistenm.

Me par kont parey mon'n dir osi to ki nou ganny enformen lo okenn konsèrn, nou fer sir ki nou rektifye li. Zis pou note osi ki nou menm nou *internally* tanzantan nou tyeke pou nou fer sir ki keksoz pe marse byen. Mersi.

MR SPEAKER

Mersi. Mersi Mrs Max. Mon ti a kontan pran ankò en kestyon avan nou pran poz. Donk, mon a remersi Mrs Max pou son partisipasyon. E an menm tan

ki o sorti mon ava envit *Hansard* Raporter pou apel *next* zofisye.

Bon, bonzour e byenveni Mrs Sheila Mohideen *Chief Secretary Public Service Bureau* ki'n zwenn nou pou kestyon ki konsèrn son responsabiltè. E kestyon limero 59, dan non Onorab Sylvanne Lemiel.

HON SYLVANNE LEMIEL

Mersi Mr Speaker. Bonzour tou dimoun a lekout. E bonzour *VP* avèk Mrs Mohideen. Mon kestyon i al konm swivan; Eski Minis pou Servis Piblik i kapab dir sa Lasanble ki zistans *PSB* in arive avèk revizyon *Public Service Order* oubyen *PSO*? Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED
AFIF

Mersi bokou Mr Speaker. Mersi Onorab. Dernyen edisyon *PSO* ki nou pe servi an se moman i date depi 2011. Zot a dakor ki depi an 2011 en kantite devlopman sanzman evolisyon in arive dan zesyon resours imen. Fodre note ki i napa en gran revizyon ki'n ganny fer avèk *PSO*, apar bann diferan lamannman ki'n fer par diferan sirkiler ki'n sorti kan ti neseler.

Donk, ti nesesit en revizyon konpreansiv *PSO*, e ver milye 2022 *PSB* ti komans en legzersis entansif pou revwar *PSO* dan son totalite. Pou note ki dan *PSO* i annan 12 gran sapit. E sa legzersis in revwar sak sa bann sapit enn par enn. Ver Oktob 2024, nou'n annan en premye *draft PSO* e nou ti sirkil avek tou bann Minister pou zot ganny bann komanter. Sa premye *draft* ti osi ganny soumet avek nou konsiltan legal pou verifikasyon.

An se moman nou dan prosesis analiz sa bann *feedback* ki nou'n gannnen, e fer lamannman nesaser. Apre sa nou pou re sirkil en dezyenm *draft PSO* avek nou bann partener dan sa prosesis konsiltasyon.

Nou pe anvizaze konplet sa travay ver lafen 3enm kar 2025. Lo komansman 4enm kar 2025 nou ava kapab lans nouvo *PSO*. E foudre note ki sa nouvo *PSO* i pou enn pli modern ki pran kont sa nouvo transformasyon ki pe ariv dan Servis Piblik anliny avek *result-based management*. Mersi bokou Mr Speaker.

MR SPEAKER

Mersi VP. Onorab Lemiel, ou siplemanter.

HON SYLVANNE LEMIEL

Mersi Mr Speaker. Mersi VP, pou sa larepons. E letan mon pe regarde, mon pa konnen si nou kapab al en pti pe petet dan bann revizyon mazer ki zot pe mazine fer dan bann seksyon. Ki seksyon? Zot in dir zot pe regard tou seksyon.

Petet mon konnen nou annan sa problem sirtou, letan ou konnen *allowances and things like that* bann dimoun i annan, eski sa osi aköz revizyon sa *PSO* i pou vin avek en logmantasyon dan Bidze bann Minister. Eski provizyon petet avek revizyon *PSO* ki pou vin an mars dernyen kar, bann laranzman in ganny fer ek bann Minister pou ki letan sa *PSO* i vin an aplikasyon zot pou kapab soutenir bidzeterman zot pou kapab soutenir li?

E apre mon ti a kontan konnen petet ki mwan ? Petet mon ti a kontan konnen osi ki mwan dan sa dernyen kar zot pe mazine lans sa dokiman? *Thank you.*

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, mon

krwar Mrs Mohideen i kapab reponn sa 2 kestyon lo bann diferan sapit e preparasyon an sa ki konsern kordinasyon avek Minister Finans lo depans. Mersi.

MR SPEAKER

Tre byen. Mrs Mohideen?

CHIEF SECRETARY PSAB SHEILA MOHIDEEN

Mersi Mr Speaker. Bonzour tou dimoun. Mersi Onorab, pou ou kestyon. Lo kote bann sanzman ki annan en kou bidzeter, nou'n fini fer en *summary*. E nou'n fini anvoy kot Minister Finans. E analiz pe ganny fer, e sa pou pran ont letan bann *ceilings* parey nou dir ki nou donn sak Minister.

Sa pou pran kont dan bann *ceilings* ki nou pe donn Minister. So, sa travay in fini ganny fer, e lenformasyon i kot Finans. Kan ki nou pe mazin lans *PSO*? Mwan mon'n dir dernyen kar... Onorab sa travay letan ou pe fer, mwan mon ti krwar i pou pran nou pli pti gin letan. Me solman sak fwa ou pas dan bann sapit i annan bann keksoz ki tanzantan ou vwar ou bezwen modernize, re aranze avek bann sityasyon ki arive.

E ou'n demande ki bann *major change* petet lo kote

performance management systems, dan *PSO* sa ki nou ti annan avan pa'n met bokou lanfaz lo *performance managements*. Sa i en sapit ki nou'n travay en bon pe lo la. E osi sapit kot i annan pou fer avek bann aksyon disipliner, nou'n vwar li sa *previous PSO* i ti en pe konplike dan lenplimantasyon.

So, ki nou pe fer nou pe sey senplifye li ki fer ki letan bann *HR* pou gannyen pou travay avek, i ava vin en travay ki en pe pli fasil. So, mwan petet nou ava target Novanm 2025 pou nou kapab lans *the PSO*. Mersi.

MR SPEAKER

Mersi Mrs Mohideen. Kestyon pou Onorab Henrie.

HON GERVAIS HENRIE

Mersi Mr Speaker. Bonzour *panel*. Mon kestyon i senp. Ler i ti vin prezant Bidze *Public Service Bureau*, savedir pou Bidze 2022 son ansyen Sef Mrs Jessie Esparon, ti dir problem mazer avek *PSO* se ki i pa en Lalwa, i en dekre, lepok ki in ganny fer. E ki dwatet ganny *convert into a law*.

So, aprezan kestyon ki mon pe demande se ki dan sa revizyon, eski i pou vi en Lalwa ouswa i pou reste koman en

dekre ki mannyer i ete ozordi?
Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi Mr Speaker. Mersi Onorab Deputy Speaker. Mrs Mohideen i a definitivman konfirm avek ou poudir nou pou anvi fer li dan term lezislasyon. Me petet ou kapab zis klarifye. Mersi avek permisyon Speaker.

CHIEF SECRETARY PSAB SHEILA MOHIDEEN

Mersi Mr Speaker. Mersi pou ou kestyon. Rezon aköz nou pe fer en konsiltan legal regard *PSO*, se aköz nou ti a kontan - sa i en propozisyon ki nou anvi fer avek *Cabinet* apre, pou nou fer li annan plis ledan pou li morde. E fer li vin en Lalwa.

E mwan personnelman koman *the New Chief Secretary* i enn mon target dan mon *plans and targets* ki mon'n mete, pou nou regarde ki mannyer nou kapab fer li vin en Lalwa. Me selman sa i ankor *still* bann diskisyon i nou pou bezwen fer avek *AG's Office as well* pou nou gete ki mannyer nou pou fer sa demars. Mersi.

MR SPEAKER

Mersi Madanm. Onorab Pillay ?

HON SEBASTIEN PILLAY

Mersi Mr Speaker. Eski Vis-Prezidan i kapab konfirmen kan eski nou Lasanble Nasyonal nou, nou pou ganny sans war bann revizyon ki'n ganny fer ek *PSO*, aköz i annan en lenplikasyon pou *ceiling* bidzeter ki nou sipoze aprouve. E pou nou regard perspektiv nou rol anver bann lorganizasyon statitwar osi.

E ki mannyer zot, zot in ganny enkorpoze dan *PSO* ozordi? Aköz nou pe koz Gouvernman la, enkli tou son bann satelit, tou son bann soz ki travay anba li.

So, kan eski nou pou ganny sans vwar sa? Aköz pou le moman nou pe tann dir poudir ver Desanm 2025 ki pou sa. Me selman i pou annan lenpak lo *ceiling* pou Bidze an 2026. So, i ava neser pou Lasanble konnen ki bann sanzman ki zot pe propoze anmennen. E ki lenpak sa pou annan lo bann travayer *going forward* lannen prosenn? Mersi Mr Speaker.

MR SPEAKER

Mersi Onorab. Wi, VP in montre lo Mrs Mohideen.

**CHIEF SECRETARY PSAB
SHEILA MOHIDEEN**

Ok. Mersi Mr Speaker. Onorab, letan nou pe fer sa legzersis - sa legzersis ki nou pe fer la nou'n ganny bann feedback avek nou konsiltan legal, nou pe zis repas ladan. Koman nou fini apre ki nou pou al dan sa konsiltasyon. E konsiltasyon i vedir ki nou pou sirkil *PSO* avek tou nou *stakeholders, including National Assembly, Judiciary* - tou pouvwar.

Akoz menm si ou annan bann lofis ki *constitutional*, i annan bann *employee* dan sa bann *constitutional office that are bann public officers*. So, zot osi zot bezwen vwar pou zot kapab donn nou *feedback*. E apre la ki nou pou finaliz sa. So, Lasanble osi pou ganny en kopi pou zot kapab fer zot komanter. Mersi.

MR SPEAKER

Thank you, Madanm. Onorab Georges?

HON BERNARD GEORGES

Mersi Mr Speaker. Mr Speaker, mon oule remersye *Leader* Lopozisyon pou son kestyon. Kan nou pou ganny en sans vwar sa travay? Akoz mon mazine i pe mazine ki se nou lo sa kote latib ki pou ganny sans vwar sa travay...

(APPLAUSE)

HON BERNARD GEORGES

Apre Septanm 2027, mon pa war en gran kantite zot lo lot kote latib. Mon kestyon Mr Speaker, i senp. Eski Vis-prezidan oubyen *Chief Secretary* i kapab ed mwan avek en pti keksoz, ki'n en pti ep trakas mwan depi en pe letan. *PSO* sirtou lo bann seksyon disipliner, i *basically* Lalwa Lanplwa pou bann *public servants*.

Me i annan en kategori dimoun, en kategori travayer ki *public servants in one sense*. E pa *public servants in another sense*. E mon pe mazin bann antite endepandan parey *SBC* eksetera. E nou vwar tanzantan, eski zot swiv *PSO*, oubyen eski zot swiv *Employment Act* ler i annan en problemm disipliner?

E sa in toultan en pe en konfizyon. Eski Vis-Prezidan avek *Chief Secretary* i kapab konfirman ki dan sa revizyon *PSO*, zot ava antreprann sa size pou fer sir ki napa sa diferans, napa sa konfizyon lo anba ki Lalwa ki devret ale. Me i ava annan en *seamless operations*. Mersi.

MR SPEAKER

Mersi Onorab. Vis-Prezidan?
Wi, *Chief Secretary*.

**CHIEF SECRETARY PSAB
SHEILA MOHIDEEN**

Mersi Mr Speaker. Onorab, sa ki ou pe dir nou osi tou nou ganny en pe difikilte, akòz nou pa'n vreman definir *public officer*. *What is a public officer?* Nou'n koz *public office*, me selman nou pa'n defini. E sa i en travay ki nou pe fer pou nou kapab fer sir ki letan nou pou annan *the new PSO*, i pa pou *up to interpretation*.

I annan osi lezot seksyon dan *PSO* ki annan de ler lenterpretasyon parey nou dir i *up to interpretation*. I annan dimoun i enterpret dan en fason, en lot dimoun i enterpret dan lot fason. So, sa i en travay ki nou pe fer. Me selman pou le moman bann *state-owned entity* zot swiv plito Lalwa Lanplwa. E bann lezot antite ki zot, zot ganny zot reveni anba *Consolidated Fund*, zot tant pou swiv *PSO*.

Me selman annandler ek Lanplwa, *PSB* ek Lanplwa ou bezwen diskite letan i annan bann *case*. Eski i pou al kot *PSAB* ouswa si i pou al kot *Employment Tribunal*? E nou oule tir sa bann konfizyon letan nou travay dan sa nouvo *PSO*. Mersi.

MR SPEAKER

Mersi *Chief Secretary*. Bon mon a *stretch* en pti gin pou pran kestyon Onorab Bijoux.

HON GERARD BIJOUX

Mersi Mr Speaker. Mr Speaker, mon ti a kontan demann Vis-Prezidan oubyen zofisye *PSB*, eski zot pe pran kont bann dimoun bann *public servants* ki pe on *shift*, akòz letan ou regard sa *PSO* sirtou sa versyon 2015 laplipar i pe konsern ziz bann 8 to 4. Akòz letan ou regard par egzanp ki mannyer pou rann *PH*, *Public Holidays* and *whatnot*, akòz mwan mon'n deza ganny en pti pe diskisyon lo la, nou pa ti konnen si fodre al kot *Employment Act* oubyen *PSO*.

Alors, mon pe zis regarde si ler sa nouvo versyon i fer i zot pou regard en pti pe kondisyon bann travayer ki travay *shift*? Mersi.

MR SPEAKER

Mersi. Vis-Prezidan?

**VICE-PRESIDENT AHMED
AFIF**

Mersi Mr Speaker. Avek ou permisyon petet *Chief Secretary* i kapab elabore lo la. Mersi.

MR SPEAKER

Chief Secretary, wi, silvouple.

**CHIEF SECRETARY PSAB
SHEILA MOHIDEEN**

PSO i fer provizyon pou tou kalite employment, *ok? Full-time, part-time*. E tou kategori ki ganny rekonnet dan Lalwa Lanplwa i osi ganny rekonnet anba PSO. E si petet sa ki ou pe dir i annan konfizyon, *when it comes to* bann peyman, bann *shift workers*, mon ava, i en pwen ki mon a note. E mon ava fer sir ki letan nou e regard PSO *when it comes to refund*.

Me selman sa i *dictate by the Employment Act, by the Employment Law*. I sipoze *straight forward*, me selman mon a note e nou ava regarde ki nou fer sir ki letan nou fer sa revizyon, sa i ava en pwen ki mon a pran konsiderasyon.

E parey mon'n dir oparavan, nou pou osi sirkil PSO avek tou nou bann *stakeholders*. So, si i annan bann lezot pwen. Ouswa zot pa bezwen esper nou sirkil PSO. Si i annan bann lezot pwen ki zot santi i pertinan ki zot le letan nou pe fer sa travay nou zet en koudey lo la, pou nou fer sir ki i kler dan nou nouvo PSO, mon ava demann bann MNAs aköz bann Minister nou'n fini anvoy kopi. Mon ava demann zot pou fer nou gannyen ki nou kapab

travay lo la. E fer sir ki letan nou anvoy sa dezyenm *draft*, tou bann pwen pertinan in ganny adrese. Mersi Mr Speaker.

MR SPEAKER

Mersi.

HON SEBASTIEN PILLAY

Mr Speaker, i annan en konfizyon ki nou...

MR SPEAKER

Nou'n termin avek keştyon. Ki pwen konfizyon ou oule mete?

HON SEBASTIEN PILLAY

Mr Speaker, VP dan son larepons in mansyonn PSO versyon 2011. Onorab in demann en keştyon in dir PSO versyon 2015. E VP in dir zot pe servi Gouvernman pe servi versyon 2011. So, pou benefis bann travayer deor *panel* i bezwen konfirman lekel versyon ki zot pe servi. Si i annan en versyon 2015 oubyen si i annan en versyon 2011.

An prenon kont ki dimoun pe ekoute, aköz dimoun i swiv kwa ki pase dan PSO. Dan labsans sa Mr Speaker, sa i montre ou aköz LDS pa kapab retourn o pouvwar ankor.

MR SPEAKER

Mersi Onorab.

HON SEBASTIEN PILLAY

Mon ti anvi dir sa. I enportan pou dir sa Mr Speaker.

MR SPEAKER

Ok. Onorab ou osi ou anvi eklersi en pre... wi?

VICE-PRESIDENT AHMED AFIF

Mersi Mr Speaker.

MR SPEAKER

Not... VP ou oule reponn sa enn premye? Ale.

VICE-PRESIDENT AHMED AFIF

Mr Speaker, mwan mon'n fer en referans avek 2011. E se sa PSO ki nou pe servi, an 2011. Mwan mon pe fer larepons ki mwan mon'n donnen, i 2011. Mersi bokou.

MR SPEAKER

Onorab Lemiel, mon sipoze ou pa ti pou lev ou lanmen si a ti en pwen enportan.

HON SYLVANNE LEMIEL

Mr Speaker...

MR SPEAKER

Menm si nou'n fer *full round* kestyon... met ou pwen.

HON SYLVANNE LEMIEL

Mr Speaker, i zis en pti klarifikasyon. Letan lo dernyen kestyon Mrs Mohideen in nonm nou kapab anvoy nou bann pwen, ou koman Manm Lasanble. Me nou, nou pa pe konnen egzakteman kwa ki annan dan sa dokiman.

Eski nou pou ganny en kopi sa *draft*, prezan ki nou a kapab anvoy nou bann pwen? Sa ki mon ti oule demande.

MR SPEAKER

Mon krwar sa ki in dir. Mrs Mohideen, ou a konfirm pozisyon silvouple.

CHIEF SECRETARY PSAB SHEILA MOHIDEEN

Mr Speaker, i posib pou nou sirkil *draft*. E sa mon ava fer letan mon sorti isi. Mon ava anvoy li kot Clerk, apre Clerk i ava sirkil avek zot. E nou *welcome any comments*. Mersi Mr Speaker.

MR SPEAKER

Mersi. Mersi *Chief Secretary*. Mersi Vis-Prezidan, pou repons lo sa kestyon ki mon asire i konsern bokou travayer dan Sesel. Nou a pran poz, e nou a rebran 11er. Mersi.

(BREAK)

MR SPEAKER

Mon a swet byenveni e dir bonzour nou bann nouvo zofisye Mr Jeffrey Dogley Direkter Zeneral *Seychelles Communication Regulatory Authority* e Mr Patrick Moustache Direkter *Regulatory Affairs* menm Lotorite. E zot isi pou zwenn nou pou 2 kestyon. Nou'n ariv lo kestyon 60, Onorab Egbert Aglae.

HON EGBERT AGLAE

Mersi Mr Speaker. Kestyon i konm swivan;

Eski Vis-Prezidan i kapab dir ek sa Lasanble si *Starlink Company* in apros Sesel pou ofer servis *internet*? Mersi.

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Onorab nou Gouvernman pe touzour travay etidye meyer fason pou kontinyelman asir meyer e fasilite en pti abordab pou servis *internet* dan pei. E dan sa bann analiz nou'n touzour bezwen balans tou bann posibilite avan ki nou pran en desizyon.

E pou reponn sa kestyon, ti an 2022 ki Lakonpannyen *SPACEX* e non pa *Starlink* Onorab ti soumet en

laplikasyon formel pou zot ofer servis *internet* par satelit isi atraver *Starlink*. Me depi sa nou'n etidye byen sa laplikasyon e fer bann analiz tre detaye lo lenpak larantre *Starlink* dan sa sekter.

E koman en Gouvernman responsab, nou'n analiz premyerman kontribisyon ki Sekter Telekomunikasyon aktyel pe fer dan nou pei an term reveni, koleksyon taks, lanplwa, lenvestisman, *dividend* ki Fon Pansyon i osi envestir dan sa sekter. E *dividend* ki Gouvernan li i pe anmase koman envestiser dan kab fib optik soumaren ki apel *SEAS*.

Nou'n analiz lenpak ki pou annan si nou les *Starlink* e *SpaceX* antre ler nou pran konsiderasyon ki sa lakonpannyen pa neseserman pou annan en baz fizik Sesel. Ki sa i vedir? Inevitableman, pou annan Seselwa ki pou perdi zot travay. Pou annan en *tax* ki sa sekter ki pe kontribye ki kapab redwir par de dizenn de milyon rounpi.

E pou annan pert e rediksyon dan rannman lo lenvestisman. E pou annan pert dan *dividend* pou Fon Pansyon, *dividend* pou Gouvernman. E i osi montre poudir i kapab annan deviz etranzer an plis ki

pou kit pei an rezilta sa okenn tranzaksyon atraver en tel mekanizm.

E deplis lefe ki sa lakonpannyen pou napa en prezans fizik probableman Sesel, nou koman en Gouvernman, nou pou napa kontrol lo ki kalite servis Seselwa pe ganny ofer. Nou pou napa kontrol lo si sa endividi pe rod en rekour avek servis ki i pe gannyen. Nou pou napa kontrol pou regilariz servis sa operater, parske bokou i *online* ou fer li ou menm ou pa fer li atraver personn isi. E ou fer vin ou prop *dish*.

Pli enportan ankor si sa operater i decide koup sa servis ki i pe ofer, sa osi i pou koz en lot problem si ou konpetiter prezan ki li prezan i nepli alaoter. E pou annan en lenteripsyon dan tou sekter nou pei. E son lenpak Mr Speaker, i kapab vin grav.

Me malgre tou sa defi Gouvernman in toudmenm apresye sa kalite servis *internet* ki *SpaceX* pe ofer sirtou and Sekter Maritim. E se pou sa rezon ki an se moman i pe les zot ofer sa servis limite ki baze lo en Polisi apel *Starlink Policy*. E anba sa Polisi, *Starlink* i kapab ofer servis *internet* avek bato, avyon e tou bann Zil Pros e elwanye parey *Fregate*, *North*

Island, *Bird*, *Aride*, *Denis Island*.

Tou litilizasyon lo Mahe, Praslin e La Digue ek Silhouette i reste limite anba kondisyon strik pou le moman.

Mr Speaker, on konklizyon Gouvernman pou le moman lo *Starlink* e ki malgre i annan son benefis konpetisyon posibleman, nou pa kapab inyor sa risk ekonomik finansyel, sekirite ek souvrennte nasyonal.

Me toudmenm nou reste angaze pou kontiny sa travay avek Sekter Telekomunikasyon, pou amelyor servis an term aksesibilite e pou vin pli abordab. Mersi Mr Speaker.

MR SPEAKER

Mersi Vis-Prezidan.
Siplemanter Onorab.

HON EGBERT AGLAE

Mersi Vis-Prezidan pou ou larepons. Vis-Prezidan, etanndonnen ki le 5 Me *Airtel Africa* ki enn nou *service provider* isi Sesel li si an sa 14 rezo ki li i annan lo nivo Lafrik, in siny en lagreman dan en sans en lagreman ekonomik pou zot partner avek *Starlink*, atraver *SpaceX* son *main company*, eski i pou annan en lenpak anvi ki i annan prezans *Airtel* Sesel - eski i pou annan

en lenpak lo sa kalite lagreman ki zot in fek fer la, pou kapab anmenn sa servis ki pou konzwentman avek *SpaceX* li menm?

E dezyenmman, *rightly said* VP dan enn nou bann *meeting* ki ou ti fer miting piblik ki ti fer an Me 2023 Glacis, ou ti dir poudir Gouvernman pe fer lanaliz lo sa *request* ki *SpaceX* pe fer, e pou le moman zot pe *operate* dan sa ki nou apel *the Boating Sector* Maritim, eski zot in osi fer en analiz dan sa laliny pou gete si i pe marse ?

E ou'n nonm en konponan ekonomik, petet ki benefis sirtou avek *outer island* ki zot rezo *internet* pa pe ganny kapte kot i konsern lo nivo Mahe li menm li *main island*.

Eski zot in fer analiz pou vwar ekonomikman osi ki sa pe anmenn pou sa sekter li menm? Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. E mersi Onorab. Onorab, mon krwar ou premye pwen lo bann partenarya ki *Starlink* in fer avek *Airtel* dan Lafrik, i relevan pou nou, akòz i montre ou sa dinamiz ki egziste dan sa

sekter. Savedir bann lakonpannyen ki tradisyonnelman in depan for lo bann sistenm telekominikasyon atraver laliny, kab soumaren eksetera.

Zot, zot in vwar i annan en lavantaz; mon mazine i annan en lavantaz zot in vwar pou zot vwar en partenarya pou servi lot teknolozi ki plito baze lo satelit. E se sa dinamiz ki nou, nou kontinyelman met regar lo la, fer sir ki tou dimoun i konfortab dan lafason zot lenvestisman pe ganny zere.

Parske si demen sa bann lakonpannyen ki *Starlink* pe fer *partnership* avek, zot santi poudir i annan benefis pou zot, posibleman i vdir ki zot in vwar serten landrwa ki difisil pou zot pas kab. E ki atraver sa koneksyon ek *Starlink* pou zot i mars byen.

Alor, nou espere atraver sa dinamiz ki zot annan, zot a osi regard bann posibilite ki pou annan Sesel e zot ava apros nou parey zot pou toultan fer poudir nou vwala en partenarya ki zot ti a kontan nou konsidere.

E nou toultan ouver pou nou konsider bann lenvestisman. Pou nou sa ki enportan se ki nou defann sa sekter isi, nou defann zot lentere. Parske se zot ki anploy

Seselwa. Se zot ki'n met an plas bokou de santenn milyon rounpi dan lenvestisman teknolozi e lenfrastruktir Sesel zot in mete.

E nou pa ti a kontan sa i perdi. Nou pa ti a kontan *job* i perdi, nou pa ti a kontan reveni an deviz etranzer ek *tax* ki ganny peye Sesel i perdi. So, nou, nou pou kontinyelman an konsiltasyon avek zot enkli lakonpanyen lokal pou nou fer sir ki sa ki nou finalman annan i en prodwir ki Seselwa i satisfè avek.

I pa zis en prodwir, me i en pri e valer pou larzan ki Seselwa i satisfè avek. E si zanmen demen *Airtel* i oule al dan sa direksyon, nou, nou ava koz ek li nou a travay dan en fason pou konnen ki mannyer nou kapab fer sa pou minimiz lenpak lo lanplwa; minimiz lenpak lo reveni, minimiz lenpak lo deviz. Mon krwar sa pou enportan pou nou. Me selman nou reste tou sa bann keksoz avek en regar en pe ouver.

An sa ki konsern benefis ki nou pe vwar ziska konmela, mon mazine benefis i pou plito pou bann diferan konsonmater ki pe servi sa servis. E mon krwar tou bann *feedback* ki mwan mon'n gannye se zot satisfè. Sirtou si ou ti lo en zil ki elwanye ki napa prezans okenn operater lokal lo sa bann zil. I

landrwa kot napa konpetisyon e parske kab pa arive ziska laba. *Microwave link* pa arive, i ariv ziska Praslin, ziska La Digue. Be i pa arive ziska *Desroches*, *Amirante*, *Farquhar*, *Cosmoledo*, Asonpsyon eksetera. I pa arive laba.

Alor dan sa bann landrwa, e menm *Ile Denis* ki 45 mil ek isi en prezans *Starlink* i edan dan zot ka, aköz sa konpetiter lokal pa pe ouver sa servis oubyen i pou en pri vreman o. Alor pou nou dan sa bann landrwa nou vwar en benefis pou zot. Nou vwar bann benefis pou bann bato ki'n demann servis. E nou osi nou'n demande.

atraver *Coast Guard* nou annan. Nou annan serten nou bann bato ki pe servi zot satisfè ki ozordi avek sa lenvestisman, i donn zot keksoz ki zot ti napa apard bann kominikasyon radyo - *high frequency* eksetera ki zot ti ep servi sa letan.

Be la avek kominikasyon *Starlink* definitivman i donn en amelyorasyon sibstansyel lo kalite servis ki zot kapab ofer. So, wi, benefis i annan lo en kab limite dan serten landrwa kot napa sa konpetisyon. Me byensir nou reste touzour alert pou regarde ki mannyer ou kapab permet sa dan en landrwa kot i deza annan konpetisyon, me ki kapab

annan en lenpak ekonomik.
Mersi Mr Speaker.

MR SPEAKER

Vitman silvouple, klarifikasyon
Onorab.

HON EGBERT AGLAE

Yes. Mersi VP. VP, eski ou pa
krwar vi ki ou'n dir poudir i
annan en nesesite dan sa
konteks lamarin, petet pou
konsider en *conditional license*
petet as pou li *operate* pa *inland*
me dan sa sekter laba ki pe
provide sa servis ziskan ki en
zour nou koman en pei nou
bann *service provider* ki lokal
ater, i kapab petet kouvert bann
rezo ki an deor lezot zil? Mersi.

MR SPEAKER

Wi, VP?

**VICE-PRESIDENT AHMED
AFIF**

Mersi Mr Speaker. Me mon
krwar sa ki nou pe dir i menm
zafer. Nou pe permet *Starlink*
pou *operate* lo bann Zil Elwanye
Sesel. Zot pe gannnen
permisyon lo en *case-by-case*.
Nou pe donnen permisyon pou
avyon, nou pe donn permisyon
pou bann bato ki le servi sa zot
kapab fer deza.

MR SPEAKER

Thank you. Onorab Labrosse.

HON RICHARD LABROSSE

Mersi Mr Speaker. Dabor mon a
dir bonzour VP ek ou
delegasyon. Bonzour tou bann
koleg e tou dimoun ki a lekout.
Mr Speaker, letan mon'n ekout
VP larepons ki in donnen
konsernan *Starlink* pou donn
en servis *internet*, mon kestyon
ki'n vin dan mwan, ozordi dan
Sesel i annan plizyer
lakonpannyen ki pe ofer sa
bann tel servis parey.

Eski Vis-Prezidan i kapab
enform Lasanble Mr Speaker,
atraver ou, si i annan okenn
travay ki son Minister oubyen
Gouvernman in fer pou
regardan sa bann servis sa
bann operater ki nou annan
dan pei ozordi, ler nou pe koz lo
kote pri ki bann dimoun pe
peye. E osi son *speed* parey nou
dir son servis ki zot pe donnen?
Mersi Mr Speaker.

MR SPEAKER

Thank you. VP?

**VICE-PRESIDENT AHMED
AFIF**

Mersi bokou Mr Speaker. E
mersi Onorab. Wi, Onorab,
mon krwar i annan merit dan
sa ki ou pe mazin lo la, se nou
pe koz lo fer sir poudir nou
ganny valer pou larzan. E tou
dimoun i pe peye ozordi dan sa

sekte. Nou pe osi an menm tan mazin protez serten lenvestisman, protez travayer, protez larzan *tax*.

Me nou osi pran kont ki Sesel i en pti lekonomi. E ler mon dir en pti lekonomi, mon pe konpar nou par egzantp avek Moris ki dizon i kapab apepre 14 fwa nou groser. E - me selman pou ou met en kab pou konekte Moris i pou preski menm pri avek en kab pou ou konnekte Sesel. Me selman ou annan 14 fwa plis dimoun ki pou pey sa kab.

Alor, sa ki zot petet zot kapab fer oubyen lot pei ki annan de dizenn milyon dimoun i kapab fer, i pa neseserman menm keksoz ki ou kapab fer, aköz ou annan mwens dimoun pou pey pou en teknolozi ki diferan avek sa ki pou *Starlink*. E otan ki zot pa ankor fini pey sa bann lenvestisman ou anmenn en konpetisyon ki anpes zot kapab ganny rannman lo sa lenvestisman i pou vin en faktè enportan.

Me selman pou retourn lo ou kestyon, eski i kapab fer en diferans dan pri finalman pou konsonmater Sesel? Posibleman wi, me selman nou osi okouran poudir sa bann ler ou pe kalkil sa pri ki dizon *Starlink* ti pou donner vizavi sa

ki lakonpannyen lokal i kapab donner, fodre ou osi mazin lefe ki pou zot avan ou kapab ganny zot servis, ou bezwen al envestir dan serten lenfrastruktir kot ou pe al enstale ou pe al servi.

Par egzantp si i pou kout ou, ou bezwen aste *dish*. Ou bezwen met en bann lenstalasyon ki ou peyman avek en lakonpannyen lokal ou pa pou bezwen pou zot anmenn en kab ziska kot ou, *fiber optic* ziska kot ou, i konekte ou. Napa en gran koneksyon enstalasyon tandis ek pou zot i pou annan.

Me wi, mon mazine s sa bann *feedback* ki nou gannyen, se sa lavites ki zot, zot kapab donner, i pa neseserman parey avek lavites ki ou kapab gannyen avek en fib optik avek kab soumaren ki bokou pli vit. Parske sinyal pe pas ater, lot sinyal pe pas dan ler oter tre o.

Me selman a lafen dizour mwan mon krwar nou la pou nou balans sa 2 keksoz. Valer pou larzan pou Seselwa, rannman lo lenvestisman, *job* Seselwa e larzan taks e deviz etranzer. Nou bezwen balans tousala ansanm. A lafen dizour nou krwar Sesel i pou toultan dezavantaze, kot i konsern pri pou son *internet* parske i annan en pti marse. I annan en pti marse konpar avek bokou plis pei. Me selman sa bann

operater zot osi e nou toultan lans sa lapel avek zot ki zot osi zot bezwen reste konpetitiv.

Se pou sa rezon, nou'n permet ki bann diferan operater i annan plizyer kab soumaren Sesel ozordi nou konnekte koman en 3 ; De ki Gouvènmman i annan par ladan atraver lakonpanyen ki apel SEAS. E lot se *Intelvision* ki annan son prop kab. Alor, nou annan 3 kab ki konekte nou ozordi.

Me selman nou pou la toultan pou fer sir poudir valer pou larzan i ganny regarde koman en kriter enportan pou Seselwa. Me an menm tan nou bezwen protez *job*, protez *tax* e protez lenvestisman. Mersi bokou.

MR SPEAKER

Mersi. Bon letan pe pase mon a pran keston Onorab Pillay. Silvouple bref.

HON SEBASTIEN PILLAY

Mersi Mr Speaker. Mr Speaker, mon kontan sa *shift* dan les pri VP kot nou'n realize poudir ou pe dir poudir pri internet Sesel pou toultan o. *That was in the case 2015/2016* kot nou ti *freeze* Bidze *DICT* akòz pa ti pe kapab fer desann pri *internet*. *But be that as it may* Mr Speaker, largiman prensipal VP

i baze i en lagreman ekonomik. Ler mon'n ekout VP i annan bann diferan fason ki Gouvènmman i ganny reveni *from bann traditional* - annou apel sa bann ...*mobile carriers*. *License fees* ki zot peye, lanplwa ki zot peye, *PIT* atraver zot bann travayer. Me selman nou'n donn zot bann konsesyon lo lenvestisman ki zot pou fer ki nou apel sa *accelerated amortization*.

Ler nou regard bann lezot sistenm kot sa *Starlink* i ganny entrodwir in fors bann *mobile operators* pou zot investir dan lezot teknolozi pou fer bann kliyan pou zot reste konpetitiv. So, mon konpran ou largiman. Me ki mannyer zot, zot pe balans sa avek largiman ki konpetisyon i en keksoz ki neser, pou fer ki sa bann *carrier* ozordi pa santi zot sitan konfortab akòz zot annan en *chunk of the market*.

Me zot pa pe neserman donn konsonmater sa servis ki konsonmater i bezwen - sirtou si ou pe dir mwan poudir pei i le al ver bann teknolozi parey *AI*. Nou pe entrodwir bann *Virtual Assets Management System* - nou deza en ziridiksyon kot i annan bann *crypto currency traders* ki anrezistre Sesel.

So, ki mannyer ou pe balans li avek sa? Mon konpran bann *rural zones* bann *areas* ki napa *coverage*. Sa bann operater i zis enstale. Kwa ki ou pe fer pou dir, be *ok*, *Starlink* i kapab vini me ou pa pe ofer sa servis alaoter. So, *what are the mobile carriers* ki zot pe dir ek Gouvernman? Eski zot pare pou fer sa lenvestisman? Akoz Gouvernman in donn zot sa *incentives* pou fer li. Mersi Mr Speaker.

MR SPEAKER

Mersi VP. Nou a sey bref silvouple.

VICE-PRESIDENT AHMED AFIF

Mersi bokou Mr Speaker. Mr Speaker, sa ki mon kapab dir avek Onorab lo son premye pwen, se ki sa bann pri ki ou ti war 2015 ozordi i bokou, bokou pli ba ki i ti ete. Ozordi, ou pa pe pey *internet* baze lo *Giga bite* neseserman. Ozordi i annan *unlimited packages* ki pa ti egziste sa letan. E sa in redwir pri *telecom* konsiderableman.

Alors, sa Gouvernman in fer en kantite pou redwir pri *telecom* dan sa pei.

Dezyenmman, an se ki konsern konpetisyon. Konpetisyon i en keksoz ki bon. Me selman parey mon'n dir nou

bezwen toultan fer sir poudir nou pe ganny valer pou larzan pou larzan. E parey ou'n nonmen, i enportan ki zot pa santi zot konfortab pou zot pa envestir.

E bann operater a tou moman ot in eksplik nou, zot in fer zot ka devan nou ki mannyer lenvestisman dan zot sekter i sitan frazil. Akoz i frazil? Akoz zot dir ou zot envestir dan en teknolozi ozordi ki kout de dizenn milyon rounpi. Me dan 2an sa teknolozi i nepli valab, i nepli tenir, bann nouvo teknolozi ki bezwen re al depans ankor de milyon de dizenn milyon rounpi.

Alor, sa i en domenn ki en pe konpleks. E nou, nou bezwen i pa neseserman annan tou eksper ki kapab fer sa. Me nou ganny asiste dan plizyer lokazyon pou nou travay ek bann eksper enternasyonal pou ed nou kapab tonm lo en konklizyon lo bann largiman ki ganny mete devan nou an term konpetisyon.

E nou pou toultan, nou pou toultan balans sa balans i difisil. Nou pou toultan balans sa bezwen pou annan meyer pri, meyer valer azoute. Me an menm tan balans li kont reveni ki pei i bezwen gannyen. E ki lanplwa ki nou bezwen garde, *skill* ki nou bezwen garde dan

Sesel, deviz ki nou bezwen garde dan Sesel e rannman lo lenvestisman. Mersi bokou Mr Speaker.

MR SPEAKER

Mersi Vis-Prezidan. Nou avans lo lot keştyon 61 Onorab Egbert Aglae.

HON EGBERT AGLAE

Mersi Mr Speaker. keştyon i konm swivan; Eski Vis-Prezidan i kapab dir ek sa Lasanble si Departman Telekomunikasyon in etanm en letid pou vwar bann landrwa ki annan *poor coverage* pou amelyor servis an zeneral? Mersi.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Wi, Mr Speaker, *Seychelles Communication Regulatory Authority* i fer bann letid *coverage* ki zot apel sa pou bann rezo mobil atraver bann *survey* teknik, ki baze lo bann regilasyon pou kalite servis oubyen *Quality of Service Regulations*.

Sa bann letid i ganny fer lo en baz regilye. Oubyen letan i annan en bezwen pou mezir

kalite servis mobil dan pei. E rezilta sa bann letid, i ede gid regilater pou li amelyor servis pou konsonmater atraver son regilasyon. Mr Speaker, nou bann letid i montre ki koman en Pti Leta Zil parey Sesel nou fer fas avek bokou defi pou kapab fourni servis mobil atraver nou teritwar an antye.

Premyerman, topografi nou pei sa bann montanny, vale, i fer nou pou toultan annan sa ki nou apel bann *blind spot* bokou plis ki serten bann lezot pei, kot ou annan bann gran plato. Pou nou i pa parey. E pou nou sa bann baryer sa bann baryer natirel e zot blok sinyal. Nou osi nou vin avek sa i vin avek bann kou lenstalasyon pou kapab sirmont sa bann baryer.

E sa bann lenstalasyon en *base station* par egzannp ki ou mete dan en landrwa i kapab kout an R3 a 7 milyon pou a operater. E ler nou pe rod konstri plis lenfrastriktir nou pou bezwen pran kont limitasyon later osi. Ou pou al met en *tower* dan en landrwa, me selman i annan en landrwa rezerv oubyen alter prive ki laplipar letan operater i bezwen negosye.

E osi par ler nou pe koz konstriksyon semen zis pou ariv dan sa landrwa pou met sa.

E sanmenm sa, sa bann kou i eleve. An plis nou bezwen pran kont lenportans proteksyon lanvironnman. Alor, okenn lenstalasyon nouvo lekipman oubyen konstriksyon nouvo lenfrastruktir i vin avek letid lenpak lanvironnman. Pa zis pou sa *tower*, me sa semen pou ariv laba ki souvandfwa i difisil.

Onorab, nou osi annan rezistans parfwa avek Manm Piblik akòz zot per annan lenfrastruktir o bor zot. E zot vwar sa koman enn koman en *eyesore*. E menm ki annan en persepsyon ki i annan radyasyon e misyon pou zot dan zot lespri i kapab afekte zot lasante. Sa i en realite sa, person pa anvi en *tower* o bor li. Person pa anvi en *tower*.

E zot pou dir zot per radyasyon. Me selman sa ki nou, nou vwar ziska konmela an term letid. Ou pa pe war keksoz ki montre spesifikman poudir sa radyasyon, sa nivo ki sorti kot bann lakaz i ete i neseserman o. Me selman dimoun i per, sa i normal le ou war en gro lenfrastruktir o bor ou.

Tousala se bann kontrent ki nou fer avek. Toudmenm koman en Gouvernman nou kontinyen rod solisyon pou asire ki nou popilasyon an antye i konnekte avek rezo

mobil. Alor, nou'n pran serten mezir tel parey. Enn, bann operater i partaz zot fasilite pou evit proliferasyon lema ki pa neseser.

Alors, si ou annan dan en semen dan en landrwa ou annan en lema nou ankouraze ki zot partaz sa lema. Zot tou zot vini zot met zot bann lekipman lo la. Dezyenm dan bann *zone* izole zot annan bann pti *cell* ki ganny enstale pou amelyor kolektivite san bezwen al enstal bann gro lema.

E tou nouvo lenfrastruktir i bezwen respekte standar teknik, kalite sekirite ek lanvironnman. E okenn vyolasyon i kapab anmenn bann penalti finansyel.

Vwala Mr Speaker, malgre sa bann defi, nou Gouvernman avek bann operater pe kontinyelman esey agrandi sa rezo mobil. E amelyor zot servis pou benefis tou Seselwa. E osi nou konnen bann viziter avek bi pou nou fer sir ki sa servis i vin pli abordab e aksesib. Mersi bokou.

MR SPEAKER

Mersi. Siplemanter Onorab Aglae.

HON EGBERT AGLAE

Mersi VP, pou ou larepons. VP, etandonnen ki teknolozi in

vreman avanse. E ou'n nonm en parti ladan kot i annan bann lezot bann pti *cell* ki kapab ganny mete. Parey osi dan lakaz kot letan ou annan *WIFI* i annan bann *booster point* ki ou mete, *ok* ?

Letan mon'n kalkile resers ki mon'n fer lo Mahe li menm, sirtou mon pe koz ou sa bout depi Les, Sid Was i annan apepre 8 pwen kot ou annan bann pwen kot ou pa ganny *network* byen, *ok* ? E ozordi osi kantite etranze ki vin Sesel zot servi a ki nou apel *Google map* pou zot direksyon, *ok* ?

Letan ou annan landrwa kot ou napa *coverage* i vin en problem pou zot. Sirtou parey si ou pou al dan Lentandans anba laba ou pa pe gannnen. Port Glaud osi Sans Soucis Bel Air bann landrwa koumsa. So, eski baze lo sa letid ki ou dir zot bezwen fer tanzantan, Departman *DICT* zot in asiz ek sa bann *service provider* osi pou regarde ki mannyer pou vwar a lavenir pou zot kapab kapte sa bann pwen ki pe perdi lo rezo vin avek nouvo tekno...

Pa tou landrwa ki ou pou bezwen sa *big cell tower* parey ou pe dir. I annan bann pwen ki kapab ganny mete pou *boost up* sinyal. Eski zot annan sa konversasyon pou war bann pwen ki pa pe ganny kapte pou

kapab a lavenir vwar ki i ava ganny bann *coverage* ki nesese ki nou tou nou a *happy*? Mersi.

MR SPEAKER

Mersi. *VP*?

VICE-PRESIDENT AHMED AFIF

Mersi Mr Speaker. Onorab, mon krwar i pa pou toultan fasil pou kouver tou sa bann landrwa ki nou apel sa bann *blind spot*. Me avek ou permisyon Mr Speaker, mon a permet ki bann manm teknik SCRA kekfwa zot dan zot travay zot kapab donn en pti pe plis leklersisman lo kwa ki pe ganny fer pou nou kouver maksimonm ki nou kapab. Mersi.

MR SPEAKER

Mersi. Lekel ki pou pran laparol? Direkter Zeneral, Mr Dogley.

DG SCRA JEFFREY DOGLEY

Bonzour tou dimoun. Bonzour Onorab. Mersi pou ou kestyon. Definitivman parey ou'n vwar dan sa rapor ki nou'n fer piblik war lo *website*, i annan definitivman bann landrwa kot i annan serten difikilte. Me an zeneral servis i ase bon, nou kapab konsider li koman bon.

E pou sa bann landrwa kot i annan difikilte parey *VP*

osi in dir nou pa pou kapab, i pa posib anvi nou zil ki manner i ete, montanny bann landrwa nou pa pou kapab ganny kouver tou landrwa. Me selman definitivman i annan serten landrwa par egzansp dan Was avek dan Sid Mahe, ki nou war bann landrwa kot i annan en pe plis problem. Ki annan plis *area* kot napa *coverage*.

E nou'n fini komans prosedir avek bann operater pou zot devlop ou donn nou en as ki nou apel en *improvement plan*. Savedir en plan ki manner dan *timeframe* ki zot, zot a deside ki zot ava propoz avek nou, pou zot kapab amelyor servis dan bann diferan lokasyon kot ozordi i annan *coverage* pa alaoter, *ok* ?

Me selman parey nou dir, anvi *topology* nou pei, nou bann zil i pa posib pou kapab kouver tou landrwa. Me selman definitivman i annan sa zefor pou amelyor keksoz pou donn en servis pli o kalite pou nou bann konsonmater. E sa i lobzektif osi a letid ki nou fer, pou nou kapab kontinyelman fer ki konsonmater i ganny en servis pli bon posib. Mersi.

MR SPEAKER

Mersi Mr Dogley. Mon a pran kestyon Onorab Romain.

HON GEORGES ROMAIN

Mersi Mr Speaker. *VP*, mwan mon kestyon sa ki nou pe koz lo la definitivman dan distrik Anse Etoile osi nou annan sa sityasyon. An se moman nou pe enterakte avek enn zot *staff* pou sey rezourd en problem dan Maldive.

Me par kont i annan landrwa ki'n fini rezourd. E sa nou vremen apresye en kantite. Mon ti ganny dir ki nou kapab partaz lema konmsi swa bann lezot *service provider* i kapab partaz lema avek lezot parey *Airtel*, *Cable*, e sa ti vremen dan problem.

Alors, mon kestyon aköz mon mazine dan ka irzan si bann dimoun i anvi fer en *call* zot pa pe kapab ganny sa *network*, ki bor zot ete lo kote sa partaz lema ki zot kapab plizyer *service provider* zot kapab servi menm lema dan plas zot ale zot met en lot parey *VP* in dir pou rezon lanvironnman i pa ideal ? Mersi Mr Speaker.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mesi Mr Speaker. Mersi Onorab. Si mon konpran ou byen kestyon se kote nou ete an term sa bann laranzman partaz

lema. Petet avek ou permisyon Mr Speaker, mon demann Mr Dogley petet pou donn plis detay.

MR SPEAKER

Mr Dogley?

DG SCRA JEFFREY DOGLEY

Mersi Onorab pou ou kestyon. Lobzektif se pou touzour pou tou lokasyon anfet ki posib, pou ki okenn nouvo lema ki ganny mete ki i fer li posib, pou ki tou bann operater mobil i kapab servi sa menm lema. E nou'n komanse i en pe letan nou pe travay lo la avek zot. Me selman parey zot ava apresye ki i annan si laspe komersyal ki vin ladan.

E difikilte ki ennler i annan se ki pou ki bann operater i agree lo bann kondisyon finansyel ki asosye avek partaz lema. Me selman mon krwar ki tou operater in rekonnet ki i dan lavantaz tou dimoun pou partaz lema. E okenn nouvo lema ki ganny mete sa lobzektif, pou bann egzistans i pa pou tou touzour posib aköz letan ki i ti ganny fer pa ti pe pran konsiderasyon pou annan lezot operater pou partaze.

Me selman nou pe kontinyelman travay avek sa bann operater pou kapab *achieve* sa bann lobzektif. Pou

kapab asir zot ki i annan bokou landrwa ozordi kot sa pe arrive. Non selman avek bann operater mobil, me avek bann *broadcasters* par egzanp menm *SBC*, *ok?* Nou pou kontinyen travay avek zot pou ki i annan plis sa partaz lema pou redwir lakantite lema ki nou mete partou. Mersi.

MR SPEAKER

Mersi. Mon a pran kestyon Onorab Roucou.

HON MICHEL ROUCOU

Mersi Mr Speaker. *VP*, pou benefis bann manm piblik deor ki petet zot pe rankontre bann serten problem kot zot lakour kot zot reste, eski i annan en fason ki manm piblik i kapab ed zot pou alert zot si an ka dan zot rezyon i annan sa problem. Eski al kot sa provider li menm li, ouswa i vin direktman kot zot? Mersi.

MR SPEAKER

Mersi.

VICE-PRESIDENT AHMED AFIF

Mesi Mr Speaker. Mr Speaker, wi, *SCRA* Mr Dogley i asir mwan ki zot kapab toultan pran kontak avek *SCRA*, donn sa lokasyon kot zot ete, ki problem ki zot pe rankontre

an term sinyal. E zot, zot ava *take up* avek bann operater kominikasyon, pou fer sir ki zot kapab donn meyer servis. Mersi.

MR SPEAKER

Mersi Vis-Prezidan. Mon regrete mon pou bezwen termin la lo sa kestyon. Mon annan bann kestyon ki pe vini la, ki mon asire pou sisit en kantite kestyon bann Manm. So, mon pou remersye bann zofisye *Seychelles Communication Regulatory Authority* Mr Dogley e Mr Moustache pou zot partisipasyon. E mon envit zot fer zot depar e bonn kontinyasyon. E Madanm *Hansard* Raporter ava apel bann delegasyon silvouple.

Welcome back SS Payet. E bonzour e byenveni Mr vanessa Mussard *Senior Financial Risk Analyst* dan *Central Bank of Seychelles*. Nou a pas lo kestyon 62 Onorab Francois Adelaide. Eskiz mwan Onorab avan ou soz, bann Manm in remarke ki nou pe pran en nouvo seksyon. Bann kestyon ki pe vini i konsern rol *VP* koman Minis Finans. E i bann kestyon lo Finans. Onorab Adelaide, ou kestyon.

HON FRANCOIS ADELAIDE

Mersi Mr Speaker. Bonzour Mr Speaker. Bonzour *VP* avek ou delegasyon, tou Manm Onorab e tou dimoun ki a lekout. Mon kestyon pou *VP* i koumsa.

Eski Minis i kapab donn detay sa Lasanble, non pa li *sorry...*

MR SPEAKER

I kapab donn Lasanble detay...

HON FRANCOIS ADELAIDE

Non, non mon'n al lo lot kestyon avan. *Sorry*. Mon'n anvoy sa enn ki la. Eski Minis i kapab donn Lasanble detay lo sityasyon finansyel nou pei konbyen larzan Sesel i annan dan son rezerv. E osi detay bann det pei pou sa lannen? *Thank you*.

MR SPEAKER

Sa i en kestyon ki kapab pran tou lazournen si pa tou bomaten. Mon a envit ou pou fer en *summary*.

VICE-PRESIDENT AHMED AFIF

Mersi bokou Mr Speaker. Mersi Onorab. Mon a sey fer en rezimen pli kourt ki mon kapab. Selman ki a donn otan lenformasyon. Mr Speaker, permet mwan pou mwan pou donn sa apersi baze lo revi ki nou'n fer an Avril 2025.

E pou lannen 2025, krwasans reel Sesel pou ariv 3.3 poursan konpare avek provizyon Bidze ki ti 4.3 poursan. Sa revizyon i pli ba akòz bann aktivite ekonomik mondyal pandan 2025. Par egzanp, bann diskisyon lo tarif komers ki pe ganny enpoze, presyon finansyel e lensekirite politik ki pe ogmante pandan bann dernyen mwan.

Aktivite ekonomik i kapab desann dan bann gran lekonomi. E sa i kapab afekte saler dan sa bann pei e redwir desizyon pou bann endividi kot zot fer lenvestisman e menm desizyon dan konsonmasyon bann servis tel ki tourizm si zot pa trouv sa nesesser. E sa bann realite dan devlopman eksteryer i kapab anmenn difikilte dan bann Polisi Fiskal dan zot pei.

E demann en balans prekosyon pou asir soutenabilite nou det e gard rezilyans kont bann sok eksteryer. Alors Mr Speaker, nou, nou bezwen kontinyen swiv sa bann devlopman ekonomik lo nivo mondyal. E toudmenm nou'n war en logmantasyon 4 poursan dan larive touris depi komansman lannen ziska le 4 Me, Avril 2025 pardon. Le 4 Me 2025 konpare avek menm peryod pou 2024.

E Mr Speaker, letan nou regard Bidze Gouvernman nouvo prozeksyon pou lannen 2025 nou pe prozekte en balans Bidzeter siplis primer 1.2 poursan parey avek Bidze 2025. E Gouvernman i reste angaze pou mentenir en konsolidasyon fiskal, rezilyan ki pou permet det pei kontinyen lo son tranzitwar rediksyon.

Par kont total det in ogmante pou ariv 59.6 poursan *GDP* par lafen 2024, An konparezon avek 58.6 poursan *GDP* par lafen 2023. Nou stok i ankor soutenab e gard nou lo sa semen ki nou kapab realiz nou target pou redwir nou det par anba 50 poursan ver lafen 2030 a kondisyon ki napa gran proze lenfrastruktir pandan sa 5 prosen lannen ki pou reflekte koman en det Gouvernman. Mon bezwen met sa akòz si zot reflekte koman en det Gouvernman, sa sif i monte otomatikman.

A lafen Mars 2025 total det pei ki ti ganny rikorde ti pou en total R18.4bilyon savedir R18mil 400milyon, ekivalan apepre 57 prodwi domestik brit. Dapre plan prete anyel pou lannen 2025, balans kantite finansman ki bezwen pou 2025 i prozekte lo R512milyon ekivalan 1.5 poursan nou *GDP*.

Pou adres sa bann bezwen finansman eksteryer pou pran en rol enportan avek en total R1bilyon ouswa 3.1 pousan *GDP*. Sa pou vin plis atraver bann pre ki ganny donnen avek kondisyon favorab par bann krediter multilateral tel ki Fon Monneter Enternasyonal, Labank Mondyal e Labank Devlopman Afriken.

Sa sif i reprezant en rediksyon R142milyon pou 12.1 pousan konpare avek lafen lannen 2024. Parey nou'n pibliye dan dokiman Bidze pou lannen 2025, plan anyel pou bann det pou sa lannen i konm swivan;

Premyerman 16.4 milyon dolar avek Fon Monneter Enternasyonal anba Program *Extended Fund Facility*, sa program ki nou'n sinyen avek zot.

Dezyenm 24.1 milyon dolar avek Fon Monneter Enternasyonal anba Program *Resilience and Sustainability Facility*. Alor, i annan 2 fasilite ki nou annan ek *IMF*.

Trwazyenm, 15 milyon dolar avek Labank Mondyal anba sipor bidzeter.

Katriyenm, 14.5 milyon dolar avek Labank Mondyal anba program pou rezilta pou ranforsi Sistenm Proteksyon Sosyal.

Senk, 25 milyon dolar avek Fon Devlopman Labank Afriken *AfDB* anba sipor bidzeter.

E sizyenmman, 23milyon dolar pou bann proze kapital. E lo kote finansman domestik sa i pou negatif. Negatif i vedir nou pou rann larzan plis ki nou prete.

E i pou vin 1.6pousan nou *GDP*. Sa i vedir ki Gouvernman i pou repey plis det domestik an rounpi ki sa ki i prete. E i fer ki domestik det domestik pou diminyen. Ler li i diminyen, nou pret plis lo det eksteryer.

Det an Rapor avek *GDP* prevwar pou ariv 61.2 pousan pou lafen lannen 2025, kan nou pran an konsiderasyon bann garanti ki Gouvernman in donnen pou bann Lantrepriz Leta.

Mr Speaker, nou kapab obzerve ki i annan en gran amelyorasyon lo nivo rezerv pei dezyenm parti ou kestyon pandan sa dernyen 10an.

An 2014, rezerv ti selman 464 milyon dolar Ameriken. E swivan bann negosyasyon pei in regilyerman resevwar finansman sorti kot bann lenstitisyon lasistans finansyel tel ki Labank Devlopman Afriken, Labank Mondyal, Fon

Monneter Enternasyonal e lezot ankor.

E Labank Santral in osi met sifizaman zefor pou kontinyelman aste deviz etranzer ki an siplis lo marse domestik. E gide par son manda pou zer deviz etranzer, in ede realiz serten profi atraver lenvestisman dan bann diferan prodwir finansyel lo marse enternasyonal.

A lafen 2024, rezerv pei ti kouver 4 mwan lenportasyon. E sa ti en nivo 774 milyon dolar Ameriken - en logmantasyon 67 poursan depi sa sif ki ti ganny raporte an 2014. Alor, mon repete en logmantasyon 67 poursan lo sa sif 2014. Ozordi rezerv i apepre 830 milyon dolar Ameriken.

Mr Speaker, nou rekonnet lenportans nou lekonomi pou li vin pli rezilyan ek priyoritiz bann lobzektif anvi bann stok eksteryer ki kapab afekte nou ek sityasyon politik aktyel dan lemonn.

Nou pe kontinyen travay pou kre en lanvironnman ki ankouraz transformasyon dan nou bann sektor tradisyonnal ki pou ankouraz plis valer azoute dan nou bann sektor kle. E sa pou permet nou ganny plis reveni pou soutenir nou devlopman. Mersi bokou Mr Speaker.

MR SPEAKER

Mersi Vis-Prezidan. E siplemanter Onorab Adelaide?

HON FRANCOIS ADELAIDE

Mersi VP, pou ou larepons detaye. Mon krwar i montre ki vreman sa Gouvernman pe pran swen avek lekonomi sa pei. E fer sir ki nou rezerv i toultan la pou tenir okenn sok ki arive. VP, mwan mon kestyon petet i pou al en pti gin lo kote bann devlopman nasyonal. E sa i en pe enkyet nou vi ki i annan bann komitman par Gouvernman pou... i pa ankor Gouvernman me selman i annan koze, ki i annan bann det ki kapab antre tel parey bann det *TRNUC* ki i bann dimoun pe demann bokou larzan.

E nou'n tande poudir i annan bann det osi ki Sesel in pran ki pa *accountable*, sirtou sa det Larisi. Eski ou kapab donn nou en detay lo sa zafer e byensir eksplik Seselwa ki mannyer nou pou bezwen fer sir ki nou pran swen avek tou bann keksoz ki nou pe depanse, ouswa bann keksoz ki nou anvi pou ki nou det i reste soutenab e nou rezerv i kontinyen ogmante. Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi Mr Speaker. Mr Speaker, mon ti a kontan remersi Onorab pou son konfyans ki in dir dan nou fason e nou zesyon. E nou, nou toultan la pou nou fer sir ki zesyon pei i asire ki nou rezerv i kontinyen monte. E nou annan sifizaman rezerv pou nou *deal* avek okenn sityasyon sok eksteryer ki kapab afekte nou.

Lo kote bann depans e ki manner sa in afekte, nou pe planifye li a lavenir. Nou pe toultan tou le lannen nou annan en plan det e ki manner nou pou pran e repeye. Tou le lannen nou annan en plan fiskal so ki dir ki kantite nou pou depanse, ki manner nou pou finans. E tou bann depans ki nou pou fer pou pas atraver Lasanble Nasyonal.

Alors, si pou annan peyman ki bezwen ganny fer konsernan nenport ki lobligasyon ou'n mansyonnn enn *TRNUC* - si i annan keksoz ki bezwen ganny fer, tousala se bann program ki Gouvènmman pou bezwen table devan Lasanble Nasyonal atraver son Bidze. E nou pou fer li dan en fason ki transparan. So sa mon kapab asir ou lo la.

An sa ki konsern serten det par egzant det avek Larisi nou, nou'n fer provizyon. Annefe nou ti negosye sa bann det depi bann letan *Paris Club* e ti annan sonm ki nou'n tonm dakor lo la. E ozordi avek bann diferan sanksyon ki annan lo Larisi i enposib pou nou tranzakte avek zot.

E alor toudmenm, vi ki nou annan en lobligasyon pou regle sa bann det, nou fer provizyon pou kit sa larzan 2 kote. E osi to ki sityasyon i a permet nou, sityasyon enternasyonal a permet nou kapab regle sa nou, nou pou fer li. Me selman nou, nou bann sityasyon finansyel i annord. Nou, nou fer sir ki tou keksoz i transparan. Tou nou bann partener i satisfè lafason ki nou pe gard nou det.

E lafason ki nou pe fer sir nou pe planifye bann keksoz ki kapab anmenn det pou nou pei i ganny fer dan en fason korek. E fer sir ki nou bann det ki nou deza annan napa en landrwa kot nou pe *fail* pou nou servis nou det. Nou annan en bon repitasyon nou, kredibilite tre o lo nivo enternasyonal. E se nou lentansyon pou gard li koumsa toultan. Mersi Onorab.

MR SPEAKER

Mersi Vis-Prezidan. Onorab Pillay?

HON SEBASTIEN PILLAY

Mersi Mr Speaker. Mr Speaker, mon'n ekout atantivman sa ki Vis-Prezidan in dir devan Lasanble. E mon annan serten konsern, akòz ler nou regard debt stock ki nou pe *rely loan* e pre ki an relasyon avek bann fasilite ki nou'n gannnen avek *IMF* ouswa *World Bank*, i ankor reste signifikan.

Prezan mon ti a kontan demann Vis-Prezidan par rapor a reveni baze lo prozeksyon reveni ki nou ti'n mete, nou prozeksyon pou sa lannen nou'n met R10milyon apepre *around* R10milyon. Menm nou'n tann koz lo R11milyon. Prezan sa i fer ki si nou kontinyen *rely* lo sa bann det nou pa konnen la ou pa pe dir nou ki mannyer reveni pe performen la ki nou pe apros premye kar lannen. Eski ou annan okenn lenformasyon lo performans reveni premye kar lannen ?

Prezan *when it comes to accounting* Gouvernman, bomaten ou'n sey eksplik nou, e ou'n dir nou poudir Gouvernman i *accountable* menm si legzanp in ganny donnen dan sa Lasanble kot pwen pre ki sorti pou en proze i

ganny peye dan en lot pei, me lot ou dir nou - apre lot ou vire ou dir nou tou peyman ki sipoze sorti deor i antre dan *Consolidated Fund*.

So, eski i annan lezot larzan, lezot larzan ki sipoze relye avek bann aktivite ekonomik ki pe pase Sesel ki pou *either* kont koman det or reveni pou pei ki pou ganny peye an deor pei *rather than* dan Sesel atraver bann prosedir ki nou annan enternelman?

Par egzanp nou ti'n tann koz lo *Saudi Grant - Saudi Loan*. So, eski sa in materyalize? Zis pou nou ganny en konprenezon konplet lo kote nou ete avek vizavi *grants*, donasyon e avek sa bann depandans lo bann fasilite ki nou pe gannnen avek *IMF* parey nou ti toultan pe gannnen. Mersi.

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Pou premye parti ou kestyon, eski nou lo target baze lo sa ki nou pe vwar ziska ozordi? Wi, mon krwar nou lo target, nou sif tourizm ki souvandfwa i en fakter determinan dan reveni. Souvandfwa i en fakter

determinan. Sif touris i deza 4poursan pli o ki 2024. I normal i arive sa.

I pa vedir ki zot depans i pou parey. Me selman souvandfwa zot swiv. E nou, nou fer sir poudir otan ki nou kapab kot i konsern *compliance* lo SRC ek *revenue* nou met otan lanfaz ki nou kapab pou nou fer sir poudir reveni swiv sa larive.

Alor lo sa kote, nou, nou santi poudir nou lo en bon semen. E si naryen drastik pa arive par egzantp en lager *Iran*, en lager *Mwayenn Oriyan*, en lager *Houthi*, pri delwil ki sote e ki pou met presyon lo nou balans peyman akouz kou *freight* i monte, kou *fuel*, pri dolar i monte. Me selman ou reveni pa neseserman monte, la i pou vin en presyon lo nou. E i kapab fer nou siplis primer ki nou'n prozekte 1.2 poursan desann.

Tousala i bann posibilite. Mon pa krwar i annan okenn dimoun ozordi ki kapab vini dir wi, ziska Desann la, la ki i pou été, parske sirtou dan konteks Sesel nou depan antyerman - preski antyerman lo en sekter a leksteryer pou nou performans. So, sa i vin difisil pou nou.

An se ki konsern nou bann zesyon det ek lafason nou rikord tou nou bann tranzaksyon naryen pa sanze. Nou kontinyen annan tou nou

bann tranzaksyon ki ganny rikorde anba *Public Finance Management Act*. Si nou ganny en don ki sa don i en sonm finansyel oubyen i en byen, i ganny rikorde dan kont Gouvernman Sesel.

I pa vedir ki i annan en larzan ki antre. I en don, i en byen i ganny rikorde dan ou liv. Se sa ki nou pe koz lo la. E nou bezwen konpran ki mannyer *accounting* i marse. Annou pa konfiz pep Seselwa. Dan nou liv, dan nou liv nou fer antre tou sa ki pou sa pep. Tou sa ki pou sa Gouvernman nou fer antre, nou pa kasyet ; nou pa *operate* ek 2 liv nou.

Napa 2 liv ki annan dan Gouvernman. I annan en sel liv, i annan en sel *Treasury Information System*, tou lenformasyon i al ladan ki larzan ki antre, ki i en don, ki i en byen i ganny fer antre dan liv Gouvernman pou ki si i en byen i annan en limero ki i en *asset*. E ou kapab al rode kot sa asset i ete e ou bezwen zistifye kot sa *asset* i ete.

Napa naryen ki pe pase lo nivo fiskal, lo nivo Gouvernman ki nou gard an deor nou liv, nou pa fer sa e nou pa pou fer sa parske i kont nou prensip i kont sa ki nou, nou dir nou debout for pou sa pou latransparans e bonn gouvernans. E lemonn in

rekonnet nou, akòz lo nivo persepsyon koripsyon nou 18enm dan lemonn; premye lo Lafrik.

E nou annan lentansyon pou nou reste koumsa, e pou nou reste transparan avek nou pep parske sa larzan i pa pou nou. Se larzan pep Seselwa nou la pou zer sa, rann kont e fer sir ki tou keksoz i mars byen. Pas devan zot koman Manm Lasanble Nasyonal. Les zot kestyonnen fer Odit, les *FPAC* ek son *Chairman* ki ou menm ki tyermenn dayer pou kapab kestyonnen e anmenn okenn keksoz ki pa anliny devan nou e nou a pran nou a fer le neseler pou met tou keksoz anliny.

Me selman mon kapab asir ou tou keksoz pe mars byen, tou dimoun i satisfè, nou ganny odite e tou zafer i annord. Mersi bokou Mr Speaker.

MR SPEAKER

Mersi Vis-Prezidan. Onorab Henrie, eskize mon ti'n met ou non, me mon'n sot ou.

HON GERVAIS HENRIE

Meri Mr Speaker. Mon kestyon i konsern, mon konsern i lo soutenabilite det. E nou'n dir ki i pou ariv par anba 50 pousan nek an 2030. E ozordi si mon memwar i servi mwan byen i apepre 18 Bilyon. Sa ki mon

anvi konnen se letan ou'n dir ki tou zafer i annord, nou konnen kwa. Eski ozordi nou kapab satisfè poudir nou konn tou bann rezon ki sa bann det ti ganny pran? Ki mannyer i ti ganny servi? E *how far back* i annan det ki nou ankor pe peye? Eski nou dan en pozisyon pou kapab dir pep Seselwa sa? Mersi.

MR SPEAKER

Mersi. Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Sa ki mon kapab dir ou se nou annan tou lenformasyon an term kwa ki non drwa. Sa 18 bilyon nou kapab dir ou sak lenstitisyon e sak labank ki nou dwa sa i garanti. Me eski nou kapab konnen pou bann letan bokou avan nou pou ki rezon sa bann det in ganny pran, sa pa tou ki nou pou kapab reponn.

Par egzanp, mon a dir ou ti annan serten lenvestisman ki dizon serten paraetatik ki'n ganny fer ki'n al lo liv Gouvernman. Me selman nou pa konnen ki sa lenvestisman ki son rannman ki nou annan. Selman i annan en liv en det lo liv Gouvernman. Me ki i ti al fer avek? par egzanp si ou pran det

Coetivy. Si ti pran 25 a 30 milyon dolar dan det *Coetivy* sa letan anba *SMB*.

Nou konnen i annan en kantite kestyon ki'n monte lo *SMB*. Me ti annan det Gouvernman ki ti ganny abzorbe, det *SMB* ki'n ganny pran par Gouvernman ler zot ti aboli ti ferm *SMB*. Tousala i vin lo liv Gouvernman. Si ou dir ek Gouvernman konbyen i a dir ou ala sa sonm. Kwa ki'n ganny fer ek sa lo *Coetivy*? Ou demann ou lekor kestyon akòz tou sa ki ti pe marse pa pe marse.

Ou war zenerater ki'n abandonnen, laferm kanmaron ki'n abandonnen ozordi in ganny refer anba *IDC*. E sa ladministrasyon ler in vini, nou'n refer *Coetivy* pe marse pe prodwir ozordi. Me selman i annan det ki ankor lo liv Gouvernman. In redwir byensir parske pandan ban lannen in ganny redwir depi ler program *IMF* in ganny fer bokou sa bann det in ganny repeye.

Be se sa larealite ozordi nou annan detay tou nou bann *loan* ki nou drwa ozordi, nou konn tou. Me en kantite ki date bokou lannen disi i pou parfwa difisil pou konn son rezon det oubyen pou gete si sa sonm li menm ti en sonm ki ti absoliman nesese sa letan.

HON SEBASTIEN PILLAY

Be pa ou ti *PS* dan Gouvernman ou?

MR SPEAKER

Mersi. Vis-Prezidan...

HON SEBASTIEN PILLAY

PS dan Gouvernman....

MR SPEAKER

Mersi. Mersi.

HON SEBASTIEN PILLAY

Be ki mannyer i pa konnen? Me i ti *PS* dan Gouvernman li, i pa kapab zis vin reponn konmsi i pa ti la. I ti la li, i konn tou ki'n pase.

MR SPEAKER

Order! Sorry mon pa kapab donn plis letan pou sa kestyon. Mon pou aps lo prosen kestyon 63, Onorab Churchill Gill. Onorab Gill?

HON CHURCHILL GILL

Mersi Mr Chair. Kestyon i lir koumsa, eski Lasanble i kapab ganny enformen lo ki kantite larzan i annan dan *Children's Fund* e osi detay depans ki'n ganny fer dan sa kont pou lannen 2024 e 2025?

MR SPEAKER

Eskiz mwan. Nou bezwen fer en sanzman delegasyon. E mon

remarque, Mrs Mussard in kit nou. Nou annan Mrs Patricia Padayachy ki pou antre. Eskiz mwan Onorab, mon'n omit en pti prosedir la.

Bonzour Mrs Patricia Padayachy *Chairperson Children Funds*. Mon remarke ou'n asiz a kote. Mon mazine ou pa pou partisip dan repons kestyon. Me SS i lo *panel* e Vis-Prezidan. Onorab Gill, mon kapab re demann ou pou rebran relir ou kestyon silvouple.

HON CHURCHILL GILL

Mersi. Eski Lasanble i kapab ganny enformen lo ki kantite larzan i annan dan *Children's Fund* e osi detay depans ki'n ganny fer dan sa kont pou lannen 2024 e 2025?

MR SPEAKER

Mersi. Vis-Prezidan repons.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, en Bidze R7milyon pou lannen 2024 ti'n ganny prozekte e menm sonm in ganny mete dan Bidze 2025. Pou lannen 2024, en total 97 benefisyer pou en lavalier R6.9milyon in ganny fer anba sa alokasyon bidzeter e anba bann kategori swivan.

Tretman medikal pou 7 zanfan, en total R129mil.

Lasistans sosyal pou bann bezwen endividi pou 7 zanfan en total R92mil.

Bann proze lekol ki enkli lekipman, aktivite dan vakans pou 23 groupman pou en lavalier R554mil.

Bann proze program sorti kot Sosyete Sivil pou 38 NGO pou en lavalier 2.3milyon.

Pou 22 proze nasyonal pou en lavalier R3.8milyon.

Pou lannen 2025, ziska Avril 2025 en total 25 benefisyer in ganny aprouve pou en lavalier R2.3milyon anba sa bann kategori konm swivan ;

Premyerman tretman medikal pou 2 zanfan, en total R138 mil.

Lasistans sosyal pou bann bezwen endividi pou 2 zanfan en total R13.6 milyon, non R13.6mil pardon.

Konpetisyon ou lesanz vizit enternasyonal pou 10 groupman pou en total R1.1 milyon.

Bann aktivite dan vakans pou 9 groupman pou en lavalier R318mil.

Bann proze kominoter ki enkli bann aktivite apre lekol pou en groupman pou en total R86mil.

Lasistans pou *Paradis Des Enfants* pou en total R689mil.

Dan sa sonm ki'n ganny aprouve pou lannen 2025, en sonm R1.34 milyon in fini ganny peye pou sa bann benefisyer. Mersi bokou Mr Speaker.

MR SPEAKER

Mersi Vis-Prezidan. Wi, Onorab Gill, ou siplemanter.

HON CHURCHILL GILL

Mersi Mr Speaker. Mersi pou ou larepons. Mon premye keston se ou'n mansyonn NGO ki'n ganny lasistans. Eski ou kapab fer nou konpran si sa bann NGO i *relate* avek bann marmay, zot fonksyon i annan keksoz pou fer ek bann marmay vi ki sa i *Children's Fund*?

Aprè ou'n osi mansyonn groupman enternasyonal ki'n ganny lasistans. E mon ti a kontan konn kriter pou sa, akòz i annan bann groupman ki zot in aproz pou ganny lasistans, me selman zot, zot pa'n gannnen petet ti a bon ozordi la tou bann diferan groupman. Mon ti a konnen ki egzakteman kriter pou kapab ganny lasistans lo la. Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. Larepons se wi, tou sa bann NGO ki'n gannnen i annan pou fer avek zanfàn. Tou sa ki zot in demande i annan pou fer ek zanfàn. Mon pa konnen si SS i annan okenn lezot lenformasyon adisyonnèl tel ki kriter eksetera ki ganny servi. Avek ou permisyon, mon a permet li donn klarifikasyon.

MR SPEAKER

Mersi. SS i kapab elabore. Wi?

SS PATRICK PAYET

Meri Mr Chair. Bonzour Mr Chair, tou Manm Onorab e tou dimoun ki a lekout. Mr Chair, pou *Children's Special Fund* i annan en Polisi ek *guidelines* ki'n ganny pibliye. E sa ou pou vwar li lo *Website* Minister Finans.

E lo la i annan bann alokasyon e bann kategori ki *Children Special Fund* Komite, *AMSA Board*, zot in devlop li en Polisi ki tou sa bann *guidelines* ki zot in pou donn lasistans. Par egzanp premye par egzanp zot ti bann kriter pou bann lasistans premye par egzanp pou bann *individual cases*.

Zot in mete ki *the ceiling should not exceed* R10mil. So, i pa plis ki R10mil. Me selman par egzanp sa i kouven en pe bann *spending* par egzanp pou

ini pou lenz ouswa bann *personnel items* pou *travel*. Selman zot bezwen kapab *provide proof* letan zot pe vin rod sa lasistans.

Dezyenm kategori par egzantp i annan pou bann paran ki zot in vwar ki zot in demann bann ki annan pou fer pou mitigasyon, sosyal ouswa derivasyon finansyel pou bann zanfan dan zot *household*. E sa i *not exceed* R5mil. Apre i annan bann lezot kategori osi par egzantp lo kote lasante sa i pou en lavalier par egzantp R25mil.

I annan par egzantp pou zot regard *upgrade physical structure of* lakaz, par egzantp ki annan pou fer an relasyon avek zanfan spesyalman zot lasanm. E sa i en lavalier R50 mil. So, tou sa bann lasistans i annan bann *sort of threshold* ki zot in mete. E osi tou sa bann kategori i annan bann kondisyon ki zot in met avek.

So, tousala zot pou vwar li lo *website* Minister Finans. E si i annan par egzantp i annan bann endividi kekfw a i anvi ganny en kopi nou kapab soumet zot. Me selman tousala i annan pou fer avek zanfan. So, kriter i vreman transparan ki nou'n met li lo *website*. Mersi.

MR SPEAKER

Mersi SS. Onorab Labonte?

MR SPEAKER

Mersi SS. Onorab Labonte?

HON ANDY LABONTE

Mersi Mr Speaker. Mr Speaker, mon zis annan en pti kestyon siplemanter, ekstra lo sa kestyon. Petet VP, dan term kreol senp SS, in eksplik en pe dan bann kriter petet pou dimoun la deor aköz toutan ler nou koz *Children's Fund* i pa kler.

So, petet dan *term* kreol senp ki vreman rezondet *Children's Fund*, e ki fason ki petet serten endividi oubyen petet i kapab akse sa *fund* li menm li? Aköz par ler i pa kler pou dimoun la deor. Mersi.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker, e mersi Onorab. Avek ou permisyon mon a permet SS, donn en leksplikasyon ase kler lo son bi li menm *Children's Fund*. Mersi.

MR SPEAKER

SS, silvouple.

SS PATRICK PAYET

Mersi, Mr Chair. Mersi Onorab, pou sa kestyon.

Parey zot okouran ki *the Children's Special Fund* ti ganny kree anba *Public Finance Management Act*, so in ganny kree anba *PFM Act*. E li avek son lobzektif pou li asiste bann zanfan ki bezwen sipor, swa pou *improve* zot lasante, ouswa zot *wellbeing*.

E sa fon osi pou donn sipor bann zanfan, bann program, ouswa bann proze, ki relye pou promot *wellbeing* bann zanfan dan Sesel.

So, i *specifically* pou sa de kategori, i annan en-*Board* ki'n ganny apwente, e sa *tenure of the Board* i pou 3an.

E bann aplikasyon ki sa Komite i fer se, zot fer bann soumision bann proze, e sa bann *Board* zot, zot evalye sa bann proze letan in vin demann zot baze lo sa bann *policy* avek bann *guidelines*, ki'n ganny met dapre bann kriter. Mersi.

HON ANDY LABONTE

(Off-Mic)

MR SPEAKER

Vitman silvouple.

HON ANDY LABONTE

Mersi, SS. Petet en pti leklersisman direk ki fason vreman zot ganny larzan, eski,

Gouvernman ki met ladan, oubyen i annan okenn serten antite partikilyerman ki met larzan dan sa *fund*? Mersi.

MR SPEAKER

SS i a kontinyen VP? Yes SS?

SS PATRICK PAYET

Mersi Mr Chair. Mersi Onorab. tou le lannen dan Bidze *Social Programme*, Gouvernman i fer alokasyon R7milyon, so spesifik, me selman si demen i annan okenn *business* ki anvi donn okenn donasyon dan sa fon zot lib.

Me, selman antyerman ozordi, se larzan ki'n ganny mete dan Bidze R7milyon anyelman dan Bidze.

MR SPEAKER

Mersi, SS. Onorab Vidot.

HON AUDREY VIDOT

Mersi Mr Speaker. Mon kestyon pou SS, mon ti le konnen parey ou'n dir i annan diferan program.

Eski, *Board* li menm li pe asire poudir bann groupman i ganny lasistans *in fairness*, ki napa toultan nou war zis en serten group ki benefisye.

Me osi donn sans osi pou lezot ki parey si zot pe *travel* an group, petet kwa ki, aköz ki ou war i annan serten zot annan

en sonm group zanfàn ki zot kapab *catered for*.

Me i annan lezot group i tant pou ganny petet en pti pe pli pti git. Si ou kapab zistifye sa. E osi ki mon pe koz diferan group en. Petet ti ava byen donn en serten la ki bann group ki zot konnen i benefisye anba sa *Children's Fund? Thank you*.

MR SPEAKER

Mersi, Vis-Prezidan. VP, i ava... SS, i ava reponn.

SS PATRICK PAYET

Mersi Mr Chair. Mersi Onorab. letan nou, nou regard par egzant, prosedir ki ganny *follow* i annan bann verifikasyon osi ki ganny fer.

Par egzant, zot par egzant dan Bidze ozordi spesifik par egzant, si i annan bann sipor bann NGO, ozordi dan Bidze I annan en kategori dan Bidze ki nou fer alokasyon so, avan zot kekfwa letan zot pe fer zot *assessment* sa aplikasyon, zot verifiye avek bann lezot lenstitisyon.

Par egzant, si demen i annan en alokasyon dan Bidze, i annan lezot Komite ki fer alokasyon pou bann NGO.

So, zot ki zot fer zot, zot verifiye, zot *share* bann lenformasyon pou fer sir ki sa bann endividi, ouswa bann

groupman pa pe ganny larzan de fwa.

So, i annan en pe sa bann *sharing of* lenformasyon, me selman dan zot kategori ki zot in mete letan zot pe fer zot *assessment*, definitivman tou dimoun i annan menm sans pou li kapab ganny lasistans.

Me selman i bezwen dapre sa bann kriter ki'n ganny mete. Me selman si i annan kekfwa lenformasyon ki okenn endividi an deor i annan ki si par egzant, en dimoun in ganny lasistans, e menm ki si i pa pe fer servi sa larzan dapre sa ki i sipoze, *feel free* pou nou kapab ganny sa bann lenformasyon.

Akoz par egzant, i annan bann paran menm i pa ti konsern *Children's Special Fund*, ti konsern en lot kategori ki dan Bidze ki zot ti fer kot Minister Finans ki zot ti anvoy zot sa lenformasyon Minis, selman nou, nou ti fer nou lenvestigasyon, e nou ti vwar ki kekfwa lenformasyon ki zot ti pe donn nou i pa ti totalman korek.

Akoz kekfwa zot ti napa tou sa lenformasyon. So nou definitivman Minister Finans, si annan okenn kekfwa endividi ki annan lenformasyon adisyonnèl kekfwa ki zot krwar kekfwa i annan larzan ki kekfwa pe donn en pe avek sa

bann kategori en pe tro bokou, zis fer nou konnen, e nou, nou pou fer lenvestigasyon. Mersi.

MR SPEAKER

Mersi. *Ok*, Onorab Pillay, ou kestyon. Annou sey bref silvouple?

HON SEBASTIEN PILLAY

Mersi, Mr Speaker. Vitman. Pandan letan ki zot pe reponn kestyon kler zot annan en *system* kriter zot annan en striktir an plas. E *Children's Special Fund*, i pa en *supplementation of income*, i en *special fund* ki ganny servi pou en *targeted aspect*. Be nou annan en problem si nou vwar paran pe *turn towards Children's Fund*, kan nou annan en *system supplementation of income*.

Ki tonm anba *welfare*, so eski Vis- Prezidan, i kapab dir nou si zot in etabli, e oubyen *Children's Fund* in etabli, ki kantite ka ki zot in gannyen kot zot pe ganny *more or less* bann sityasyon *depravations* zanfan, kot zot bezwen *step in financially*, e ki sa *breakdown* ki annan lo nivo *welfare* si i annan enn, pou etabli prezan ki manner *Children's Fund*. Dan plas li ki bezwen *deal* ek sa problem, i *root* sa problem to *welfare agency* anba support,

social support ki sipoze ganny donnen? Mersi, Mr Speaker.

MR SPEAKER

Mersi. *VP*, diriz nou, nou a ganny en repons bref.

VICE-PRESIDENT AHMED AFIF

Mersi bokou Mr Speaker. Mr Speaker, mon konpran sa pwen ki Onorab, pe fer ki bezwen annan en klarite ant serten lazans.

Lazans Proteksyon Sosyal, e *Children's Fund*. Mon asire zot annan detay lo kwa ki'n al laba, e kwa ki'n al lot kote fer sir pou dir i pa an konfli ek kanmarad.

Me selman mon napa lenformasyon spesifik la ozordi, me selman nou kapab toultan rod sa lenformasyon met li a zot laport, mersi.

MR SPEAKER

Mersi Vis-Prezidan. Bon mon pe sey donn 15 minit sak kestyon pou permet nou fini a tan. Nou ava avans lo sanzman delegasyon silvouple.

Mersi Madanm Padayachy. E mon ava demann *Hansard* Raporter pou apel lot zofisyè.

MR SPEAKER

Bonzour, e byenveni Mr Ronny Palmyre, *CEO Housing Finance*

Company. Kestyon 64, Onorab Francois Adelaide.

HON FRANCOIS ADELAIDE

Mersi Mr Speaker. Dabor *welcome* Mr Palmyre, mon kestyon pou *panel* i al koumsa; Eski Minis i kapab donn detay sa Lasanble lo tou bann prodwi ki tonm anba *scheme HFC*, e bann prosedir an plas pou kapab benefisye anba sa tel *scheme*? Mersi.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, depi komansman sa lannen 2025, *HFC* pe ofer 16 prodwi *loan*, sa i konpri 6 prodwi kot lipotek ki bezwen ganny met koman sekirite lo sa propriyete e 10 prodwi kot i bezwen annan en *guarantor*, ouswa en restriksyon i ganny mete lo sa propriyete koman sekirite. Alor, bann prodwi sa premye 6, ki bezwen met lipotek lo la, i konm swivan;

Loan lakaz ki nou apel sa *housing loan*; *loan* pou en dezyenm lakaz, *loan* pou ekstansyon vertikal, *loan* pou ekstansyon lakaz ki apel *house extension scheme*,

loan later savedir pou en pti *loan* pou later, zis later, e *loan* pou renovasyon mazer.

Sa i tonm dan sa bann ki ou bezwen lipotek lo la. Prezan ou annan bann ki ou bezwen zis en *guarantor*, ouswa en plasman en restriksyon.

Alors, sa i annan 10 kategori *loan* pou renovasyon lakaz,

Home Improvement Loan nou apel li,

loan pou reparasyon twatir,

loan pansyoner pou renovasyon lakaz,

loan pansyoner pou reparasyon twatir,

loan pansyoner pou bann dirzans lakaz,

loan home carer pou renovasyon lakaz,

loan home carer pou reparasyon twatir,

loan envalidite, e dezabilite permanan pou renovasyon lakaz,

loan envalidite e dezabilite permanan pou reparasyon twatir, e

loan pou arpant later. Sa i sa 10 kategori ki ou bezwen *guarantor*.

Prosedir an prensip pou tou sa bann diferan prodwi i konm swivan ; ranpli bann form relevan avek ou aplikasyon, e

vwar zofisye ansarz pou ou ganny gidans.

Dezyenmman, prodwi tou bann dokiman relevan. So ou ranpli bann form, e ou prodwi bann dokiman relevan;- par egzant dokiman lavant later, ek propriyete, plan arsitek ek enzenyer pou sa aplikasyon, kotasyon kontrakter ek okenn evalyasyon par en QS en Metrer nou apel li.

Okenn portre relevans a sit, oubyen sa lakaz, permisyon pou konstri swa par *planning*, oubyen propriyeter si ou lo later paran par egzant.

Payslip tou sa ki pou ranbours sa *loan*, oubyen garanti sa *loan*, kont labank ban dimoun relevan an plis ki zot *payslip*. E, en plan ranboursman an total. Byensir nou kapab donn ou separeman bann detay spesifik lo sak kalite *loan*, mon'n mansyonn 16 diferan *loan* diferan kalite *loan*.

E tel ki kondisyon aplikab, tel ki lentere term repeyman, e sekirite nesaser. Me, byensir i pou *long* pou nou evalye sakenn dan sa bann 16 e bann kondisyon, vi ki annan plizyer prodwi, ki mon'n mansyonnen.

Me an gro vwala bann prosedir ki an plas kot *HFC* Onorab. Mersi Mr Speaker.

MR SPEAKER

Mersi. Siplemanter Onorab Adelaide, wi?

HON FRANCOIS ADELAIDE

Wi, Mr Speaker, mon annan en siplemanter. *VP*, dabor mersi, ankor pou ou larepons. I telman i annan *scheme* ki mon'n fini bliye ler ou'n nonm sa 16. posibleman eski ou kapab fer Lasanble ganny tou sa bann dokiman? Akoz, se nou ki devan piblik, e i bann *scheme* ki vremen enteresan, e bokou dimoun pe *look forward* pou sa.

Eski zot kapab fer nou ganny dokiman? E petet *VP*, mon lot pti kestyon mon pou demann ou, ki mannyer en tel bon program koumsa napa ase piblisite?

E ki zot pe fer pou ki i annan *maximum* piblisite ki tou Seselwa ki anvi akse sa *scheme* zot kapab konnen ki pe pase? *Thank you*.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Onorab. Onorab, mon antyerman dakor avek ou, pou dir sa *scheme HFC* - sa bann prodwi i bon pou bann dimoun, sirtou bann ki mwen kapab pou al pran en *loan* komersyal.

E, mon antyerman dakor pou dir nou devret rod fason pou donn plis piblisite lo la. Me petet avek ou permisyon Mr Speaker, mon a permet CEO pou li kapab donn en pe leksplikasyon lo kwa ki zot pe deza fer an term piblisite, e lenformasyon. Mersi.

MR SPEAKER
CEO.

CEO RONNY PALMYRE

Mersi Mr Speaker. Bonzour. Sa bann *scheme* i annan en bon pe ki'n vin an egzistans Zanvye 2025. E pou lannen 2025 nou annan en kantite *marketing campaign* ki nou pe fer.

Lannen pase nou ti komans avek bann *DA's Office*. Tou *DA's Office* nou ti fer bann sansibilizasyon en konpany sansibilizasyon, e sa lannen nou pe mazine pou fer ek bann MNAs osi tou, so selman sa ki ou'n demande nou kapab fer Lasanble gannnen.

Akoz, nou annan tou sa bann detay lo tou *loan* ki nou kapab fer zot gannnen. Selman sa lannen nou pou antre en pe agresiv lo nou bann pou met en pe vizibilite lo sa bann prodwi. Mersi.

MR SPEAKER

Thank you, CEO. Nou a pran siplemanter. Onorab Monthy?

HON PHILIP MONTHY

Mersi Mr Speaker. Mr Speaker, zisteman mon kestyon ti pou en pe lo piblisite pou fer dimoun la deor okouran sa bann prodwi.

Akoz, koman reprezantan distrik, souvan ou zwenn dimoun ki pa okouran, e ler ou pe dir li i en pe sirpriz, i kontan pou dir i annan sa servis. me, i pa ti konnen. So i byen pou dir zot pe fer zefor dan sa laliny. Petet en kestyon ki mon kapab azout lo la, eski zot, zot satisfè lakantite dimoun ki pe vin ver zot pou *apply* pou sa bann *loan* pou ganny sa servis?

Prenon kont Bidze ki zot annan pou petet pou en lannen pou ofer sa servis *loan*, eski zot vwar ase dimoun pe vini, pe *apply*? E ki bann difikilte plizoumwenn ki bann zabitan ki bann dimoun i gannnen pou zot ganny akse avek sa bann *loan*, e ki mannyer nou kapab fer petet pou rezourd sa? Mersi.

MR SPEAKER

Mersi. Piblisite mon krwar nou'n deza reponn, silvouple pou rezon letan annou avans lo dezyenn pwen. VP?

VICE-PRESIDENT AHMED AFIF

Yeah. Mr Speaker, avek ou permisyon petet Mr Palmyre, i a kapab reponn.

MR SPEAKER

Mr Palmyre.

CEO RONNY PALMYRE

I tou depan ki kalite prodwi *loan* en, i annan bann ki nou *still* pe ganny en bon pe laplikasyon. Me, selman ki nou'n vwar resaman bann *housing loan* in desann. Sa mon krwar i rezon akse ek later.

Sanmenm sa ki nou ti pran sa desizyon pou nou fer *vertical extension*, ki nou pe ankouraz bann paran pou les zot zanfann konstri *above* pou rezourd en pe sa problem later.

E parey mon'n dir, vi ki nou'n vwar sa besman dan bann laplikasyon, *this is why* ki nou pe al en pe agresiv lo kote sansibilizasyon. Be selman fer note ki *HFC* i *operate* a kote labank.

Nou pa sipoze vwar pe *compete* ek labank, *but rather* pe anmas bann dimoun ki pa kapab, ki pa kapab pe kalifye ek labank. Sa i fer nou en pti pe dan en pozisyon en pe sere, me selman nou *still* annan sa devwar pou nou al *towards* bann dimoun ki nou krwar ki nou konnen i bezwen nou

lasistans pou nou kapab asiste zot. Mersi.

MR SPEAKER

Mersi. Onorab Roucou.

HON MICHEL ROUCOU

Mersi Mr Speaker. Bonzour *CEO*. Annefe *CEO* si ou kapab donn nou en pti pe lo kote bann lentere ki zot annan lo zot bann *loan* li menm li, aköz zot annan diferan prodwi. Apre si ou kapab dir avek nou kantite letan i pran pou *HFC*, kapab donn enn zot bann kliyan son *loan*? Mersi.

MR SPEAKER

Mersi. *VP*, nou a pas avek *CEO*? Dakor. *CEO*?

CEO RONNY PALMYRE

Mersi Speaker. Parey mon'n dir mon pou fer zot ganny sa bann lenformasyon lo bann detay. Me selman en keksoz ki merit ganny fer sorti se ki komansman Zanyve, Gouvernman pe *subsidize* lentere sirtou lo *housing loan*, pou bann dimoun ki ganny par anba R20mil.

So, dan plas pey 7 oubyen 8 pousan zot pe pey zis 6 pousan. Apre pou note bann pansyoner pa pey lentere, sa osi Gouvernman i *subsidize*.

Apré, bann lezot i reste parey Parey pou bann *HIL* i ankor 10poursan, akòz zot *risk* i en pe o, so sa i en pe, *ok*. Mersi.

MR SPEAKER

Thank you. Mon a pran en kestyon lo sa kote. Onorab Gill?

HON CHURCHILL GILL

Mersi Mr Chair. *As much* ki nou apesye lo kantite prodwi ki nou pe ganny eksplike la i annan, me selman mon krwar nou bezwen get en kou kantite dosye, ki dimoun pe espere - la mon pe koz pou Baie Ste Anne, *process* i dousman.

Mon pa konnen ki vreman problem, me selman petet ler nou pe travay lo sa bann nouvo prodwi, ti a bon osi nou get en kou nou *process* anndan. Ki mannyer nou *process* si petet pa devret aziste, akòz sa kantite prodwi i kler ki i pou *attract volume* travay tou, alors, petet ti a bon get sa prosedir entern, pou asire ki bann dosye i bouz bokou pli vit. Mersi.

MR SPEAKER

Mersi. *VP*, panel i anvi adrese?

VICE-PRESIDENT AHMED AFIF

Mersi Mr Speaker. Mon ti a kontan zis dir Onorab, pou dir,

i annan en proses ki met an plas avan i ariv kot *HFC*. Par egzant, si i en *loan* lakaz, finansman pou lakaz, souvandfwa i annan en rev ki ganny fer lo nivo Minister li menm.

Se apre sa ki *case* i ganny anvoye devan *HFC*. Ler mon pe koz avek *CEO* i dir mon i pa okouran i annan bokou ka ki pe ganny retar kot *HFC* li menm.

I posib kot Minister Later, i annan serten problem dokimantasyon ki manke, me selman avek ou permisyon Mr Speaker, mon a permet *CEO* donn lezot leklersisman. Mersi.

MR SPEAKER

CEO, kot nou ete? *CEO*.

CEO RONNY PALMYRE

Mersi. I vre ki bann *vetting* ti ganny fer kot Minister avan, akòz i annan bann parey ou bezwen annan sa *personal contribution* ki ou'n fini gannnen.

Me selman bann ki ti get televizyon yer swar, ti vwar pou dir nou pe al aboli sa, prezan bann laplikasyon pe vin direk kot nou dan plas tou Minister, e sa mon krwar i ava adres enn bann problem kot ti annan sa bann retar, mank

kominikasyon, bann keksoz koumsa.

Me selman mon ava targete spesifikman pou Baie Ste Anne, selman nou pa *aware* si i annan bann *case* lo kote Baie Ste Anne, ki pe tarde.

MR SPEAKER

Mersi CEO. Onorab Woodcock.

HON WAVEL WOODCOCK

Mersi Mr Speaker. VP, ozordi *the guarantor model* i en *model* ki *increasingly* pe *become outdated*. I *risky*.

Ozordi, dimoun pa le vin en *guarantor*. Annefe mon apresye bann nouvo *scheme* ki zot met an plas, sirtou pou bann *home carers*. Me diskisyon ki mon annan avek plizyer dimoun dan distrik, ler zot pe al fer, zot pe *apply* pou ganny en *loan*, zot pe ganny difikilte pou zot ganny en *guarantor*. Dimoun pa le vin en *guarantor* ozordi, aköz zot vwar zot *end up* pe pey *loan* en lot dimoun.

So, *going forward*, eski zot pe mazin pou entrodwi bann nouvo *model*, parey *re pricing* kot lentere i baze lo ris *profile* sa aplikan. Ouswa, bann lezot *model*, aköz definitivman *guarantor*, mon enn mon dimoun, mon vwar li vreman difisil sirtou bann *carer* pou zot

kapab ganny akse avek *loan*. Mersi.

MR SPEAKER

Mersi. *Panel*, VP, ou a kontan adrese?

VICE-PRESIDENT AHMED AFIF

Wi, Mr Speaker, mon antyerman dakor avek Onorab, ki deplizanpli, i difisil pou ou ganny *guarantor*. E, se pou sa rezon ki dan Gouvènmman li menm, nou'n sey trouv fason pou ed bann ki en pti pe pli, plis lo kote *risk*, byen persepsyon ris lo kote lenstitisyon finansyel parey bann dimoun pansyoner, aköz zot laz se zot kou lentere i ganny sib mansonnen par Gouvènmman.

Sa ti bann fason ki nou, nou santi nou kapab antre pou ede. Lot fason se, mon mazine si lasirans osi, lasirans osi a en serten moman i kapab met en, ou fer en servis kot i donn en garanti lo repeyman, zot apel sa en proteksyon lo sa lipotek.

E si sa i kapab marse byensir tousala i vin avek en pri, nou bezwen balans li, mon pa konnen si CEO i annan lezot fason ki zot ti pe mazine *HFC* ki kapab ede, me selman i en konsern reel. Mersi.

MR SPEAKER

CEO, i anvi azout keksoz.

CEO RONNY PALMYRE

Wi, mersi. An Zanbye ler nou'n fer sa bann revizyon prodwi avan sa ti bann *unsecured loan*, bann ki pa met lipotek lo la se *guarantor*, me la nou'n sanz en pe, i vin en restriksyon. Me selman *still* nou ganny problemm akoz par ler bann dimoun ki pe *apply* sa bann *loan*, later pa pou zot; i annan problemm zeritye, me si later i pou ou dan en lanplwa stab, nou kapab pran en restriksyon sa ki en *guarantor*.

Akoz, i vre konmela i difisil pou ganny en *guarantor* sirtou avek sistenm *CIS as soon* ki en dimoun i *default* ou non, kantmenm ou en *guarantor* i pou mont lo *CIS* e pou pa pou ganny sa ki ou pe rode, me selman nou pe eksplere bann lezot opsyon, me selman i en pti pe limite.

Akoz lanvironnman ki nou, nou *operate* ladan i en pe *high risk*, so nou annan en devwar pou fer sir ki larzan osi ki nou pe donneren *out there*, nou pe kapab rekipere. Mersi.

MR SPEAKER

Mersi. Bon, mon bezwen termin la pou sa keston mon ava envit bann Manm, ki annan lezot keston pou ekrir *CEO*, e zot a

ganny en repons silvouple. I reste mon de keston mon pe vremen *run out of time*.

Mon remersye Mr Palmyre, e osi SS Payet, wi, mersi bokou, e bon depar, e bonn kontinyasyon. E an menm tan *Hansard* Raporter i ava apel nouvo delegasyon.

MR SPEAKER

Bonzour, e byenveni Mr Ashik Hassan, *CEO Seychelles Trading Company*, ki'n zwenn VP, pou pran sa keston nimeron 65. Onorab Michel Roucou.

HON MICHEL ROUCOU

Mersi Mr Speaker. *Welcome CEO*, Mr Speaker, mon keston i al koumsa, eski Minis i kapab donn Lasanble en kontrandi lo travay ki *STC* pe fer, pou ede anmenn en rediksyon pri lo bann materyo konstriksyon, e osi lezot komodite? Mersi.

MR SPEAKER

Thank you. VP?

VICE-PRESIDENT AHMED AFIF

Mersi bokou, Mr Speaker e Onorab. Mr Speaker, atraver lenportasyon stratezik, ensi ki en bon zesyon dan lasenn lenportasyon, sa pe fer ki ozordi *STC*, pe kontinyelman kapab pas en gran parti sa bann

lekonomi, *savings* ki nou apel li avek son kliyan.

Pou bann endividi e osi pou bann *business* lokal, bann materyo kle parey *welded mesh*, *plywood*, *cement board*, tiyo valganize, ek fey tol *zinc alum*, i parmi bann prodwi kot *STC* son pri i tre konpetitiv. E souvandfwa pe ganny vann menm par anba pri mwayenn lo marse.

Par egzanp *STC* pe vann en fey *welded mesh* 10 milimet, R1,435, tandis ki pri mwayenn lo marse i R1,654. *STC* pe vann en longer dibwa 9 par 2 - R102.25, e pri pli pre lo marse i R110.

Mr Speaker, *STC* i annan plan pou amelyor son kapasite pou garanti materyo konstriksyon abordab pli souvan.

Tou resaman *STC* in agrandi son depo lavant materyo konstriksyon lo La Digue, sa i avek bi pou satisfere demann nou bann zabitan Digwaz. Sa lagrandisman in fer ki *STC* in plis ki double son kapasite pou stoke, e vann materyo konstriksyon lo sa zil.

Menm proze lagrandisman i ekspekte ganny materyalize pou depo materyo konstriksyon lo Mahe, ensi ki konsiderasyon pou enn lo Praslin.

An se ki konserne bann lezot komodite, mon oule enform sa Lasanble atraver ou Mr Speaker, ki *STC* i fer resers lo marse komodite lokal tou le semenn, pou asire ki son bann prodwi pe ganny vann a bann pri ki tre konpetitiv.

Sa resers lo marse i kouver plis ki 150 prodwi esansyel, enkli prodwi kategori 1. Tou sa lenformasyon resers lo marse i ganny met ansanm, e evalye pou pli byen konpran pozisyon *STC* par rapor avek lezot pri lo marse lokal.

E foudre note ki sa i en konponan kle parmi bann stratezi *STC*. Resers marse etern i montre ki *STC* i swa pli konpetitiv, oubyen par anba pri mwayenn lo marse pou laplipar son bann prodwi.

Tel ki delwil *sunflower*, karot, sou, mandarin, *baked beans*, dipen blan *slice*, dile anpoud, vineg blan, *persil*, perds- pardon eksetera. Baze lo sa Mr Speaker, i kler ki pri *STC* i ganny servi koman en referans lo marse lokal.

E i enportan pou note ki pri *STC* i ganny konsidere koman en pri rezonnab, akòz i enkli sa apepre 20poursan, *retail market* ki la mazorite marsan i sarze lo zot prodwi ki ganny vann dan zot magazen.

Par egzanp, laplipar marsan ki aste an gro avek *STC* i apre azout en mwayenn 20poursan, ler zot vann sa bann prodwi dan zot magazen *retail*. *STC* i osi annan en lalis 14 prodwi kategori 1, ki bezwen ganny vann lo *maximum retail price (MRP)*.

Sa i legalman obligatwar. Laplipar marsan pe respekte sa *MRP*, e sa i ede pou ki marse i swiv pri *STC*. Sa i vedir ki san dout atraver lentrodiksyon *MRP*, sa pe osi zwe en rol efikas pou ede fer pri komodite debaz, reste abordab lo marse lokal.

I enportan note ki *STC* i osi kouwer fre transportasyon ek lezot lozistik, pou asire ki pri lo Praslin ek La Digue i reste parey avek pri lo Mahe.

An plis ki sa Mr Speaker, prodwi kategori 1, *STC* in osi fer rediksyon sibstansyel lo lezot prodwi esansyel. Par egzanp, *STC* in redwi pri fromaz *craft*, 250 granm par apepre R20an Zanve 2025.

Savedir in sorti R60an mwayen lo marse lokal pou vin R39.50 sou, ki reprezant en rediksyon apepre 33poursan. Sa in ariv atraver bann bon negosyasyon ki lekip *STC* in annan avek bann fournisseur enternasyonal, pou anmenn sa prodwi Sesel a en pri pli abordab posib.

Sa travay in fer desann pri, i en travay ki *STC* in komanse, e en pe lannen pase i anliny avek son manda, sa i en travay ki pou kontinyen. An Mars 2025, *STC* ti lans kanpanny “*Shop Smart, Save Big*” pou redwi pri lo serten prodwi esansyel tou le mwan kot sityasyon i permet.

Lobzektif par deryer, se pou permet tou fanmir Seselwa benefisye avek sa atraver en rediksyon. Serten legzanp i konpri zoranz, in sorti R30 par kilo pou ariv R23 par kilo.

E osi en pake disel 500 granm, in sorti R4.50 pou ariv R3. *STC* in osi entrodwi “*Mid Month Sale*” kot serten pri son bann komodite in osi desann ver milye le mwan. Sa kanpanny in komanse depi Mars sa lannen. *STC* anvizaze kontinyen ek sa linisyativ.

Dan tousala Mr Speaker, *STC* i fer sir ki i pa kit okenn son bann kliyan deryer. Byen boner sa lannen le 28 Fevriye, aktyelman *STC* in rantre dan en nouvo Lakor kot in siny en ed memwar avek *L’Union Estate* lo La Digue. Kot zabitan lo sa zil pe aprezan kapab zot osi ganny prodwi esansyel, e lezot prodwi ankor a menm pri ki konsonmater lo Mahe, pe peye pou sa bann seleksyon prodwi.

En tel linisyativ i vize ver tou son bann kliyan lo Zil Pros, e garanti ki tou fanmir Seselwa i benefisye. Dan lavnir, *STC* anvizaze redwi pri lo plis prodwi ankor. I pe osi fer demars rod nouvo marse, nouvo sours lenportasyon, e nouvo prodwi anliny avek demann konsonmater ki pe osi kontinyelman ogmante.

STC pe kontinyelman form bann partenarya a long term, avek bann fourniser. Olye zis zot fer *spot buying* i pe met plis lanfaz lo valer pou larzan, konsistans, e prodwi de bon kalite.

Mr Speaker, *STC* an se moman pe pas atraver en faz transformasyon pou ranforsi realizasyon son manda. Sa i enkli diferan stratezi, devlopman lenfrastriktir pou amelyor leksperyans kliyan.

Dan kad lanfaz lo amelyorasyon loperasyon kontrol depans *STC* pe ranforsi son prosedir. Sa i enkli redwi letan desarz en *container*, amelyor kordinasyon, e minimiz gaspiyaz.

En aksyon kle dan sa direksyon, se ranplasman progresiv bann vye transpor dan son laflot, e entrodwi transpor pli modern, pli efikas, pli ekonomik. Sa pou ede redwi depans lo *maintenance*,

amelyor distribisyon, e son servis ki ofer.

Tou sa bann zefor ansanm i annan pou bi maksimiz valer, e minimiz gaspiyaz, pou *STC* kapab pas bann benefis direkteman ver son konsonmater. E sa i en kontribisyon enportan pou *STC* dan sa zefor nasyonal, pou ede fer desann kou komodite.

E an rezilta sa, ede gradyelman fer desann pri lavi dan Sesel. *STC* pe osi entrodwi bann nouvo fasilite pou pli byen kapab delivre en servis efikas pou son kliyan. Tre byento kliyan *STC* i a kapab zouir sa nouvo fasilite *cold storage*, ki *STC* pe al ouver pou seksyon lavyann ensi ki pou lavant fri ek legim.

Lo kote *dry goods*, son fasilite *wholesale*, pe osi pas atraver en seri proze renovasyon pou rekouver tou son bann *warehouse* nimerò 1,2,3, ek 4.

Renovasyon in fini komanse lo *warehouse* nimerò 3, ek 4. E travay lo *warehouse* 1, ek 2 i anvizaze komanse apartir 3enm kar lannen 2025. *STC* pe osi revwar tou son bann sistenm refrizerasyon kot son bann fasilite, ki byensir i osi i merit latansyon imedyat pou asir lefikasite dan son servis.

Mr Speaker, tou sa bann proze ki'n ganny fer, e ki pe al ganny fer avek bi anmenn plis lefikasite dan nou loperasyon. E osi amelyor servis pou kliyan i vin a en kou.

Se pou sa rezon ki dan bann lannen presedan *Board STC*, ti pran en desizyon stratezik pou akimil en serten nivo rezerv, ki ozordi pe finans sa bann proze, san ki nou bezwen an det lakonpannyen avek *loan* labank a bann to lentere ki o, e ki pou ekspoz lakonpannyen finansyelman.

Nou le remersye nou bann kliyan ki'n pasyante avek nou pandan sa bann moman difisil. E nou donn nou langazman ki avek sa bann lenvestisman ki *STC* i fer anba sa ladministrasyon nou kliyan pou vreman vwar en meyer *STC* ki pe delivre lo son manda a tou son splander.

Finalman Mr Speaker, i enportan ki nou konpran ki *STC* pa plante li, e i pa prodwi komodite neserman. Sa lakonpannyen i aste parey nenport lezot enportater. Me avek leksepsyon ki annan sa manda sosyal, e non pa zis komersyal.

Alors *STC* pa neserman annan tou kontrol lo pri enternasyonal ki ganny dikte par diferan faktor. Malgre sa,

STC i kontinyen rod bann sours nouvo partner pou travay avek bi pou anmenn prodwi ki pli abordab san fer en konpromi lo kalite, kot i reisir a tenir sa benefis a ganny pase avek Seselwa.

Me kot i pa ankor kapab, oubyen i pa ankor posib donk, i osi pa kapab mentenir en pri ki anmenn pert pou lakonpannyen, parski i osi i bezwen investir. Alor, Mr Speaker, *STC* i reste touzour angaze pou delivre lo son manda e nou annan konfyans ki avek sa lorganizasyon, ozordi nou lo en bon semen, e nou pe pran en bon direksyon. Mersi bokou, Mr Speaker.

MR SPEAKER

Mersi Vis-Prezidan.
Siplemanter Onorab Roucou ?

HOM MICHEL ROUCOU

Mersi Mr Speaker. Vis-Prezidan in reponn bokou mon bann kestyon siplemanter. Be selman *VP*, si ou kapab dir nou ki benefis direk piblik pou gannyen avek sa avek konstriksyon sa nouvo *cold store*? Mersi.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, en *cold store* i pou permet ou premyerman kapab aste an gro, ou kapab aste bokou plis gard li la, e ler pri i bon ou aste, e stoke.

Sa *cold store* i permet ou gard sa prodwi an en bon eta ; savedir a tou moman ou kapab delivre en kalite avek ou kliyan ki pou fer li rantab.

E mon pa konnen si annan lezot lavantaz ankor ki petet CEO, Mr Hassan, i kapab donnen. Me selman nou krwar dan sa lenvestisman i pou anmenn en meyer prodwi, meyer valer pou larzan pou kliyan. Avek ou permisyon Mr Hassan.

MR SPEAKER

Mr Hassan, ou annan keksoz pou azoute.

CEO ASHIK HASSAN

Mersi Mr Speaker. Onorab, mersi pou ou kestyon; mersi VP. Wi, parey VP in dir, annan en fasilite *cold storage* i ed nou pou nou kapab *store* plis. Kekfwa zis pou met a zot latansyon, sa fasilite i enn bann pli gro fasilite *cold storage* ki'n ganny fer pou *store* fri ek legim, ek lavyann.

E anmezir ki sa proze

in devlope, e i pou pare i pou ogmant nou abilite pou nou fer stokaz. E sa i ed ou lo kote *supply disruption*. Akoz si ou annan stok deza dan pei bann *disruption* lo kote *shipping* i pa afekte ou sitan, i osi ede pou ou kapab aste bann komodite ler pri i en pti pe pli ba lo marse, e stok li.

E sa bann benefis i kapab ganny pase avek Seselwa an term pri, stabilite pri. Bann lezot benefis osi, i ede redwi gaspiyaz, an term bann fasilite ki nou ti annan la konmela ki ti en pe vye. E nou ti pe ganny bokou bann *wastage*. Nou osi ekspekte annan bokou plis lefikasite ki i osi minimiz ou depans, e i pou gard ou prodwi parey i sipoze dan e pli bon kalite.

Kekfwa zis pou met devan zot dan konteks, nou kapasite stokaz pou le moman i ekivalan 38 *container* 40 pye. Sa i avek nou bann fasilite *current*. Me avek sa nouvo *cold storage* nou ekspekte ogmant nou kapasite pou ariv 87 *container* 40 pye, ki plis ki doub nou kapasite aktyel. Mersi.

MR SPEAKER

Mersi Mr Hassan. Onorab Loze, i fer dezyenm fwa ou lev ou lanmen kantmenm mon'n *run*

out of time mon a permet ou kestyon.

HON JOHAN LOZE

Mersi Mr Speaker. Mr Speaker, tre bref, lo nou kote nou akeyir lanons ki Vis- Prezidan in fer konsernan *STC* avek *HFC*.

E nou pou ankouraz Lepep Seselwa pou avans devan profite avek bann benefis ki pe ganny ofer. Mr Speaker, eleksyon pe vini *LDS* pe larg dilo. Mersi Mr Speaker.

MR SPEAKER

(laughter)

Vis-Prezidan, eski ou bezwen en komanter lo la? Mersi.

VICE-PRESIDENT AHMED AFIF

Non. Mon krwar Seselwa i konnen pou kit li lanmenm. Alors i *ok*, mersi.

(APPLAUSE)

MR SPEAKER

Mersi, nou a termin la pou sa kestyon. E mon remersye Mr Hassan, *CEO STC*. E mon swet li bonn kontinyasyon, nou annan ankor en kestyon Madanm *Hansard* Raporter ou apel delegasyon.

MR SPEAKER

Mersi Mr Hassan.

MR SPEAKER

Bonzour e byenveni, Madanm, Ms. Nisreen Abdul Majid. *CEO Seychelles Pension Fund*. Mr Davis Laporte, son *Chief Investment Officer*. E zot la pou kestyon 66. Onorab Egbert Aglae.

HON EGBERT AGLAE

Mersi Mr Speaker. Kestyon i lir konm swivan, eski Minis i kapab dir ek sa Lasanble ki bann dernyen demars, e kondisyon bann *tenants*, *Ex-Mahe Beach Kiosk*, swivan bann dernyen kozri ek fon pansyon. Mersi.

MR SPEAKER

Mersi. Vis-Prezidan.

VICE-PRESIDENT AHMED AFIF

Mersi bokou Mr Speaker. Mersi Onorab. Parey Lasanble ti'n deza ganny enformen atraver Minis pou Lenvestisman Lantreprenarya ek Lendistri, Minis Devika Vidot.

Depi Mars 2024, tou bann lokater bann *kiosk* pe lwe, zot lespas atraver en lagreman direkteman avek propriyeter sa landrwa ki fo pansyon.

Fodre note ki oparavan, bann lokater ti pe fonksyonnanba en *sublease* atraver

Lazans Lantrepriz Sesel, *ESA*. Pou le moman i annan zis 3 lokater lo sa propriyete.

Bann lokater in ganny diskisyon avek Fon Pansyon konsernan tou bann devlopman vizavi sa propriyete, e zot in osi ganny averti ki anliny avek lenvestisman sa lenstitisyon sa propriyete sipoze ganny vann.

E sa prosedir deza an mars, e Fon Pansyon pe esper tou laprouvasyon neseser ki ekspekte finalize dan 4enm kar lannen 2025.

I osi enportan pou note ki lokater in deza ganny enformen ki Fon Pansyon pou donn zot sa ki nou apel en *right of first refusal*, savedir ofer zot premye pou aste sa landrwa, ki pou baze lo pri dapre dernyen evalyasyon sa propriyete.

Lagreman pou lwe sa landrwa avek Fon Pansyon i sipoze termin le 31 Out, 2025. E i annan posibilite ganny renouvle ziska ler ki tou bann prosedir lavant in fini ganny fer.

E an se moman i annan serten reparasyon ki pe ganny fer lo sa ban *kiosk* pou gard zot dan en bonneta. Sa bann travay pe ganny fer par faz pou minimiz okenn lenteripsyon dan loperasyon sa bann lokater. Mersi bokou, Mr Speaker.

MR SPEAKER

Mersi Vis-Prezidan. Onorab Aglae, siplemanter.

HON EGBERT AGLAE

Mersi *VP*, pou ou larepons. Premye kestyon *VP*, etandonnen ki semenn pase Fon Pansyon ti fer resorti ki zot pe annan nide vann serten propriyete, *Coast Mahe Beach* i enn *Corail D'Or* lezot, eski dan sa menm *angle* la, ou'n nonmen pou dir zot in bann *tenant* i kapab ganny *offer*. Me selman mannyer nou'n konpran, se ki Fon Pansyon i anvi vann sa landrwa an dan son later avek tou son bann *kiosk*.

Eski ou kapab konfirman si landrwa pe ganny vann *as a whole or each individual* ki anvi aste son *kiosk* i pou annan posibilite pou li aste?

Dezyenmman, avek konversasyon ki zot in fer avek sa 3 *existing* ki an operasyonnel an se moman la, sa ki en enkli annan en *take away*, i annan en landrwa ki vann souvenir ladan, avek en lot ki sipoze ti pou vann delo, eski ou kapab ou'n nonm serten *deadline* la 31 Out, 2025 e ou'n nonm 4enm kar sa lannen osi. Eski ou kapab petet *VP*, aköz i annan serten konfizyon la ki *time frame* ki zot annan sa bann *tenants*, ziska ler prosedir ki zot

in vwar en dimoun, ouswa en lakonpannyen ki enterese pou aste landrwa?

Si anka bann *existing tenants* pa enterese pou zwenn ansanm pou zot aste, eski zot annan en *time frame* ki ou kapab pe donn zot aköz zot osi zot pe bezwen fer bann lezot demars, aköz petet zot anvi kontiny zot *business* dan en lot lokasyon? Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Avek ou permisyon mon a permet CEO donn en pe leklersisman lo si zot pe vann an gro tou le 3. E lo kote *time frame*; *time frame* parey mon'n dir zot lease i fini le 31 Out, i terminen, e li apre sa in donn son lekor 4enm kar 2025, pou li finaliz tranzaksyon.

Me selman antretan kwa ki kapab ganny fer mon a les CEO avek ou permisyon Mr Speaker. Donn leklersisman.

MR SPEAKER

Wi nou a pas laparol ek CEO.

CEO NISREEN ABDUL MAJID

Bonzour tou Manm Lasanble. Mersi pou ou kestyon.

Lentansyon se nou ti pe anvi vann li *as a whole property*. Aköz pou *Pension Fund* sorti. Aköz ki pe arive se si ou vann li an koman endividyel petet pou annan pa ankor pare, i annan pou'n pare sa propriyete pou ankor la.

So, lentansyon se nou pe anvi vann koman en *whole property*. So nou pou annan en *reserve price* pou sa, e dan sa nou ava kapab kominike lo kote *reserve price*. Mersi.

Apre dezyenm kestyon, *regarding* bann *lease agreement*, sa i fini le 31 Out. Me i *renewable*, so i pou kontinyen *renew* ziska ler nou kapab finaliz tou bann tranzaksyon lavant.

E sa nou osi nou pou kominike *coming closer to date of* ler nou pe vann, nou ava kominik avek tou sa bann dimoun, sa bann *tenant* pou dir sa pe vini.

E osi i pou en bon, pou en bon moman pou enform zot pou dir sa lavant pe vini pou met zot pare sa ki enterese pou aste sa landrwa.

E parey VP, in mansyonnen nou pe donn sa *first right of refusal* pou sa bann dimoun. Mersi.

MR SPEAKER

Mersi CEO. Wi, mon pa pou pran lezot siplemanner, Onorab, ou a kapab ganny en-

HON EGBERT AGLAE

Non zis en klarifikasyon, in nonm i pou annan en bout parti, savedir nou ekspekte vwar en *tender or an expression of interest* ki pou piblik soon?

CEO NISREEN ABDUL MAJID

Wi. Normalman nou fer tou keksoz *open tender*. Mersi.

MR SPEAKER

Tre byen. Mersi bokou CEO. Anfen sa ti en kestyon ase lokalize, so mon konpran ki i napa vreman demann pou siplemanner lezot Manm.

Mon a remersye Madanm Ms Abdul Majid, ek Mr Davis Laporte pou zot partisipasyon, me sirtou mon a remersye VP, ki'n avek nou pou en bomaten antye. Mersi pou ou larepons pou kestyon bann Manm.

HON GERVAIS HENRIE

(Off-Mic)

MR SPEAKER

Onorab, ou pe lev lanmen pou en *point of order*. Ok mon a ekout ou *point of order*.

HON GERVAIS HENRIE

Mr Speaker, mon pe *raise* en *point of order* anba 61(1)(d) pou koriz en *misapprehension*, parski bomaten dan PNQ, i annan en Manm lot kote latab ki'n donn en lenformasyon ki fo, ki'n *mislead* Lasanble, ki'n *mislead* Lepep Seselwa.

Letan in dir ki i annan en zenn fiy ki'n anmenn Gouvernman Ankour pou pey R2 milyon, sa lenformasyon Mr Speaker, i pa korek; i pa'n zanmen arive.

I annan en *case* ant en lakonpannyen sekirite ki apel PRA Island Company, avek Local Organising Committee ki en brans operasyonnel en lakonpannyen ki'n ganny *set up* pou sa tournwa Beach Soccer la.

E Gouvernman i pa form parti sa dispit. E sa ki mon kapab dir Lasanble se ki i napa okenn desizyon Lakour ki'n ganny pran pou donn okenn konpansasyon, i napa okenn 2 milyon ki'n ganny peye.

E alor, lenformasyon ki sa Manm in dir bomaten lo *verbatim* Lasanble i konpletman fo. Mersi Mr Speaker.

MR SPEAKER

Mersi, ou *point of order* i on record. Mon pa kapab boul plis ki sa eksepte dir ki'n *rule*, i

eksepte dir ki in ganny dir in ganny rikorde. Mersi bokou. Mersi. Mon swet delegasyon bon depar, e bonn kontinyasyon.

E nou a pran *pause* ziska 2er. Mon a fer Madanm Clerk, remarke ki i annan en pti fot dan dezinyasyon Minis ki pou avek nou apre midi, ou kapab zis korize, e sirkile e petet prodwi en kopi pou Minis.

Mersi bokou, nou a pran *pause*, e nou a rebran 2er edmi.

(BREAK)

MR SPEAKER

Bonn apre midi toulmonn. Nou rebran avek *Second Reading and Public Bill*. Madanm Hansard Raporter ou ava apel Minis ek son delegasyon silvouple.

MR SPEAKER

Bonn apre midi Minis e delegasyon, Mr Roy Clarisse, Sekreter Prensipal pou *Fisheries*. Mr Yannick Roucou, *Legal Advisor Seychelles Fisheries Authority*. Mr Victor Hill, *Assistant Principal Legal Draftsperson AG's Office*. E Madanm Irene Sirame, *Legal Advisor Principal Minister's Secretariat*. Byenveni zot tou pou partisipasyon lo *Fisheries And Aquaculture Bill, 2025*.

E nou pou komans avek Mosyon pou *Second Reading*. Onorab Arissol i pare pou prezant Mosyon.

HON SANDY ARISSOL

Mersi Mr Speaker. Bonn apre midi Mr Speaker, bonn apre midi Minis avek ou lekip tou bann Manm Onorab, e tou dimoun ki a lekout.

Mr Speaker, parey labitid anba *Order 66(2)* mon le *move* ki *Bill Fisheries and Aquaculture Bill, 2025* i ganny lir en Dezyenm Fwa. Mersi.

MR SPEAKER

Mersi Onorab, e *Bill* a ganny segonde. Onorab Esparon.

HON REGINA ESPARON

Mersi Mr Speaker. Mon segonn Mosyon pou ki the *Fisheries and Aquaculture Bill, 2025* i ganny lir en Dezyenm Fwa. Mersi.

MR SPEAKER

Mersi Onorab. E avek sa Minis nou pare pou ekout ou prezantasyon lo *Bill*. Mersi.

PRINCIPAL MINISTER JEAN-FRANCOIS FERRARI

Mersi Mr Speaker. E bonn apre midi tou Manm Onorab. Mr Speaker, ozordi mon prezant devan Lasanble lo Lapes ek

Akwakiltir 2025. Lobzektif sa Lalwa se pou asir konservasyon, zesyon e devlopman dirab resours lapes Sesel, e osi bann materyo zenetik ki ganny tire ladan.

An menm tan nou lanbisyon, se pou protez bann resours maren, pou protez biodiversite lanvironnman ek lekosistenm pou byennet pep Seselwa.

Mr Speaker, Lalwa ki Gouvèrn nou Sekter Lapes ozordi - Lalwa Lapes 2014, ti deza en gran progre dan domenn zesyon lapes. Me la ki sekter in kontinyen agrandi standar in evolye, avek plis lobligasyon enternasyonal ki vin an zwe, in vin kler ki Sesel i bezwen en kad legal ki pli modern, konpreansiv, e fleksib.

Sa nouvo Prozedlwa i rezilta en kantite konsiltasyon. Mon ti a kontan a sa moman la remersye tou bann Manm ki'n partisip dan bann diferan faz negosyasyon, e sirtou bann ki'n prezan pou *Bills Committee*.

Bann ki'n fer bann analiz legal ek alinyman *policy* ki mon *Minister* in fer an kolaborasyon avek Lotorite Lapes Sesel, e ki'n osi travay avek lezot *partner*.

Me se ki pou asire ki nou bann Lalwa i kapab adres bann nouvo defi, ki ozordi loportinite i devan nou pou amelyor

Gouvèrnans Sekter Lapes ek Akwakiltir.

Mr Speaker, mon oule osi met devan Lasanble bann sanzman prensipal ki sa Lalwa pe propoze. Premyerman elarzisman Lalwa e alinyman enternasyonal.

Premyerman Mr Speaker, Lalwa pe ganny restriktire pou vin pli kler, e pli fasil pou aplike. Lalwa Lapes 2014, ti annan 79 seksyon, sa nouvo Lalwa i annan 146 seksyon ki fer li pli konpreansiv, pli aplikab, e ki prepar nou pei pou bann devlopman ki pou vini dan sa sekter a lavenir.

Nou'n enkorpor osi bokou bann lobligasyon enternasyonal sirtou bann rezolisyon Komisyon Ton Losean Endyen *IOTC*, ansanm avek bann Lakor tel ki Lakor lo mezir leta *port, Port State Measures* Konvansyon Nasyon z-Ini lo Lalwa Lanmer *UNCLOS*, e Lakor lo bann *stock* pwason Nasyon z-Ini *UNFSA*.

Lalwa 2014 pa ti trans poz sa bann lobligasyon an totalite dan Lalwa nasyonal, e sa nouvo Lalwa pe adres sa mankman. I osi permet Sesel fer kontrol lo bann aktivite lapes Sesel bann Seselwa

e bato anba paviyon Sesel dan delo enternasyonal, annakor tousala avek bann lobligasyon

enternasyonal ki nou pei i annan.

Dezyenmman, promosyon e regilasyon resers lo lapès. Lalwa i rekonnet rol fondamantal SFA ki pa zis koman en regilater, me osi en antite ki angaze dan resers.

Sa nouvo Lalwa i ranforsi sa fonksyon atraver dispozisyon ki donn SFA pouvwar pou fer aprouve, e regle bann resers lo lapès. Enkli resers lo delo enternasyonal lo bann bato Sesel.

Lalwa i osi kouver resers maren ki annan lyen avek lapès enkli prospeksyon maren lo resours zenetik. Sa i enportan Mr Speaker, akòz nou pe evolye dan en faz devlopman lenfrastruktir ki nou pei i anvi met plis lanfaz a lavenir, dan bann lannen ki pe vini lo resers syantifik e devlopman.

Ranforsman seksyon lo akwakiltir;

En lot inovasyon dan sa Prozedlwa se lagrandisman lo seksyon ki Gouvern akwakiltir, ki menm ganny reflekte dan tit sa Lalwa.

Lalwa pe entegre bann prensip sorti dan regilasyon akwakiltir 2020, e met lanfaz lo proteksyon lanvironnman ek soustenabilite. An rekonesan lenportans akwakiltir koman en zefor kler, pou diversifikasyon

nou lekonomi, e nou sektè alimanter, sa Prozedlwa i asir en sirveyans regilatwar konpreansiv.

4: Konbat laspe ilegal ki bann ki pa ganny rapòte, e ki pa reglemante.

Ki nou konnen par sa akronim IUU. Sa Lalwa i entrodwi bann mezir spesifik kont lapès IUU.

Sa i enkli, rapò obligatwar sorti, antre pou tou bato lapès, menm bann ki napa *license*; refiz akse avek *port* pou bann bato ki nou sispekte pe fer lapès ilegal;

Annan lekipman elektronik pou sirveyans, e pou swiv bann bato dan delo Sesel, e bann bato Sesel an deor delo Sesel.

Penalti osi pli sever kont bann ki kas Lalwa:

Sa i anliny avek Lakor FAO lo *Port State Measures* kot Sesel ti premye pei Lafrik pou ratifye. I annan osi bann *fixed penalty* pou lofans miner. En nouvo mezir lentrodiksyon sa bann *fixed penalty* kot zofisye SFA i kapab donn penalti direkteman. Sa i avek bi pou redwi presyon lo sistenm zidisyer, e fer ranforsman li vit e efikas.

Zesyon lapès anba lenpak sanzman klima;

Mr Speaker, nou konn byen ki bann pei leta zil parey Sesel i sibir en kantite ban lefe sanzman klima. Nou lapes i ganny afekte par logmantasyon nivo lanmer, asidifikasyon lanmer, sanzman dan *patern* migratwar pwason, e degradasyon bann lakot, e koray.

Nouvo Lalwa i adopte en laprosesyon baze lo leko sistenm. Anliny avek bann plan spasyal maren, *MSPs* parey nou pou vwar dan sa *Bill*. E i met lanfaz lo mezir adaptasyon.

Lalwa i kontinyen laprosesyon atraver bann plan zesyon lapes kot peser konpannyen lapes, e Gouvernman i travay ansanm dan sa ki nou, nou apel *co-management* nou resours.

Lalwa pe formaliz prosedir *license* ek klarifikasyon klasifikasyon bato. Avan ki en bato i ganny anrezistre kot Lotorite Ladministrasyon Sekirite Maritime *SMSA*, *SFA* pou bezwen fer en *vetting*.

Sa i pa pou ogmant difikilte, me sa i ganny fer an pratik, me la prezan nou bezwen fer sa bann mezir ganny ankadre dan en kad legal pou fer li pli efektiv.

Klasifikasyon bato Mr Speaker, sirtou bann pti bato artizanal i osi ganny rekonnet

dan sa Lalwa, baze lo zot grander e kapasite fonksyon.

Lalwa in met osi lanfaz pou asire ki Sesel i benefisye plis atraver bann Lakor Enternasyonal lo akse avek nou resours lapes.

Sa bann Lakor i bezwen fer sir zot annan plis benefis, e zot anmenn plis sa bann benefis pou Sesel, e pou Seselwa. E osi bezwen respekté bann standar enternasyonal lo sa Sekter Lapes.

Tou operater pou bezwen an konformite avek bann antite lapes enternasyonal, enkli *IOTC*. E agree pou swiv bann mezir soutenabilite avan ki zot ganny akse avek nou delo atraver en lanrezistremant, oubien en *license*.

Zesyon bann rado, ek *by catch* bann *FADs* parey nou dir. Rado i en zouti enportan dan lapes ton endistriyel, an partikilye dan lapes lasenn ki zwe en rol kle dan lekonmi Sesel.

Menm si lapes avek rado i amelyor lefikasite lapes, i bezwen ganny zere pou minimiz son bann lenpak negativ lo bann kaptir aksidantel, e son lefe lo bann leko sistenm maren.

Lalwa i entrodwi mezir spesifik pou zesyon bann rado tel ki, demann permisyon, e

obtenir permissyon *SFA* avan deplway oubyen ramas okenn rado.

I osi *uphold limit* lo lakantite rado ki kapab ganny *deployed* par bato demarkasyon, e bann kondisyon pou swivi, e osi bann mezir pou redwi *risk* pou lapes maren, pou bann lespes maren.

Sa bann provizyon pou pli tar ganny detaye dan regilasyon pou asire ki Sesel i mentenir en lapes sener ki soutenab, e ki byen ganny zere.

Finalman mon dernyen pwen Mr Speaker, i lo teknolozi pou meyer sirveyans, e konformite. Lalwa i adopte teknolozi modern pou entrodwi sistenm sirveyans e fer rapor elektronik, amelyor sa ki nou apel *traceability*.

Met an fors Lalwa letan pe kolekte lenformasyon lo Sekter Lapes. Bato endistriyel an partikilye pou bezwen enstal *EMS* sistenm sirveyans elektronik, enkli *camera* pou sirvey zot bann aktivite.

E ranforsi konformite ek bann regilasyon ki pou swiv, an plis ki sa sistenm rapor elektronik *ERS* pou osi ganny enplimante pou permet bann bato ki annan *license* pou transmet bann lenformasyon antan reel. Sa bann lavansman pou amelyor sirveyans dirabilite

e la transparans dan zesyon lapes Sesel.

An konklizyon Mr Speaker, Prozedlwa lo lapes ek akwakiltir 2025, i reprezant en gro travay, e en gran par an avan pou Sesel sa Prozedlwa i met lanfaz lo bon Gouvernans lo meyer pratik enternasyonal, e lo soutenabilite nou bann resours. I annan sa lanbisyon pou asir en kad legal modern, fleksib, e adapte avek bann realite aktyel.

I osi anliny avek vizyon mon Minister ki vize ver en lekonomi ble ki dirab, ki kontribye ver devlopman sosyoekonomik nou pei, e ki kontribye pou amelyor kalite lavi bann peser tou an respektan lanvironnman natirel.

Nou Sekter Lapes i plis ki zis en sours reveni i en mwayen lavi, en patrimwann, e en responsabilite ki nou devret garde pou bann zenerasyon fitir. Mon demann sipor Lasanble pou zot an faver sa Prozedlwa. Mersi Mr Speaker.

MR SPEAKER

Mersi Minis Prensipal, Minis Ferrari pou sa lentrodiksyon. Nou'n prezan pare pou pas lo deba lo merit sa *Bill*. E nou a kapab komanse, e avek Onorab John Hoareau.

HON JOHN HOAREAU

Mersi Mr Speaker. Bonn apre midi Minis ek ou delegasyon. I fer mwan en gran plezir ozordi pou koz lo sa *Bill, Fisheries and Aquaculture Bill, 2025*. Enn ki ranplas *Fisheries Act 2014*, ki li i ti par kont i ti ranplas *Fisheries Act 1986*. I montre deza ki annan en gran kantite devlopman ki'n arive dan sa seksyon, en seksyon dan nou lekonomi ki anmenn bokou rantabilite, bokou larzan pou pei, en seksyon ki nou a tou pri nou bezwen gard li vivan e osi soutenab.

Mr Speaker, sa Lalwa pou mwan i enn ki ase gro Lalwa e ki'n met en kad legal pou anferm sa seksyon lapes e akwakiltir, ki en fason ki tou keksoz ki anba sa seksyon i kapab ganny *regulated*.

Mr Speaker, si nou get par egzanp, dan son seksyon 5 anba *General Principles* ki koz lo soutenabilite devlopman lapes dan Sesel, i koz osi lo biodiversite lanvironnman ek leko sistenm. Se 3 konsep tre enportan pou nou koman en pep si nou le sirviv - si nou le kontinyen avek sa devlopman lapes pou fer li en lapes ki soutenab, en lapes ki pou dir pou plizyer lannen e deseni, pou nou zanfan e nou pti

zanfan kapab rezouir sa larzan, e sa lavi ozordi ki nou pe viv dan Sesel.

Mr Speaker, ler ou get dezyenm laspe sa Lalwa i osi kontrol lapes, kote ou pou lapes, ki fason ou pou lapes, ki *method* ou pou servi pou lapes.

Alor i kontrol en pe sa *management* lapes li menm, e ki fason ki nou kapab zer sa seksyon dan nou lekonomi, sa sekter dan nou lekonomi dan en fason kot i pou toultan kapab prezerv sa biodiversite, osi ki nou pa pe tro lapes tro bokou, e osi ki nou pa pe tro lapes dan bann landrwa ki kot nou sipoze kit li koman bann *nurseries* si ou le, pou fer bann pti pwason grosi ensi deswit.

So, tousala i bann laspe enportan. I osi annan en laspe domestikasyon bann diferan Konvansyon ki nou annan lobligasyon ver, e osi pe mentenir bann standar enternasyonal. Bann best practices dan sa domenn.

Mr Speaker, pou mwan ler mon pe get sa *Bill*, sa ki mon vwar i enportan e osi ase inovativ se sa seksyon lo akwakiltir. Parey nou konnen ler nou ti pe konstate vwar sa *Bill* ansanm, mon ti pas en lide dan mon lespri.

Premyerman, mon ti pe mazin a lafen dezyenm ger

mondyal letan ki bann syantis ti'n dekouven en *method* pou fer prodiksyon *ammonia* lo en baz endistriyel, tou dimoun ti annan en *euphoria* konmsi ti krwar pou dir avek sa devlopman pou napa ankor lafen dan lemonn, pou napa ankor lafamin. Akoz *ammonia* i la baz bann kemikal ki fer bann fertilite pou later.

Alor leer nou pe get sa seksyon akwakiltir i osi i anmenn sa *sort of hype* dan nou, akoz ler nou pe get li i parey en fason syantifik kot nou kapab fer grosi pwason.

Nou kapab met i dan en *enclosure* pou fer li grosi, e dan sa ka ler nou'n kapab fer li grosi nou kapab miltipliye li la kantite posibil, e osi kapab anmenn en solisyon alimanter pou nou pep.

Mr Speaker, ler nou pe get sa Sekter Akwakiltir i osi annan potansyel pa zis lo kote fer grosi pwason, e pou ganny pwason atraver *farming, farming* pwason.

Me osi i annan potansyel pou nou kapab prodwi bann matyer premye pou farmasetik, sa osi i vreman enportan, e i annan en kantite domenn resers ozordi ki pe al dan sa direksyon.

E i annan son potansyel, parey mon'n dir farmasetik pou

medicine, e osi annan son potansyel pou kosmetik pou bann prodwi kosmetik pou lekor.

Alor, i en seksyon ki i annan bokou resers ki pe al ladan parey mon'n dir. E osi sa Lalwa i prevni si anka i annan resers ki vin a laporte Sesel, oubyen *FSA (SFA)*, e bann lotorizasyon ki fason i devret ganny pran, e ki fason bann lezot enter Minister, ministeryel si oule, i kapab osi donn zot *input* dan sa bann resers, donn zot laprouvasyon dan sa bann resers pou fer ki par egzanp si annan son bout ki annan pou fer avek lanvironnman oubyen lantreprenarya sa bann lezot Minis i kapab osi donn laprouvasyon pou sa bann resers.

E osi fer ki i anmenn serten nouvote dan devlopman oubyen dan sa lespas inovasyon ki nou pe kree dan Sesel pou bann biznes.

Mr Speaker, parey mon'n dir mon annan en pti pe konsern osi, menm si akwakiltir i paret prometan - i paret en fason pou nou ganny bokou pwason dan bann *enclosures*, e pou kapab anmenn en solisyon alimanter.

Me, mon annan serten rezervasyon, serten pti keksoz petet mon ti a kontan petet

Minis dan son rapor final ler apre ki nou tou nou'n debat lo *Bill*, si i kapab adres sa bann pti konsern ki mwan annan.

Premyerman, nou tou nou konnen pou dir sa bann *enclosures* ki annan i en pti pe an deor lakot wi, me selman i osi annan potansyel pou annan *overfeeding* dan sa bann landrwa ki kapab atrakte si oule bann *predator fish* parey reken, bann lespes koumsa pou antre en pti pe o bor lakot.

E i osi annan potansyel pou annan par egzant, dan zot bann ekskremans pwason pou annan bokou nitrojen, e bann matyer ekskremans ki kapab fer ki sa landrwa li menm i kapab si i pa ganny *monitor* byen, i kapab annan bann *algal bloom*, e i kapab osi afekte *water quality* ensidswit.

I kapab osi annan danze antibyotik ki ganny servi pou kapab detri maladi avek sa bann pwason dan sa bann *enclosures* ki kapab antre dan *ecosystem*, antre dan bann *wild species*.

E osi fer ki bann *wild species* ki ti deza zenetikman kapab defann zot lekor kont serten maladi, i kapab afebli zot potansyel pou zot lekor kont serten maladi, akòz zisteman zot pe anmas serten *residue of* sa bann antibyotik.

I osi annan sa *risk* ki sa bann antibyotik i antre dan *food chain*, e i pou nou imen i pa nesesman tro bon. Parski i kapab afebli nou sistenm iminitè dan la menm fason.

E i annan *risk* osi parazit ki kapab devlope parmi ler ou pe grosi en kantite pwason dan menm *enclosure*, i kapab annan sa bann *risk*, i kapab annan *risk* bann *diseased fish* ki kapab e sape nou pa konnen si zanmen.

E i kapab propaz maladi avek ou bann *wild species*. So, i annan en pti pe sa krentif lo kote akwakiltir ki ganny fer bann *enclosures* an deor nou lakot.

E mon ti ava kontan konnen avek Minis, si i annan an se moman bann dimoun, bann syantis dan son departman, oubyen bann teknisyen dan son departman ki kapab zer sa bann problem ki kapab osi fer sir ki pa zanmen, sa bann problem pa zanmen depas nou *limit* oubyen nou kapasite, nou kapasite ki nou annan dan *FSA (SFA)* oubyen dan Sesel.

Mr Speaker, ler mon get ki fason Lalwa i tret sa sityasyon pou *FADs* i fer mwan osi enterese parski, ozordi zour *FADs* i en keksoz ki kapab annan en menas lo nou bann

lakot sirtou si ler i antre o bor later, dan bann brizan.

Kot soudennman ou vwar li pe tyonbo bann *species* ki pe kit bann *species* la oubyen ki e fer ki bann *species* ki pa ganny targete i kapab ganny soudennman ganny trouve dan sa bann landrwa akòz sa bann *FADs* ki trenn zot dan sa landrwa.

So, sa landrwa dan li menm i kapab en dezavantaz, akòz nou pa oule vwar ki serten kalite *species* i vin dan serten lokasyon, oubyen serten i senpleman ki en pe pli feros, oubyen bann *predator fish* ki kapab en pti pe tro pres avek nou bann lakot.

Mr Speaker, alor dan sa Lalwa li menm si en dimoun i anmas en *FAD* ki annan danze lo bann brizan ensi deswit i kapab dan 72erdtan raporte avek *FSA (SFA)* atraver en *email* probableman akòz i dir *in writing* pou dir in anmas sa *FAD*, ki bor in anmas sa *FAD*, e akòz in anmas sa *FAD*.

E sa i fer ki bann *NGO* ki pe ede pou fer sir ki nou bann brizan napa sa bann *FAD* oubyen lo nou bann lans, oubyen lo nou bann *shore line* dan nou *territorial waters* si oule.

I fer sir ki sa bann keksoz koumsa ki vin osi petet en bann

lobze ki bato i kapab tap avek ki kapab vin en danze pou bann ki pe servi delo sale. So, bann ki pe ranmase osi sa i donn zot en lankourazman ki *according to the law* si zot ranmase e zot fer konnen ater i pou napa okenn konsekans.

Me par kont, nou pa kapab zis ale al anmas en *FAD* dan nenport ki landrwa parski Lalwa i fer ki ou pa annan drwa annan *FADs* lo okenn bato, *unless* ki ou annan lotorizasyon avek **FSA (SFA)*.

So, Mr Speaker, ler nou pe gete sa Lalwa i en pti pe an zeneral i kouver bokou keksoz. Me mon ti a kontan osi petet Minis dan son rapor final ler i pe *summing up*, i koz en pti pe lo 79(1) ki donn li sa Lotorite pou li kapab *enforce* sa bann diferan seksyon sa Lalwa atraver lapwentman bann *public service officers, members of defence force*, oubyen *police*, oubyen *any other persons* ki li i konsider nesaser.

So, sirtou sa bout *any other persons* si i konsider nesaser si i kapab donn nou en pe detay lo ki fason sa bout Lalwa i kapab ganny servi.

Mr Speaker, an zeneral mon krwar sa Lalwa i en bon Lalwa. full stop i en Lalwa ki pou ed nou Sekter Lapes devlop plis ankor parey mon pe dir i

annan sa bout inovativ dan *aquaculture* ki pou anmenn nou pli devan.

I en Lalwa ki *foresee* ki annan tou bann diferan *penalties e offences*, me osi pa zis sa i annan en *appeal system* kot si en dimoun anka i santi li i krwar pou dir son drwa in ganny abize i kapab al *through the appeal system*, e rod en solisyon pou son problem.

Mr Speaker, avek sa mon pou remersye e mon krwar pou dir nou pou al dan bon direksyon si nou siport sa Lalwa. Mersi.

MR SPEAKER

Mersi Onorab. Eski mon annan okenn lot Manm ki pou koz lo sa *Bill*? Onorab Aglae.

HON EGBERT AGLAE

Bonn apre midi Mr Speaker. Bonn apre midi Minis avek ou bann *expert SFA, PS*. Mr Speaker, Lalwa ki devan nou i en gro morso lezislasyon mon pou dir ki vreman teknik e an menm tan konpreansiv.

E letan mon ti pe koz ek enn mon koleg mon pe dir sa i parey ou pe regard en *civil Code*, me selman en *civil Code* pou lanmer, pou bann lamarin.

E mon krwar i enportan sa morso lezislasyon ki ava ede etabli bann prensip ki ti deza la

bann fason fer ki ti deza la. Me selman i anmenn en kad legal pli mon kapab dir pli *strong* dan en sans, ki ava etabli sa bann lord.

An menm tan i annan son kotasyon soutenabilite an ver nou bann lespes maren, e bann ki pratik zot travay swa dan fason komersyal, lo nou bann lespes ki annan pou fer avek la maren.

E letan mon'n regard diferan morso parti sa Lalwa in anmenn avek li osi en laspe lavenir ; lavenir savedir proteksyon bann zerans, e osi bann *do's and don'ts* ki egziste ki bezwen ganny in egziste, me selman pa neseserman ti pe ganny pratike, ouswa ti pe ganny polis dan sa *vast* losean ki nou, nou annan.

E pou mwan, mon apresye sa dan en sans aköz tro souvandfwa nou'n tann bann aksyon ki pase sirtou dan nou *EEZ* e tou resaman osi mon vwar lo rezo sosyal bann fason fer ki i poz serten lenkyetid avek nou bann lespes.

Swa nou koz lo *overfishing*, swa nou pe koz lo bann lespes ki pa neseserman annan valer ekonomi ki ganny *discard* dan en fason, e tousala pe ganny pran dan sa Lalwa.

E osi bann *method* lapes ki pe ganny servi ozordi ki swa lo

en baz komersyal ki pe ganny reglemante dan sa Lalwa ozordi, pou mon sa i enportan.

Me selman i annan bann bout ki mon santi mon pou sit enn de taler ki nou kapab petet al pli lwen. Akoz i annan serten parey nou koz lo bann lapès, parey nou bann *tuna vessel* ki zot, zot pou ganny *allow* pou fer serten aktivite avek serten *device*.

Tandis ki nou bann bato ki nou apel bann bato Seselwa zot, zot pou bezwen *adhere* dan en lot kalite fason, e souvandfwa osi Minis letan ou ti koman en Manm Parlman ou ti koz fortman lo size lapès la anndan, sirtou lo bann size parey *FAD*.

So, mon pou tous en pti git lo la ki mon krwar i enportan apre mon a koz lo *aquaculture* en pti git mon osi.

Premyerman, mon anvi koz lo size bann *fish aggregating device* ki'n ganny mansyonnen ladan. E letan mon pe regarde dan sa Lalwa li menm li, i fer provizyon ki i pou annan serten egzansyon ki zot pou donner avek serten aktivite ekonomik lo lanmer.

E Minis taler ou'n nonm *IOTC*, byen - *IOTC* i enn bann lenstitisyon ki pou deservi sa Lalwa, e osi ki pou gid - anmenn

serten gidans dan nou sistenm lapès Sesel.

E letan nou regard *FAD* ki mon, pou mwan in ganny dir dan lepase sa la anndan ki posibilite pou *ban* li konpletman, e ki son reperkisyon, si zanmen i arive ki nou *ban* bann *fish aggregating device* ki annan. Ozordi i *FAD* demen i kapab vin en lot kalite lenvansyon, *you never know* ki kapab ganny servi, *ok*?

E nou konnen osi bann fabrik ki sa bann *FAD* i ganny fer avek se i annan pou fer avek sirtou banbou ki'n vin en lespe ki preski napa ozordi, *ok*?

So, letan mon pe regard sa petet ki reperkisyon i kapab annan si zanmen nou dir be *ok*, eski nou *ban* li net konpletman reperkisyon lo lendistri lapès Sesel. Eski bann bato pou kite pou ale, pa pou ganny pwason? Sa i enn.

E dezyenmman se letan nou koz bann *vessels* Seselwa li, li menm li zot, zot pe dir ki napa drwa dan sa Lalwa pou servi sa, ouswa zot pou bezwen *seek* en lotorizasyon spesyal pou zot kapab serten sa bann *aggregating device*, *ok*.

Apre osi in fer manson ki teknolozi in avanse, *ok*. E plizyer peser ki al lapès ozordi zot servi bann sonder ki zot

detekte kote bann pwason i ete, ki ganny mete lo zot *plot chart* pou zot kapab tras larout direk lo la.

E ladan dan Lalwa i dir ou zot pa kapab servi bann lezot kalite *means* parey bann *aerial means* ou kapab servi parey ozordi nou annan *drones* bann keksoz koumsa, pou al detekte kot pwason i ete bann *aerial view*.

So, pou mwan sa i pou ki rezon petet mon pe mazine ou ki rezon par deryer sa ki ou pa kapab servi sa bann *device* parey pou ou al gete kote pwason i ete?

Kan ou kapab annan bann lekipman abor ki osi detekte kot serten sa bann pwason mon konpran petet bann pwason *pelagic* ki bouz en kantite, me osi i annan bann pwason fon ki nou pe koz lo la, *ok*?

Ki li ou kapab detekte li par bann sonder ki ou annan, osi fer referans lefe sirtou parey lapes i annan lapes i kapab lapes lizour, lapes aswar, e i fer referans avek bann lalimyer ki atrakte.

Mon pa konnen ki zistans teknolozi in arive, zot ki bann *expert* la devan ki kalite ki zot pe konsider bann lalimyer ki atrakte pwason dan en sans, *ok*?

En lot pwen ki mon'n pas lo la ki mon ti a kontan met devan se i ariv souvandfwa kot ban vandaliz i arive avek bann propriyeter bann propriyete bato sirtou, *ok*?

I kapab annan vol i arive, *tampering* parey zot in dir dan zot Lalwa, *ok*? Eski sa pe ganny kouver dan tou son laspe dan en san, ouswa zis serten kategori bato ki pou ganny kouver, ouswa zot pe mazin get tou?

Par egzanp, osi i annan ou'n dir poudir i annan peser i ale i met son bann latrap en zistans pou atrap son pwason, e apre serten i pase ki li i parey en voler mon kapab dir i lev sa ki pou son kanmarad i pran, e i al vann sa ki li gannyen.

So, dan Lalwa pe fer kouver. So, eski nou pe koz lo sa bann kad lapes parey nou bann lapes artizanal ouswa nou pe koz zis bann ki an deor, *ok*.

Osi sa ki enportan dan Lalwa se ki sa rapor kot ou pou bezwen fer konnen mon krwar sa i enportan sa, letan ou pe antre e letan ou pe sorti pou al fer ou bann aktivite lo lamarin, lo lanmer.

Souvandfwa nou'n tande ki plizyer bato in sorti in ale apre son sezour lo lanmer normalman 7 a 8 zour nou tande i pa'n antre.

E *the owner* i komans fer bann resers avek lapolis bann *competent authority* pou rode kote bato i ete. E nou tou nou konnen pou dir Lalwa sirtou atraver SMSA, SFA osi se ki ou bezwen fer konnen letan ou pe kit *port* e letan ou pe antre osi.

E menm legzizans avek bann sistenm la nou pe koz VMS pou ou kapab *keep track*, Lotorite i bezwen konnen ler ou dan delo Sesel kot ou pe ale e osi ariv okenn lensidan nou konnen kot ou ete, e mon krwar sa i enportan.

E ouswa si ou pe ganny akize ki'n arive dan lepase bann diferan lakizasyon pou dir be nou ti vwar ou laba ou'n al fer tel aktivite, sa VMS i kapab ede pou ou retras ou larout kote ou'n ale, kote ki ou'n fer.

So, lo sa size Mr Speaker, mon krwar nou pe al dan bann bon direksyon *ok*, lot bout ki mon anvi koz lo la Mr Speaker, se *aquaculture* mon krwar ki fasin mwan.

Se i en nouvo konsep ki nou pei pe anbark lo la, mon'n ganny sans annan *meeting* avek departman *aquaculture*, e mon salye sa bann zenn *expert* ki laba sa bann zenn profesyonnel ki'n met sa *unit* lo son lipye li menm komans fer *aquaculture* bouze parey in arive ozordi.

Akoz plizyer nou petet pa ti *believe* dan en konsep *aquaculture* Minis menm ti'n deza dir i pa ti *believe* ladan.

Me petet nou osi i annan plizyer Seselwa i mazinen pou dir be akfer nou bezwen al fer *aquaculture*? Nou, nou en pei ki annan sa gran *EEZ* lamarin.

Akfer nou pou bezwen pe al fer bann elevaz pwason ouswa fri demen kan nou annan? Me i annan litilite e nou tou nou konnen pou dir letan nou ti pe fer serten diskisyon peser ozordi i konplent avek sa 2 sezon ki nou annan.

En sezon ki prodiktiv ek en ki *non-productive*, mon kapab dir vandnor, ek vandswet. E dan vandnor nou konnen letan i bon e dan vandnor ki nou pe antre ladan la i fer ki kondisyon letan i pa gou pou peser, e ki fer ki pri zot bann prodwi final i vreman ser.

E ozordi avek en *aquaculture* ki demare i pou kapab anmenn sa balans kot movetan i egziste, e pa pou zis movetan me selman i a fer ki osi dan en fason i kapab *drive the cost down* en pe, e an menm tan kre lanplwa.

E osi asir *availability* bann lespes ki nou konsider bann lespes ki nou kontan bourzwa, nou vye, nou bann pwason ki

nou tou Seselwa nou kontan, *ok*?

E ou pa pou bezwen al sitan lwen osi dan bann letan move pou ou kapab ganny ou prodwi pwason li menm.

Dan en lot laspe osi nou annan bann lespes ki komersyal e ki annan bokou bann pei osi ki pe rode, *ok*. Parey nou annan bann lespes gomon, nou annan bann fri demer ki mon kapab dir i pou ede annan en laspe komersyal ki ava ed bann *business* ki annan lentere ladan.

E mannyer mon konpran *meeting* ki nou'n annan plizyer *business* in vin devan, me *issue* i teren e landrwa apropiye ki mon ekspekte a lavenir nou kapab fer sa distenksyon ant later ki nou pou bezwen pou fer *aquaculture* ek later pou fer bann program sosyal lo la.

Akoz i pou annan son plas a lavenir, aköz i pou enn bann pilye kot i konsern sekirite alimanter nou pei li menm.

E letan mon regard bann provizyon ki zot in mete dan Lalwa pou asire ki sa *aquaculture* li menm li i demare avek en proteksyon legal, i nesaser byensir nou pou bezwen annan plis *expert* sirtou kot i konsern bann *expert* dan bioloji.

Akoz nou pou bezwen nou pe koz ek lanmer, nou pe koz delo nou pe koz bann lespes parey imen nou osi nou lasante i bezwen ganny gete byen, e ladan i fer provizyon pou lasante e *welfare* bann lespes i ganny byen gete.

So, ki mannyer ou fer sa? Nou pou bezwen pe *train* plis bann pti syantis dan en sans, bann ki pou travay dan laboratwar pou fer bann *test* pou get bann konpozisyon.

So, sa sekter li menm li i pou enn ki pou a lavenir, sirtou si bann zenn pe ekout mwan pou konsider zot bann karyer letid dan sa laliny, e sa pou ede ki nou pou annan en lot kalite *job* parey nou dir bann demann lot kalite fason travay ki pou ganny an demann a lavenir.

So, pou mwan Mr Speaker, *aquaculture* pou annan en rol ki pou zwe e distrik Port Glaud, ti'n ganny *earmark* pou en proze, me avek serten sityasyon ki mon'n aprann nou riske pa vwar sa proze demare.

Me a lavenir petet nou a kapab vwar en lot sit pou nou kapab fer sa kalite devlopman arive. E osi an termin an i pran tou konteks bann laspe *fines* ki egziste dan sa Lalwa, e mon'n vwar pou dir i annan en kantite revizyon e bann *fines* i vreman

o tou. I annan i monte ziska 15 milyon, 10 milyon.

I montre *how serious* nou pe tret sa size lamarin. Petet dan lepase nou'n annan bann *fines* ki'n zis R10mil, R5mil ki pa'n neseserman en *deterrent*.

Be letan ou pe get bann *fine* 10, 15, 5 milyon an montan i fer ou definitivman ou pa pou anvi al komet en lofans. Akoz ou pou perdi en kantite ou pou al pey ne kantite menm si ou kapab en lakonpannyen, menm si parey i koz lo polisyon, i koz lo bann domaz lenfrastruktir lanvironnman, i koz lo diferan laspe.

So, pou mwan Mr Speaker, mon pa vwar nanryen mal ek sa Lalwa akoz i en gro Lalwa en kantite keksoz pou regarde ladan. Me selman i pe al dan en direksyon ki mon krwar i pou asir soustenabilite, i pou asir proteksyon nou bann lespes, e osi i pou donn Sesel sa lidantite kot i konsern zerans son bann prodwi lamarin avek son laspe sa gran *EEZ* ki nou, nou annan nou menm. Mersi Mr Speaker.

MR SPEAKER

Mersi Onorab. Mon a pas laparol Onorab Kelly Saminaden.

HON KELLY SAMYNADIN

Mersi Mr Speaker. Bonn apre midi Minis, avek ou delegasyon, tou mon bann koleg Onorab e tou dimoun a lekout.

Mr Speaker, *Bill, Fisheries and Aquaculture Bill, 2025*, I reprezant en lepa kritik de lavan an sa ki konsern sof gard enn nou bann aki pli enportan, e sa se nou bann resours maritim.

Koman en leta zil Sesel in pandan lontan depan lo losean pou provizyon manze koman nou mwayen legzistans ek nou lidantite.

Sekter Lapes i pa zis en pilye nou lekonomi, me in ganny koud dan fabrik lavi Seselwa. An komansman par bann peser artizanal lo nou Zil Pros ziska bann prose ser ton dan *port* Victoria de milye sitwayen Seselwa i depan lo lasante ek soutenabilite lo lanmer.

Mr Speaker, sa *Bill* pe moderniz nou lezislasyon lapes parey Minis in met lanfaz lo la pli boner, e pe fer provizyon en lankadreman solid syantifik e transparan kot zesyon lapes ek akwakiltir i konsernen.

I pe entrodwi bann mekaniz pli strik pou lit kont lapes ilegal ki pa ganny raporte, e ki non reglemante, ki pe kontinyelman menas nou

souverennte nou biodiversite marin ensi ki nou repitasyon enternasyonal.

Pli enportan, sa *Bill* pa pe negliz bann peser artizanal, me i pe asire ki zot bann pratik tradisyonnèl i ganny respekt, pandan ki zot pe ganny entegre dan en stratezi pli larz ki favoriz soutenabilite.

Bann provizyon ki siport konzesyon *reform licensing* ek partisipasyon kominote pou ranforsi nou bann peser pou vin bann konservater bann menm resous ki zot depan lo la.

Adisyonnelman sa *Bill*, pe etabli bann regilasyon kler pou devlopman akwakiltir e par konsekan ouver en nouvo lafrontyer pou sekirite alimanter ek diversifikasyon ekonomik.

Avek sanzman klima ki pe menas nou *stock* pwason ek leko sistenm kotyer, akwakiltir pe prezant en loportinite pou zwenn bann demann kontinyel letan ki bann diferan lanplwa i ganny kree dan en fason soutenab e kontrole.

Sa *Bill Fisheries and Aquaculture* pe osi siport nou bann komitman nasyonal e enternasyonal anba lazanda lekonomi ble, *Fisheries Transparency Initiatives* ensi ki lagreman *Port State Measures*.

I pe osi sinyale ki Sesel i reste en *leader* global dan Gouvènans maritim. Mr Speaker, kestyon ki enportan pou mon demande se dan ki fason kominote peser Au Cap pou benefisye avek sa *Bill*?

Parey lezot distrik kotyer dan Sesel sa *Bill* i vreman signifikan pou Au Cap. Premyèman i pe rekonnet e siport bann pratik lapès tradisyonnèl ki en prevalans dan nou distrik.

I pe promot en lankadremman konzesyon ki pe permet bann peser lokal Au Cap pou partisip direktman dan bann desizyon ki konsern resous maritim. Egalman bann sistenm *licensing* pli senp e zis pou fer li plis fasil pou bann pti peser fonksyon legalman, e soutenab leman.

Dezyenman, i pe osi asire ki bann prosedir *monitoring* ek penalti an sa ki konsern lapès ilegal, non rapòte, e non reglemante i vin pli efektiv.

Mr Speaker, sa lezislasyon pe osi kre lespas pou lenvestisman dan bann sit debark man pwason, *cold storage*, ek bann fasilite *processing* ki zabitan ki dan *business* i byensir kapab partisip ladan.

E i pe osi *promote skills development* ek formasyon pou bann peser, sirtou bann ki pli zenn en travay ki mon asire Minister responsab pou Lapes pe deza *venture* ladan.

An sa ki koncern loportinite dan akwakiltir en propozisyon pou Minister Lapes, konsidere pour kwa pa dan lefitir servi lagon otour distrik Au Cap, pou *venture* dan *fish farming* soutenab ensi ki dan kiltivasyon *algae* byensir avek sipor Lotorite Lapes Sesel.

Fodre note Mr Speaker, ki leko sistenm marin Au Cap, i entegral pou lapes ek tourism e i ganny proteze anba bann lapros zesyon leko sistenm solid.

Sa i asir disponibilite lonterm *stock* pwason, ensi ki rezilyans kont sanzman klima ki an retour sof gard nou ganny pen.

Sa *Bill* pe promot partisipasyon enkliziv tou bann ki angaze dan Sekter Lapes, sirtou bann zenn ki annan lentere dan sa sekter, e i pe osi ouver laport pou bann *grants*, *subsidies*, ek bann *micro-financing*, pou ed bann pti operater kapab agrandi.

Mr Speaker, mon pou dir ki wi kominote peser Au Cap, pou benefisye grand man anba sa *Bill*, an sa ki koncern plis

proteksyon, partisipasyon, ek loportinite. Si i ganny enplimante avek langazman ek lenvestisman konvenab i kapab ede rann pli viv an nou Sekter Lekonomi Ble, an menm tan ki nou pe prezerv nou leritaz kotyer.

An konklizyon mon komann Minister Responsab pou Lapes, pou prosedir konsiltativ enkliziv ki Minis in fer referans lo la pli boner, pandan ki sa lezislasyon ti pe ganny drafte.

Lavwa bann diferan *partner* in ganny tande, nou bann peser lokal, bann NGOs lanvironnman tal, ensi ki bann operater prive.

Mon pe demann mon bann koleg Onorab, pou siport sa Prozedlwa, e annou sezi sa loportinite pou asire ki Sekter Lapes ek Akwakiltir i kontinyen prospere dan nou pei. Mersi Mr Speaker.

MR SPEAKER

Mersi Onorab. Mon a pas laparol Onorab Waven William.

HON WAVEN WILLIAM

Mersi Mr Speaker. Bonn apre midi tou dimoun ki a lekout Mr Speaker, mon pa pou long lo sa *Bill*. Akoz bokou in ganny dir, me i bon ki nou fer nou piblik

deor la konsyan egzakteman kwa ki pe arrive.

E akòz ki Gouvènmàn i bezwen vwar li detanzaot pe amelyor, ouswa sanz amann Lalwa, e anmenn plizyer keksoz baze lo devlopman ki pe arrive pa zis Sesel dan delo Sesel, me mondyalman.

Pou fer sir ki sa mo ki mondyalman i lo azanda tou le zour mon kapab dir se, soutenabilite. Mr Speaker, letan nou pe koz soutenabilite nou bezwen pran kont bann defi ki lemonn, e ki enkli Sesel pe fer fas e pou fer fas avek dan lavenir.

Mr Speaker, popilasyon lemonn i ekspekte ariv 10 bilyon an 2,050 nou annan bann defi sanzman klima ki enpakte osi lo nou lavi maritim lo delo sale, e lo *marine ecosystem*.

Mr Speaker, ki fer ki en nenport Gouvènmàn ki pe swivre an menm tan fer resers, i pou bezwen fer bann sanzman pou adapte avek sa bann realite.

Mr Speaker, i pou annan en base dan lavenir vizavi *stock* pwason deza mondyalman *stock* pwason i anba presyon i anba menas, e par *overfishing*, *over exploitation*, e parey mon dir Sesel pa ganny eparny avek sa.

E Gouvènmàn i bezwen reazir, mon kontan e ki SFA atraver son bann *expert* zot annan an menm tan atraver IOTC, zot pe fer bann travay mervèy.

E la Mr Speaker, mon ti a kontan sezi sa pwèn pou felisit Lasosyasyon Peser Praslin, akòz mon'n vwar dan lepase bann keksoz ki zot in fer, e zot in konpran akòz ki nou bezwen annan serten bann kontrol.

E mon ti a kontan ki nou bann peser zot ganny sansibilize an mezir ki Lalwa i sanze pou zot osi konsyan, e konpran akòz ki serten bann mezir ki bezwen ganny pran pou kapab enn asir sa soutenabilite, e ki fer sir ki zenerasyon ki vini i osi kapab kontinyen lo sa menm larout.

Mr Speaker, sa Prozedlwa i osi pe anmenn lev nivo zesyon e devlopman dan sa sekter *aquaculture*. Par lefe ki ou annan, ou pou annan sa *base* dan lapès tradisyonnel, osi endistriyel dan delo sale, i enportan ki sa sekter *aquaculture* i pran li en lot dimansyon. Akòz baze lo resers in montre ki sa sekter i kapab konplimant sa mankman ki pou annan dan lapès tradisyonnel.

Mr Speaker, an menm tan mon vwar pou dir bokou lanfaz

pe ganny mete lo proteksyon lanvironnman. Akoz an mezir ki sa sekter *aquaculture* pou devlope, par lefe ki nou pe fer li lo *open seas*. E i pou enportan ki sa laspe proteksyon, nou delo teritoryal i ganny met lanfaz lo la, e mon vwar pou dir sa pe ganny pran an konteks.

E parey mon dir se ki la ki enportan ki ganny fer se sansibilizasyon nou bann peser lokal, pou zot kapab enn ; -konsyan kwa ki pe arive, aköz i bezwen ganny fer, e aköz nou bezwen zot sipor pou nou kapab fer li byen.

Mr Speaker, avek sa de pti mo, parey mon dir soutenabilite i enportan zesyon, bon zesyon i enportan e sa laspe konservasyon mon krwar ki Minis, in tous lo sa 3 pwen.

Alor pou mwan Mr Speaker, i bann pwen ki mon tonm dakor avek i neser pou nou fer Lalwa pou nou kapab fer sir ki nou prezerv sa laspe soutenabilite. Mersi Mr Speaker.

(APPLAUSE)

MR SPEAKER

Mersi Onorab. Prosen entervenans Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, ozordi nou pe debat lo en *Bill* ki vremen enportan, ki annee i pou tous tou kours nou sosyete. *Bill* ki nou pe diskite la se *the Fisheries and Aquaculture, Bill 2025*.

En Lalwa ki vadir bokou pou devlopman nou lekonmi ble proteksyon lo resours lanmer. Mr Speaker, lapes i form par nou lavi koman Seselwa, pou nou manze, pou nou sekirite alimenter, pou travay, pou lanplwa.

E lapes i kontribye en kantite dan lekonmi, i anmenn bokou reveni dan lekonmi nou pei, me pli enportan lapes Mr Speaker, i garanti nou legzistans koman en pti leta zil.

Akös nou depan en kantite lo nou bann resours maritim. Mr Speaker, koman en zenn, en Seselwa ki'n ne, e viv dan en fanmir ki bokou nou, nou karyer in lo lanmer koman *captain*, peser, plonzer, *Coast Guard*, *skipper*.

Mr Speaker, la fanmir Grandcourt, Woodcock, e lezot nou fanmir Mr Speaker, ki'n vremen nou konnen ki savor apesye Mr Speaker, nou resours maritim, nou lanmer, pou prezerv nou resours maritim nou lanmer, Mr Speaker.

E anvi bann nouvo defi mondyal ki osi annan en lenpak lo nou pei parey tanzantan souvandfwa nou'n koze dan sa Lasanble, nou'n ratifye plizyer konvansyon bann defi parey sanzman klima, bann defi parey polisyon.

Size *FAD* in ganny souleve par bann Manm ki'n koz avan mwan, bann size ki pe afekte nou pei parey lapès ilegal, *overfishing*, blansisaz koray, e lezot defi Mr Speaker.

An menm tan ki nou pe osi pran kont osi bann nouvo potansyel ki ou kapab dir nou pe prezant avek sirtou avek modernizasyon, lavansman teknolozi.

Parey *aquaculture* ki ozordi nou pe met bokou lanfaz lo la, e koman en pei nou bezwen, nou bezwen en Lalwa pli for, en Lalwa pli modern e osi en Lalwa ki bokou pli dirab, Mr Speaker.

Sa Lalwa pe ranforsi rol *SFA* ki pou vin en parey mon'n dir, parey bann Manm in dir oparavan en *Technical Authority* pou lapès, ek *aquaculture*.

I pou annan plis responsabilite lo *monitoring, control and surveillance* kot i pou angaz li plis dan bann resers lo bann diferan lespes maritim, i pou annan sa *oversight* ou kapab dir lo bann

diferan *Fisheries Management Plans*. E osi pou azir en pti e koman en gid pou bann devlopman dan *aquaculture*.

Par egzanp, Mr Speaker, si en nouvo proze pe ganny propoze pou fer *aquaculture* dan en *coastal zone* i kapab otour Praslin, Mahe, ou La Digue, se *SFA* ki pou analiz lenpak lo lanvironnman fer konsiltasyon avek kominote, e donn en rekomandasyon teknik.

E koz i konsern *FADs* ki Onorab Hoareau, in met en pe lanfaz lo la i en pratik ki mon santi ki i bezwen ganny adrese seryezman ki sa Lalwa i donn li sa Lotorite pou fer sa.

En topik ki dan 6enm Lasanble nou'n koz bokou lo la Onorab Aglae, in dir pou dir Minis dan lepase dan 6enm Lasanble koman en Manm i ti koz bokou, i ti met bokou lanfaz lo sa size *FADs*.

Bann *fish aggregating devices - FADs*, e i en topik ki'n ganny adrese a plizyer repriz dan sa Lasanble ki mon osi mon'n koz lo la. Kot bann bato etranze pe servi sa bann *FADs* pou atir tou, pou atir ton e lezot lespes, e i annan lenpak direk lo bann *juvenile fish*, lo nou *marine biodiversity*, e bann lespes Mr Speaker, ki pa pe ganny targete Mr Speaker.

I annan en lenpak ki'n afekte en pti pe ou kapab dir nou resours maritime plizyer ban lespes maritime dan nou lanmer.

So, sa Lalwa dan son bann provizyon konsernan *fishing methods* i donn Gouvernman pouvwar pou entrodwi bann regilasyon ki kapab *limit* oubyen enterdi serten *method* parey *drifting FADs* sirtou si zot pe menas resours Mr Speaker.

E mon krwar ki nou pei i devret al pli lwen kot nou kapab en sizesyon ou met *seasonal or permanent bans lo bann drifting FADs*.

Promouvwar bann tradisyonnèl, e artizanal, e osi travay avek bann *Regional Fisheries Management Organisation* pou met en pe plis presyon lo nivo enternasyonal osi.

E osi kot i konsern lapes dirab pou protez nou lavenir sa Lalwa i pe pran en lapros plito *ecosystem base* ki vèdir i pe met lanfaz lo protez lanvironnman an zeneral, e pa zis *focus* lo lapes.

I ankouraz servi bann *scientific data collection, stocks assessments*, e prezervasyon nou resours maritim. Zisteman Mr Speaker, dan sa zefor pou ede prezerv nou lanmer, nou resours maritim *weekend* pase

Minis, ti Praslin annefe ansanm avek *Nature Seychelles*, e lezot *partner stakeholders* pou lans en “*Coral Aquaculture Farm*” e sa i Amitie pou asiste dan *recovery of corals*.

Sa en keksoz ki mon apresye ki ou Gouvernman pe pran, akòz nou tou nou konnen ki mannyer nou pe ganny afekte sirtou avek blansisaz koray.

So, i annan keksoz ki deza pe ganny enplimante par nou Gouvernman pou *ensure* ki nou bann lespes maritim, nou bann koray tousala pe ganny serten proteksyon prezervasyon, Mr Speaker.

Me, nou bezwen Mr Speaker, al pli lwen ki sa ki'n ekri lo papyè nou bezwen osi *enforcement*, e nou bezwen plis *compliance*, e met an plas bann mezir kler kont bann ki kas bann Lalwa, etranze ouswa Seselwa ki kas bann Lalwa ki an plas nou bezwen pran plis aksyon avek zot Mr Speaker.

E i annan bokou ki'n ganny fer pou devlopman lapes Sesel sirtou anba Ladministrasyon LDS. Annefe Mr Speaker, zanmen in annan sa kantite devlopman fasilite ki'n ganny met an plas Mr Speaker, lo Mahe, Praslin La Digue, kot ou pase Glacis, Anse Aux Pins, Baie Ste Anne, Grand

Anse, La Digue, dan plizyer distrik ou vwar lenvestisman ki Gouvènmman in fer dan lapès artizanal ozordi.

Kot bann fasilite in ganny met an plas pou benefisye bann peser Mr Speaker, nou bann peser artizanal Grand Anse, Baie Ste Anne, nou'n vwar nouvo *ice plant*, *gear store* plizyer bann fasilite *fuel pump* La Digue fek enstale.

So, nou vwar pou dir i annan osi en lenvestisman ki Gouvènmman in fer pou ede devlop Sekter Lapès, me selman an menm tan ki nou pe devlop sekter lapès i enportan osi ki en lapès soutenab.

E i enportan osi ki nou pran kont sa bout nou lanvironnman, sa bout prezervasyon nou bann lespes maritim e nou lanmer Mr Speaker.

Parey mon'n dir Mr Speaker, devlopman *aquaculture* fode ganny fer dan en fason ki soutenab. Sa Lalwa i met bokou lanfaz lo *aquaculture*, e i met en kad legal kler pou devlop sa sekter san ki i fer ditor lanvironnman, ouswa ki an konfli avek bann lezot aktivite lanmer.

Nou bezwen ankouraz parey mon krwar i annan en Manm in mansyonn in koz lo la boner, nou bezwen ankouraz

bann *small scale* lo *impact aquaculture* parey *farming sea cucumber* en keksoz ki nou kapab al ladan, e i anmenn bokou reveni pou pei.

E serten lespes pwason ki deza serten bann *pilot* in ganny fer dan plizyer landrwa, e zisteman Mr Speaker, kot i konsern *aquaculture* i anna en kantite deza ki'n ganny fer.

I annan bann keksoz ki bann *failure* lepase ki sa ladministrasyon in korize in vini, in met ankor lanfaz lo la pou relans sa bann sekter. Parey zisteman nou konnen Coetivy *prawns farm* Coetivy, laferm kanmaron sityasyon leta ki ti ladan, e sa Gouvènmman ladministrasyon ki la in met lanfaz pou relans sa laferm ki ozordi i profitab i pe kontribye dan lekonomi nou pei.

E mwan, mon santi ki nou bezwen pli aprofondir lo *aquaculture* e kontinyen bouz dan sa direksyon. I pa en keksoz ki move i en keksoz ki bon. Me tou keksoz parey mon'n dir i bezwen ganny fer dan en fason ki byen ankadre dan en kad legal Mr Speaker, ki ganny fer byen Mr Speaker.

So, fode parey mon'n dir i annan *monitoring*. I annan - *zone* in kler kot *aquaculture* i kapab ganny fer larzer ek lespas i ganny servi, zistans

avek labe, landrwa kot i ganny *located*.

E fodre fer sir ki nou bann *coral reefs* i ganny proteze ler nou pe fer sa bann diferan proze. Nou bezwen pran kont tou sa bann keksoz. E i osi enportan ki annan konsiltasyon osi.

So sa Lalwa pe met lanfaz lo bann prensip bonn Gouvernans e mon *happy* ki *Board SFA* atraver sa Lalwa i pou vin pli profesyonnel ankor kot i pou bezwen prezant son *annual reports* ki dayer i deza pe fer.

E i pe ankouraz bokou plis konsiltasyon piblik. Parey mon'n dir ki deza pe ganny fer. Annefe avan ki sa *Bill* i vin devan nou Lasanble, mon konnen ki annan bokou konsiltasyon ki'n ganny fer, e mon osi mon'n *attend* plizyer bann *meeting*.

E mon konnen bann peser in an diskisyon avek Minis e bann lezot *stakeholders SFA*. So, alor nou bezwen fer sir ki tou desizyon ki ganny fer i ganny fer avek plis *stakeholder engagement* parey nou'n komanse nou kontinyen avek sa.

E ki peser lokal i osi form par dan tou bann proses dan tou bann desizyon ki ganny fer fodre nou enkli zot. E nou'n

vwar dan lepase bann linisyativ ki bokou bann peser menm lo Praslin, nou'n vwar nou bezwen vin koz lo la in pran pou sof gard pou protez nou bann resours maritim.

E sa bann keksoz nou bezwen ankouraze. Alor se pou sa rezon ki sa Lalwa ki devan nou mon santi i en Lalwa ki bon, i pou benefisye nou.

Nou pe met tou keksoz dan en kad legal pli profesyonnel ki mon santi i pou benefisye non selman peser, me i pou benefisye nou koman en pei Mr Speaker.

So avek sa de mo Mr Speaker, mon pou siport sa Prozedlwa ki devan nou, e mon demann tou Manm osi pou donn en sipor sa Prozedlwa. Mersi Mr Speaker.

(APPLAUSE)

MR SPEAKER

Mersi Onorab. Mon a pas laparol Onorab Sylvanne Lemiel.

HON SYLVANNE LEMIEL

Mersi Mr Speaker. Mr Speaker, san pou long lo sa dan mon lentervansyon. Mr Speaker, sa ki nou bezwen konstate se ki si tou keksoz ti pe mars byen nou pa ti pou zanmen bezwen annan Lalwa.

Nou pa ti pou bezwen anmenn Lalwa, nou pa ti pou bezwen regilasyon pou bann dimoun fer zot aktivite, oubyen bann lezot keksoz ki nou fer tou le zour.

Ozordi sa Lalwa ki'n vin devan nou li menm, i Lalwa pou Lapes avek Akwakiltir kot i en *Bill* ki Gouvernman pe anmenn pou sey met pou sey ankadre keksoz met keksoz annord nou kapab dir.

Bon, ler nou pe gete sa *Bill* li menm parey tou mon bann lezot koleg in koz lo la i pe fer provizyon pou anmenn zesyon lapes soutenab, e osi devlopman dan sa sekter lapes nou kapab dir e osi akwakiltir ki Sesel li menm pe annan en gran lentere ladan e ki nou pe mazin *venture* en pe plis ladan. E menm ankouraz Seselwa pou *venture* plis ladan.

Letan nou regard sa Lalwa osi Mr Speaker, i koz bokou lo lapes soutenab e sa i en keksoz tre, tre enportan pou nou pei. Akoz Sesel nou pli gran sours lekonomi nou kapab dir apard touris i vin lapes.

E alors i tre enportan pou nou bann peser pou zot lapes ki lapes dan delo teritoryal Sesel ki zot fer sa dan en fason kontrole pou ki *stock* pwason li menm i kontinyen grandi - pa

zis *stock* pwason lezot resours dan lanmer i kontinyen grandi.

E ki nou pou toultan kapab annan sa resours pou konsonmen, e ki osi dimoun i pratik sa lapes ki nou kapab dir dan en fason tre kontrole partou dan nou lanmer.

Mr Speaker, ler nou pe regarde en tel Lalwa li menm i enportan pou Sesel sirtou letan nou konnen ki bokou lapes etranze osi i vin lapes isi dan nou lanmer.

E akwakiltir mon bann koleg in koz lo la ki sa Lalwa pe fer provizyon ladan i en nouvo kalite diversifikasyon ki diversifikasyon *business* mon kapab dir ki Sesel li menm pe ankouraz bann dimoun pou antre ladan, *venture* ladan en pti pe.

E Mr Speaker, ki mon ti a kontan letan nou regarde Anse Royale li men i en distrik ki nou annan bokou peser artizanal. I annan bokou bato lapes, e definitivman sa Lalwa osi i pou konpri pou sa bann peser ki fer bann lapes artizanal akoz zot osi zot al lapes zot tranp kazye kot bann kalite pwason zot atrape.

E sa Lalwa osi i pou kouver zot e ki mon ti a kontan petet Minis ou dir ki'n annan en kantite konsiltasyon *ok*. Anse Royale nou annan nou en

Lasosyasyon Peser, mon pa konnen vreman si ki lenstans kekfwa ki zot osi zot kapab ganny konsilte *in regards to* sa Lalwa.

Si zot in ganny konsilte, si zot in annan en *input* si non Minis petet mon ti a kontan si ou pou kapab petet apre Lalwa i pase.

Akoz nou bezwen definitivman en Lalwa ki pou ki nou bann dimoun nou bann peser pou kapab *abide to*, e ki zot fer sir zot pe fer keksoz ki dwat.

E sa ki mwan, mon pe demande se ki si i pou annan posibilite kot i pa neseserman Minis, me selman letan sa Lalwa i vin an plas kot sa bann peser i ganny met an group - sa Lasosyasyon Peser li menm i ganny met an group, enkli tou sa bann peser ki dan Anse Royale, dan Anse Forbans dan larezyon nou kapab dir.

Ki zot vin ansanm, e ki zot ganny sa Lalwa i ganny pas lo la avek zot sirtou bann morso ki pou konsern zot bann kalite pratik lapès ki zot fer.

Mr Speaker, letan mon pe regarde mon annan en morso dan sa Lalwa mwan ki mon ti a kontan Minis i donn en pti pe leksplikasyon lo la en.

I annan sa bout kot i koz lo egzansyon pou lapès

rekreasyonnel oubyen lapès pwason ki pou nou menm nou servi, kot zot pe dir *subsistent fishing* sa i seksyon 71(4) ok?

Mon ti a kontan petet Minis dan ou *right of reply summing up* akòz sa mon santi i pou tous i tous dimoun ki fer lapès rekreasyonnel, i pou tous peser ki al lapès pou konsonmasyon.

E menm bann dimoun ki pe fer li dan fason *leisure* sa pwason ki zot pe anmenn ater i annan serten, serten Lalwa petet ki zot pou bezwen *abide to*. Ou konpran?

Parey kot i pe dir sa seksyon 4 "*a person who (a) sells, trades, barter, exchanges; or (b) uses, sells or divests to any commercial enterprise, including but not limited to restaurants, hotels, catering businesses, or fish processing establishments, and any fish caught by way of recreational or subsistence fishing activities commits an offence and upon conviction is liable to a fine not exceeding SCR3,000,000.*"

Mon santi Mr Speaker, ki la devret annan en pti leksplikasyon en ti pli eksplisit. Minis, si ti annan posibilite dan ou repons ou al en pti pe plis lo la.

Akoz nou konnen Sesel bann i annan bokou konpetisyon lapes i ganny fer La Digue i organize partou nou organiz sa. Konmsi eski bann kalite pratik koumsa aktivite parey i tonm anba sa ? Konmsi ki donn nou en pti pe plis en pti pe plis detay Mr Speaker, an sa ki konsern sa bann dimoun ki dan sa bann pratik deor, e ki pe ekoute ban ki al fer lapes pou lwazir ki anmenn dimoun lapes pou lwazir.

Pou zot kapab konnen egzaktman pou dir, be Lalwa i dir sa lo sa ki mwan mon pe fer. So, san *dwell* plis ki sa lo sa Lalwa Mr Speaker, mon pou dir ou mersi aköz se sa ki mon, mon ti a kontan Minis i elabor en pti pe plis lo la.

Akoz apard sa mon pa vwar vreman i annan keksoz mal avek sa Lalwa mwan, i zis ki mon ti a kontan ki ou donn en pti pe plis detay ban dimoun ki la deor ki annan lentere dan sa zafer lapes ou donn zot en pti pe plis detay lo sa bout seksyon ki la. Mersi Mr Speaker.

MR SPEAKER

Mersi Onorab. Nou a ekout Onorab Regina Esparon.

HON REGINA ESPARON

Mersi Mr Speaker. Sa Prozedlwa ki devan nou i enn ki

pou asir konservasyon e bon zesyon dan nou domenn lapes. E ki pe viz ver devlopman dirab an menm tan proteksyon nou bann resours maren, e lezot prodwi lanmer.

Mr Speaker, ozordi letan lemonn pe evolye e teknolozi pe avanse lo en lot nivo i toutafe normal ki nou osi koman en pti pei ki antoure ek lanmer nou pa ganny kit deryer.

Me ki nou bouz ansanm avek bann sanzman ki pe arive lo nivo mondyal. E pou fer sa nou bezwen kad legal ki pli modern ek bann alinyman enternasyonal parey Minis in dir nou da son prezantasyon.

E zisteman nou bezwen en Lalwa ki pli konpreansiv, pli aplikab pou adres ban defi ki kapab arive a lavenir.

Mr Speaker, sa nouvo *Fisheries and Aquaculture Bill*, pou osi adres mankman ki annan anba vye Lalwa date 2014. Parski i pou osi regard rol SFA e menm elarzi son rol an mezir ki nou Sekter Lapes i evolye, e i pou vin osi koman en gid ki pou ed SFA dan son bann fonksyonman.

Mr Speaker, en lot laspe remarkab dan sa Lalwa se sa regilasyon *aquaculture* lo en nivo pli larz e konpreansiv, en keksoz ki nouvo *aquaculture*

ki'n ganny entrodwi pa tro bokou letan, me an 2021.

Me kot nou vwar ki'n annan bokou lentere, e mon krwar ki Minister Lapes i devret kontinyen dan sa laliny e donn lankourazman bann dimoun ki anvi lans zot dan sa biznes.

Mr Speaker, en lot lankourazman ki nesaser, se ki mannyer nou angaz plis zenn pou *venture* dan domenn lapes, ki swa *aquaculture*, ki swa lapes artizanal.

I enportan ki nou met divan anba zot lezel, e ed zot eparnye bann difikilte. Pou sa zenn ki li i anvi en pti *loan* parfwa i vir an ron sirtou si i napa komansman, la nou bezwen senplifye keksoz pou ed sa zenn ki annan lentere pou li ganny akse ek finansman.

Mr Speaker, sa Lalwa pe osi entrodwi ban mezir kont lapes ilegal en domenn ki Sesel koman en Pti Leta Zil pa ganny eparnye avek, kot souvan nou vwar kot nou bann vwazen i antre dan nou delo teritoryal pou vin eksplwat nou resours.

E mon kontan ki sa *Bill* in adres osi sa *fin*es pou lapes ilegal pou dekouraz sa pratik. Nou'n vwar kantite fwa kot sa bann bato ki flot paviyon etranze i antre, i antre dan nou delo lapes parey nou reken an gran kantite, set lavyann

eksplwat sa lespes zis pou son lezel.

Nou vwar bann bato *Sri Lankan*, kot zot antre e lapes nou resours an gran kantite, tandis ki nou bann peser artizanal zot bezwen al pli lwen pou zot kapab ganny zot zournen.

E la mon vwar i byen ki dan sa Lalwa bann *fin*es in ogmante pou omwen dekouraz bann tel pratik. Mr Speaker, avek sanzman klima Sesel en zil ki'n pa'n ganny eparnye kot nou osi nou'n ganny afekte ek bann degradasyon koray, ki afekte nou bann resours maren.

La mon mazin nou bann peser Glacis ki lapes zourit. Avek degradasyon dan koray sirman sa pou afekte zot reveni, parski nou konnen poudir zourit i vin anba koray e si koray pe ganny afekte i pou fer ki labitasyon pou bann zourit pa pou favorab.

E zot pou bezwen zot osi al dan landrwa ki pli lwen pou zot ganny zot lavi. Alor i normal ki nou annan en plan zesyon lapes, kot peser i travay ansanm ek Lotorite Lapes pou prezerv zot diber lo zot dipen toulezour.

E soutenabilite i en eleman enportan ki nou devret pe edik nou bann peser pou nou prezerv nou *stock* pwason.

Mr Speaker, ler mon pe koz lo soustenabilite mon osi mazin bann etranze sirtou bann travayer konstriksyon, parey toultan nou tann Onorab Adelaide, dir.

Tou le dimans vwar zot lo nou koray pe ede detri nou ban pti, pti pwason ki viv anba koray. Sa osi mon krwar ki SFA i bezwen get ladan ki mannyer nou dekouraz sa bann travayer etranze pou al detri nou bann resours.

Mon konnen pou dir souvandfwa la lo por lapes zot ti vini avek en pti nilon vin lapes tou sa ban pti pwason dan bor Resif la.

E mon konnen pou dir SFA in met en lord kot zot nepli vini konmela pou vin detri nou bann resours la.

En lo size ki sa Lalwa pe touse se regilasyon e mezir pou adres sa zafer rado ki en keksoz tre enportan pou nou sekter lapes.

E sa bann mezir pou met en pe lord kot rado ava pe ganny servi san ki i koz danze e lenkonvenyans pou lezot peser kot i pa ava vin en nwizans dan lanmer.

Mr Speaker, sa kad legal modern ava osi garanti ki nou lekonomi ble i vin pli dirab e ki sekter lapes i vin pli soutenab. Avek sa de mo Mr Speaker, mon

pou donn mon sipor pou sa Prozedlwa. Mersi.

(APPLAUSE)

MR SPEAKER

Mersi Onorab. Bon, a se moman mon krwar nou a kapab pran en pause e nou a rebran deba 4 er 30. Mersi.

(BREAK)

MR SPEAKER

Bon, nou a rebran e laparol i prezan pou Onorab Sebastien Pillay.

HON SEBASTIEN PILLAY

Mersi Mr Speaker. Mr Speaker, bokou in ganny dir lo sa Lalwa e son bann provizyon dan sa Lalwa. An relasyon avek sa ki'n ganny dir dan Lasanble i bann ki tre enportan aköz premyerman i annan enn de keksoz ladan ki ti dan sa Lalwa ki ti napa avan, *well* ki ti la avan ki'n komans ganny entrodwir ki dan sa *framework* i nesaser annan.

Enn bann eleman enportan pou Sesel ki nou bezwen konsidere se ki bokou lezot pei parey *Australie* ki ozordi zot stok pwason pe *improve*, pe refer, i zisteman aköz zot in kapab entrodwir

serten mezir ki'n permet zot annan serten kontrol serten regilasyon.

E parey Sesel osi, par egzanp si nou pran bann letandir landrwa parey *great barrier reef* aköz *Australie* i annan bann pei ki bord avek zot parey *Indonésie*, zot fer fas avek *illegal fishing* dan en fason konsiderab e lenpak ki sa i annan lo zot i ekstrememan enportan pou zot *fishery*.

Serten lezot pei ki'n tarde pou entrodwir bann mekanizm enportan parey Zapon, zot in war poudir otour zot lakot, zot i perdi en kantite zot bann stok pwason sirtou bann pwason *demersal*.

E prezan lenportans pou Sesel prezan ou bezwen vwar ki mannyer nou fer sa, aköz nou lakot i sa landrwa kot nou bann pwason i reprodwi e bann *spoiling grounds* e se sa ki permet bann pwason apre pou grandi e pou zot re peple bann popilasyon pwason.

Aktyelman Mr Speaker, i annan de lenstans kot ou remarke poudir otour serten *zone*, otour dan Mahe Plateau ban landrwa kot peser ti pe pran bann *catch* zot pe nepli kapab ganny sa bann menm *catch*. Aköz sa bann landrwa zot stok in ganny *exhausted*.

E sa i annan en lenpak pou zot, aköz pli peser i bezwen la pli lwen pou ganny pwason pli *there's an additional fuel cost* e sa kou i ganny pase avek sa dimoun finalman ki vin aste pwason. Se pour sa rezon ki ou tann bokou dimoun dir ou ozordi aste en plak poul i pli bon marse ki aste en pake pwason.

So, i nesese pou nou annan sa bann mezir ki'n ganny propoze, e mon vwar poudir i annan sa pouvwar ki'n ganny donneren avek Lotorite pou zot prekoniz bann grander pwason ki ou kapab tire dan lanmer.

E sa i byen, zisteman pou protez sa bann stok pwason e osi protez sa bann lespes ki nou konnen poudir avek letan posibleman i annan zenerasyon ki pa pou war egzanp en bourzwa ki par lao 10 kilo, aköz si nou tyonbo la kantite zouvenil ki nou pe kontinyen tyonbo e i kontinyen ganny touye, i kontinyen ganny kwi, i kontinyen ganny servi, ou pa pou gannyen *replenishment of the stock*. So lo sa kote i annan bann bon keksoz.

Dezyenmman, an sa ki konsern bann propozisyon pour ki Lotorite i zwe en rol pli proaktiv, sa osi i byen aköz i nesese e la nou vwar poudir nou pe al dan lespri par egzanp

sa ki Lanmerik i annan parey *Florida fishing game* ki enn bann pli prominan dan lemonn ki'n devlop en striktir enportan ki mannyer zot kontrol e fer regilasyon e sa bann zofisye in ganny *train* dan en fason pou zot bord bann *vessel*, *deal* avek bann *illegal fisherman* zot menm sa ki zot bezwen depan lo *Coast Guard* oubyen lezot antite. I annan lenstans ki zot bezwen kan i annan *threat* ki pli larz.

La kot nou an en pti pe problemn la se lo lenplimantasyon, sa Prozedlwa, e lakantite pouvwar ki'n ganny donner avek *SFA* koman Lotorite. E lefe ki Lalwa i donn sa bann zofisye *SFA* en serten kantite pouvwar.

Par egzamp i donn zot pouvwar san en *warrant* pou *board* en *vessel* oubyen pou aret en transpor, ki zot soupsonnen pe anmenn pwason ki'n ganny tyonbo oubyen okenn prodwi okenn lespes ki relye avek sa ki sa Lalwa i konsernen e pou zot kapab aret sa transpor fer en lafouy, sa i bann pouvwar ki zot ganny donner ki byen ki zot in ganny donner. Me selman ler i pou ganny enplimante se la kot nou bezwen regard nou kapasite pou fer son lenplimantasyon.

Enn nou bann problemn ki nou fer *SFA* avek se ki i pou bezwen annan en maryaz resours ant *SFA*, *Coast Guard* e lapolis pou kapab fer sa. Byensir i pou annan en lot Antite, *Parks and Garden Authority* ki pou osi kapab ede dan sa sirkonstans e *Parks and Garden Authority* i deza pe fer zot prop travay an sa ki konsern bann dimoun ki ganny trouve dan bann lespas Park Maren.

Me la nou pa pe koz bann lespas Park Maren nou pa koz plito bann lespas ki an deor en Park Maren. E la kot mon premye konsern i souleve. Resours, lo later i ase mon pa pou dir i pli difisil me i annan mwens kontrent pou ou kapab fer en travay sipervizyon lo later e ozordi bokou bann zofisye *SFA* i deza pe fer sa sipervizyon dan bann diferan landrwa kot bann peser i vin *land* zot bann *catc,h* e zot *actually* regard grander sa bann *catch*.

Me lanmenm la i annan serten problemn e mon vwar zot, mon'n osi vwar e *witness* kot zot in fer zot louveraz dan en fason transparan, pou asire ki sa bann peser i pa zis konpran sa ki pe pase e dan lenstans ki mon'n war ki zot pa'n vin ek en lapros pou *antagonised* sa bann peser atrizanal, aköz se zot apre tou ki nou oule i gannyen *buy*

in apriori pou ede avek sa ki sa Lalwa pe propoze pou fer.

An sa ki konsern bann aktivite ki *involve* bann pli gro bato, aköz i annan bann regilasyon, bann *licensing* ki *involve* aköz zot bezwen *deal* avek bann size kota, i en pe pli *fail* pou SFA kapab fer sa louveraz. Be la kot problem i souleve se kapasite SFA pou li annan resours pou li kapab fer sa *monitoring* lo lanmer.

Mon pa konnen konbyen bato SFA i annan ozordi, sa ki mon konnen se ki *Marine Police* i annan serten kontrent resours *maritime* pou li kapab ed SFA avek bato. So nou pou annan en *overreliance* lo *Coast Guard*.

Si nou tou, si tou bann Antite pe *rely* lo *Coast Guard* e *Coast Guard* pe ede dan relasyon an relasyon avek trafik drog, i pou osi ede avek en relasyon avek *illegal fishing*, i pou ede an relasyon avek lezot aktivite nou pou *overtasked* resours ki *Coast Guard* i annan e nou pou ganny difikilte pou nou kapab fer lenplimantasyon ki an teori ler nou regard lekritir Lalwa i en provizyon legal ki fer sans, ki'n pran bokou letan pou sa bann eksper pou sa bann teknisyen dan SFA pou kapab met li ansanm.

So, sa i en konsern ki Minis i bezwen adrese ki

manner zot pe propoze pou fer ki i annan en *build up* resours probableman- lefe ki nou ptipti Sesel nou pou bezwen fer li dan en fason ki nou *coordinate* sa *resource use*. Me menm si i posib pou annan en *build up* resours dan SFA ki manner nou kapab annan en *build up* resours dan SFA, kot nou osi servi teknolozi pou ed nou avek *monitoring* bann diferan bato ki pe fer diferan aktivite.

En lot eleman enportan sa Lalwa Mr Speaker, se lefe ki nou pa pe zis koz lo proteksyon me nou pe osi koz lo *enforcement*. E la i vin en dezyenm konsern ki mon annan ki mon ti a kontan Minis i adrese, lo nivo sa *enforcement* *once* ou'n fini fer sa *enforcement* nou bezwen koz lo sa *legal finish* ki bezwen arive *regarding* sa *enforcement*.

E enn bann konsern ki ler mon'n koz avek bann dimoun ki *involve, former employees of SFA, current former employees of SFA*, bann dimoun ki *involve* avek Zidisyer, i annan en difikilte pou kapab anmenn bann ka ki ganny trouve *towards* en *legal finish*.

Sa difikilte i pa enn ki'n ganny kree par okenn dimoun me i zis ki koman en pti pei nou bezwen annan ase resours. So, i pou enportan osi ki Minis i

kapab dir nou ki mannyer lo nouvo Gouvernman dan lenplimantasyon en tel Lalwa, zot pe propoz ankor enn fwa en *merger of resources* pou kapab realiz sa.

Akoz i sifi pou tyonbo en dimoun oubyen en endividi ki pe fer sa ki i pe fer, pou annan koman en *deterrent*. So, Lalwa i annan sa konsep ki i bezwen ak koman en *deterrent*. E kote mon vwar poudir bann teknisyen i mazin sa dan son dan en fason tre larz, ler nou regard bann *fines* anba sa Lalwa nou pe koz R3milyon a R10 milyon.

I bann sonm konsiderab ki si ou an amater ou rod detrwa bato ki pe fer en lapes ilegal oubyen en aktivite ilegal, ou pa pou oule ganny en *fine* ki *up to* R10 milyon pou al peye. So, sa i en *deterrent* dan li menm.

Neamwen Mr Speaker, mon annan serten konsern serten provizyon ki trouve dan Lalwa menm ki mon ti ava apresye si nou oule ganny en *buy in* Lasanble, ki sa i ganny eksplike pou nou kapab klarifye ki mannyer keksoz pou marse.

Enn bann premye keksoz Ki mon annan koman en konsern Mr Speaker, se, anba seksyon 79(7), dan sa Lalwa mon pe sey marye le 2 Lalwa an sa ki konsern Lalwa SFA li

menm ki fer kreasyon SFA ek son *Board* e sa provizyon dan sa Lalwa ki la ki donn Minis serten pouvwar pou li apwent bann zofisye Lotorite Lapes enkli ki bann lezot anplwaye sa Lotorite.

E ler mon pe regard Lalwa SFA li menm, son *Board* i annan, i deza annan pouvwar pou li apwent oubyen pou li annan bann *staff* oubyen bann *employees of the authority*. Me dan anba 77(19)(7) nou'n donn Minis en pouvwar, e la mon ti a kontan ki *panel* i eksplik nou kot i kapab *revoke in writing* san rezon - *revoke in writing* san rezon lanplwa oubyen apwentman en dimoun ki'n ganny apwente koman en zofisye Lotorite Lapes.

Mwan mon vwar sa koman i kapab, i fer sans vizavi provizyon sa Lalwa ki la, me an relasyon avek provizyon ki dan Lalwa SFA e lefe ki son *Board* i annan serten pouvwar, mon vwar ki la lefe ki Lalwa SFA li menm i dir ki Minis son rol se donn direksyon *policy*, sa i en lenterferans direk dan loperasyon SFA.

E pour ki rezon ki nou pou donn Minis sa pouvwar si sa bann zofisye ki tonm anba SFA i osi *responsible towards the direction* - i osi responsab an

relasyon ek bann direksyon ki sa *Board* pou donnen.

Savedir ki nou pe dir Minis i *supersede* rol ki sa *Board* i bezwen zwe. So, sa i bezwen ganny klarifye pou nou konpran ki mannyer le 2 Lalwa i marye avek kanmarad, sorti ler nou konsider *the Fisheries Authority Board* ki ozordi an egzistans e ki annan en Lalwa ki'n fini kree.

Dezyenmman Mr Speaker, sa konsep *exercising of powers without warrant* anba leksepsyon 81, e *power of arrest* anba seksyon 80. Mon konpran ki Lalwa in dir ki nou kapab *deputise* en zofisye Lapolis, en zofisye *Coast Guard* oubyen en lot zofisye lo *enforcement* pou pran rol koman en *fisheries officer* - en zofisye sa Lotorite.

Me selman nou osi donn pouvwar en zofisye sa Lotorite pou annan en *power of arrest*. Kestyon *which brings itself* se ki mannyer en zofisye sa Lotorite dan lenstans ki i bezwen *enforce* sa *power of arrest* pou fer li dan labsans en zofisye Lapolis ?

Menm dan en- menm *in terms of exercise of powers without warrant* pou li fer en *search*, aköz si demen ou pou anmenn en *case towards* en *legal finish*, mon pe pran sa as en *layman* la mwan en -

mannyer mon konpran i bezwen annan en *chain* levidans ki ganny *maintain* pour ki sa *case* i kapab ganny met Ankour, i kapab ganny prosekite e i ganny en finisyon legal.

Be pou ou annan sa ou bezwen asire ki bann zofisye ki pou ganny apwente par Minis, dan sa ka aköz in dir Minis ki fer zot lapwentman, mon oule klarifye si *Board* ki fer zot lapwentman oubyen Minis, aköz zot bezwen responsab avek Lotorite savedir son Sef Egzekitiv e non pa Minis - ki mannyer zot pou fer sa si zot napa sa *training*? Zot bezwen annan sa *training* pou zot kapab fer sa travay. So, mon krwar i pou neser ki nou ganny en klarifikasyon lo ki bann resours adisyonnèl ki pou ganny mete, pour ki *SFA* i kapab deblok sa konponan fonksyon ki i annan pou li kapab fer sa fonksyon.

Mon pa pe dir ki demen bann zofisye *SFA* pou bezwen aret dimoun, be nou pe dir zot annan sa pouvwar pou fer li. E ler nou donn en pouvwar dimoun en pouvwar, nou respektè ki sa dimoun i kapab *exercise* sa pouvwar an konformite avek Lalwa pei - an konformite avek bann regilasyon ki annan an plas.

E si nou kapab eksplik sa, *then* i ava donn nou en nide pli kler ki lentansyon Lotorite ki la devan nou ozordi an relasyon ek bann zofisye ki zot pou donn serten bann pouvwat.

En lot keksoz Mr Speaker, ki mon'n note Mr Speaker, se an relasyon avek *the record of fishing vessels* anba seksyon 55. Ozordi la, pou ou annan en *vessel* ki kapab al lo lanmer, mon krwar ou bezwen osi ganny en sertifika avek SMSA, *I stand to be corrected*.

E SFA li- (*I mean* pa SFA SMSA)- *now*, SMSA li menm i annan en rezis li ki *maintain* li, i annan *register* ki i *maintain* li. SFA pou *maintain* en *register*, sa 2 rezis i koz ek kanmarad? Akoz eski SFA i regard *seaworthiness* sa bato? Oubyen i regard zis *the licensing component* of sa aktivite ki sa bato pou al fer?

Tandis ki *seaworthiness* sa bato or son *safety requirements* pou li al lo lanmer, sa i vin louvraz SMSA. Be prezan se SMSA ki pou *delist* en bato. Zot, akoz si en bato, akoz si en bato par egzanp meton mon annan en bato mon ganny en *license* ek SFA pou al fer *sea cucumber fishing* ok.

Mon al fer *sea cucumber*, apre mon 12 mwan SFA i vire i dir mwan ok mon pe *revoke* ou

license. I *revoke* mon *license*, be i pa *revoke* mon *sea worthiness certificate*, mon bato i *still seaworthy*. Mon kapab al fer lezot aktivite avek mon bato, mon kapab met mon bato ver lapas prezan, so mon vin rod en lot *license*.

So, nou bezwen konpran *who is the dog who is the tail* la, akoz *at the end of the day* i bezwen annan en Lotorite ki *maintain* sa lenformasyon e ki sa de lenformasyon i bezwen pe koz ek kanmarad.

E ler mon pe koz sa 2 lenformasyon koz ek kanmarad, en landrwa prezan kot mon santi Lalwa pa'n al pli lwen se ki i pa'n al pli lwen pou li regard, ozordi ou annan ou ler- mon pou vin lo sa pwen an sa ki konsern *recreational fishing* - i annan en kantite bato ki anba HC ki fer *recreational fishing* e osi *sports fishing*.

E sa i en keksoz ki SFA i bezwen regarde akoz en provizyon legal zot met ladan ki'n ganny *raise* par Onorab Lemiel an relasyon avek en lofans ki ganny kree, atraver *uses of en catch*, akoz nou'n dir 'uses' nou'n dir 'lavant', nou'n dir 'barter', nou'n dir 'exchange' in vin en lofans.

Me sa Lalwa pa koz naryen lo la e mon konpran poudir i pou annan lezot regilasyon. Me

lefe ki sa Lalwa pa koz naryen lo la mon bezwen demann Lotorite pou eksplik nou kote nou *stand* vizavi sa?

Akoz ozordi ou annan bann konpetisyon lapès ki ganny fer. Ler sa *catch* i antre i ganny donnen oubyen mon krwar i ganny vann avek en *fish processor*. Teknikman *sports fishing* i pa en derogasyon anba Lalwa, i bezwen en derogasyon separe. Pou mwan sa moman ki nou pe konsidere sa *sports fishing* i *recreational fishing*.

E *therefore* pou ou fer sa aktivite e donn sa pwason sa *fish processor* i kont koman en lofans. So, petet i annan en dispansyon spesyal ki kapab ganny donnen an relasyon ek sa aköz *sports fishing* e *recreational fishing* i en lot fason ki pei i ganny reveni atraver bann viziter, ki zisteman ki oule vin eksperyans sa kalite lapès isi Sesel.

Me lefe ki Lalwa i pa kler lo la e ki mon prezimen pou annan regilasyon, mon ti a kontan ki *panel* i *enlighten* nou lo ki bann regilasyon ki zot pou propoze annan, pou fer ki i ava kler. Aköz nou annan plizyer operater ki'n investir pou zot fer sa kalite aktivite e sa aktivite i enn ki ede pou plizyer fanmir Seselwa ganny en dipen, ganny en lavi ozordi *as we speak*.

Par kont, osi annan sa plizyer dimoun ki pou etann pou fer aktivite rekreyasyonnel, me ki apre pe vann sa pwason dan en fason komersyal. E la kot nou annan en problem. E nou *come back to* - nou *come back to the enforcement issue* e nou *come back to the register issue* aköz zot pa *registered* ek ou zot en HC.

E as en HC as en *high craft* zot annan en *HC number* me ler zot ale, *what they catch* i ganny vann ek en restoran, i ganny vann avek en lot aktivite e ou, ou'n presizeman ekskli sa ganny fer. So eski sa osi ou pe dir poudir ou pe anpese, eski sa pou annan en derogasyon, *which is not clear?*

E en lot keksoz ki annan, par egzanp ou annan sa ki ou apel bann *fishing safaris* ki ganny organize pa zis lo Mahe me lo bann Zil Elwanye. Eski provizyon zot Lalwa pou *extend* tou bann Zil Elwanye kot i annan sa bann aktivite ki ganny fer?

E prezan pou zot fer sa, mon ti a kontan konpran *whether or not* zot pou annan prezans bann zofisye SFA an relasyon avek sa? *Now*, mon personnelman mon krwar i devret, mon krwar tou dimoun i krwar poudir si en Lalwa i la i en Lalwa pour tou dimoun *and*

I think that's the way it should be.

Me selman ti ava bon ki nou klersi akòz pou mwan serten provizyon dan Lalwa ozordi i pa kler. Prezan Mr Speaker, ler nou koz lo sa *subsistence issue* avek sa lapes e Onorab Esparon in *raise* le pwen bann dimoun dan distrik ki al lapes *for subsistence* i tir en zourit *and then* i vann ek en restoran.

Are you saying ki sa osi i ilegal? *Are we saying that, that* osi i ilegal? Akòz mon konpran *the idea of the law* e i en marto ki pou tap tou klou, ptipti, gro, be i annan pti klou ki i pou kase i pou kas latet. So, nou, nou bezwen konpran ki lentansyon Gouvènmman anver sa bann dimoun ki ganny zot *subsistence* koumsa.

I pa ki zot pe kas Lalwa i annan dimoun wi ki abize, e ki al lo plato koray ler lanmer ba i tir nenport ki groser zourit e sa i ede detrir sa lespes, sa stok ki nou annan.

E ou annan, ou annan dimoun ki fer ki dan en fason byen mon pou dir sa byen, ki'n toultan ganny zot lavi kous parey dan bann bokou pei zil e sa i leka. Kestyon i se ki mon konnen i en keksoz difisil pou demande, pou reponn, eski nou pou dir be tradisyon i bezwen

evolye avek nesesite devlopman pou annan serten regilasyon otour li *if that is the case* ki Gouvènmman pe vin avek ozordi an term avek sa Lalwa ?

Sa i en konsèrn ki nesese i ganny adrese akòz i en konsèrn bann dimoun ki petet zot napa en lavwa pou zot koz avek *SFA* lo sa size akòz zot pa form par en lasosyasyon me zot pe fer a aktivite ozordi. E sa ki enportan dan ou Lalwa se ki ou'n dir pou vann en en restoran pou vann li avek en sa, ou, ou'n dir poudir sa i en aktivite ilegal e ou prekoniz en *fine*.

Byensir ou pa pou al *fine* sa bann dimoun, sa group sonm larzan me *still* i reste ki zot pou pe fer en aktivite ki ilegal. *That's what* nou bezwen, nou oule sey anmenn klarite lo la.

Mr Speaker, si nou kapab ganny serten lesplikasyon kler lo serten sa bann pwen ki mon'n souleve e bann pwen ki bann lezot Manm in souleve - tou Lalwa pa- napa okenn Lalwa ki parfe dan son prezantasyon e napa okenn Lalwa ki parfwa dan lafason ki in ganny ekrir.

Tou Lalwa i komans en landrwa e sa i pa dernyen Lalwa ki nou pou gannnen an relasyon avek sa size *fisheries*

management. i pou annan evolisyon e i pou bezwen annan ankor evolisyon. *The more* ki nou *evolve the more* ki nou bezwen organiz nou Lalwa pou nou kapab *meet* bann demann ki la.

Me nou bezwen osi kapab tonm dakor ki si nou, nou annan problem nou annan *issues* avek serten size sa i bezwen ganny trete dan en fason fran e transparan pour ki dimoun i mon pran kwa ki nou pe demande.

Ozordi apre midi mon ti a kontan krwar ki nou pe fer en deba dan lentere tou dimoun ki la deor e non pa en deba pou nou vin *score* pwen politik.

Mon dir sa byen Mr Speaker, aköz si nou oule al dan en direksyon *then* nou tou nou ava al dan en direksyon. Bann kestyon ki ganny demande lo nou kote latab i ban kestyon ki *fair*, ki onnet, e ki demann en larepons aköz i annan en *panel* ki sipoze responsab parey konstitisyon in donn sa Minis son responsabilite pou li fer.

So, li i ava deside prezan Mr Speaker, si i pare pou li *être* en dimoun fran, responsab e donn bann larepons ki responsab *or* apre tou Mr Speaker, i oule vin fer foutbol

politik avek sa ki mwan mon napa problem avek.

Mon remersi ou Mr Speaker ; mon remersi tou bann teknisyen ki'n travay lo sa Lalwa, mon remersi bann teknisyen ki la devan, bann zofisyè legal, mon remersi Minis ki'n fer prezantasyon son Lalwa e nou *hope* ki nou kapab ganny bann leksplikasyon ki neser pou nou gannye pou nou kapab bouz devan avek sa ki nou pe demande an relasyon avek sa Lalwa. Mersi Mr Speaker.

MR SPEAKER

Mersi Onorab. Mon a donn laparol Onorab Bernard Georges.

HON BERNARD GEORGES

Mersi Mr Speaker. Mr Speaker, mon ti a kontan swiv Onorab *Leader* Lopozisyon pou remersye bann dimoun ki'n travay lo sa Lalwa. Mon'n ganny loportinite pou lir li depi komansman ziska lafen parey mon sipoze pa mal parmi nou.

E mon'n realize egzaktman ki kantite travay ki'n la ladan. Alor Minis ou ava silvouple pas remersiman Lasanble avek bann dimoun ki'n travay lo sa Lalwa apard bann manm panel ki nou

remersye direktteman ozordi apre midi.

I pa fasil Mr Speaker, pou ou pran en paz blan e ekrir 154 paz teknik lo en size. Sa mon konnen aköz tanzantan mwan mon ganny demande pou fer li e mon konnen ki mannyer i difisil e mon kapab dir klerman apre midi ki mwan mon pa ti pou kapab fer sa ki sa bann teknisyen in fer avek sa Lawa *Fisheries and Aquaculture* apre midi.

I en Lalwa konpreansiv i en Lalwa ki *wild ranging*, i en Lalwa ki esey anglob dan en sel *text* tou bann *facet* posib sa lendistri kler dan nou pei e sa aktivite ekonomik ki telman enportan dan nou pei ki'n toultan depi premye zour ki bann Seselwa ti vin Sesel in enportan.

Akoz lapès in non selman en sours mazer *protein* ek manze pou nou pep e ki'n toultan été, me i en sours reveni konsiderab atraver son laspe komersyal, non selman lo nivo bann *license fees* ki nou gannnen avek bann etranze ki vin lapès dan nou pei. Me osi e i gou pou vwar *increasingly* par bann Seselwa ki pe travay dan sa sekter isi dan tou son bann dimansyon.

Alor Mr Speaker, mon krwar nou annan en gran

lavantaz e nou annan en gran satisfaksyon apre midi ki se sa Lasanble Nasyonal ki ganny demande pou pas sa Lalwa lo sa sekter osi enportan.

E mwan mon kapab dir ki mon santi mon tre fyer ki mon en Manm dan sa Lasanble ki pe koz lo sa Lalwa, e ki mannyer mon war lapant bann entervansyon ozordi ki pou pas sa Lalwa e ki pou donn avek bann ki servi li en zouti travay enportan, konpreansiv e for.

Mr Speaker, mon ti a kontan zis mon konnen kestyon pa'n ganny demande avek mwan, me mon pa kapab anpes mon lekor reponn sa kestyon tre enportan ki Onorab Lemiel in souleve e ki Onorab *Leader* Lopozisyon in osi pran apre midi.

Clause 71 sa Lalwa i mon pa vwar sa difikilte ki sa 2 Onorab i annan, me kekfw se mwan ki pa pe lir li korekteman. Dapre sa ki mon kapab vwar se ki sa set en *carve-out* pou lapès rekreyasyonnel e lapès sportif. E sa ki sa kestyon i dir se ki pou sa 2 keksoz ou pa bezwen en *license*, pou ou al lapès. So, i en *carve-out*.

Me si dan ou lapès rekreyasyonnel oubyen dan ou lapès sportif ou servi ki ou'n *catch* pou ou fer komers avek,

swa pou ou vann or *whatever* oubyen pou ou servi dan en restoran oubyen dan en lendistri kelkonk a sa mon ava *carve-out* pa egziste ou ti bezwen en *license* pou ou.

E sa i toultan appropriye selon mwan, akòz lapès rekreyasyon, ou al lapès pou rekreyasyon e sa ki ou gannnen koman e ou *catch* ou servi li ou menm oubyen ou donn avek enn de zanmi e napa en laspe komersyal avek.

Me si ou ale ou lapès komersyal oubyen ou lapès sportif e ou *catch* i telman gran ki ou fer en komers avek, a sa moman la ou bezwen *license* e mon krwar i toutafe normal akòz sa *carve-out* se pou dir bann dimoun ki fer sa pou *sport* oubyen pou rekreyasyon zot, zot *ok*.

Me selman si zot servi sa kouvèrtir aprot e rekreyasyon pou zot fer en komers dirèkteman ou swa endirèkteman kekfwa lezot en propriyeter en restoran ki al lapès e ki servi sa *catch* dan zot restoran a sa moman zot bezwen en *license*.

Be *panel* i ava dir mwan si mon annan rezon ou si mon napa, me mon ti ava ed mon 2 koleg avek mon lèntèpretasyon ki parey mon'n dir i en kèsyon byen valab ki'n ganny

demande, akòz sa ki nou pa ti anvi war set egzakteman sa ki Onorab Lemiel i pe prekonize se ki ou ale ou lapès pou a pou komers pou ou detant, oubyen pou lwazir, oubyen pou *sport* epi ou komet en lofans ler ou fer en keksoz e ou ganny en *fine* sepa mwan konbyen milyon Roup.

Sa mon pa krwar i lentansyon, e si i lentansyon Minis mon ti ava demann ou koriz nou oubyen koriz sa Lalwa e fer sir poudir sa pa leka.

Mr Speaker, mou pa ti anvi al dan en kantite repètisyon lo okenn keksoz apre midi, bokou keksoz in ganny dir e bokou keksoz in ganny koze lo sa Lalwa. Onorab Hoareau mon krwar in fer en zoli detayman sa Lalwa ki swiv sa ki Minis limen ki in fer. Me mon ti a kontan zis tous enn de laspe sa Lalwa ki mon war i enportan. Enn se sa mo soutenabilite.

E se a sa, sa mo mon krwar pli enportan dan sa sa Lalwa e bokou nou nou'n koz lo la depi bomaten e mon krwar nou tou nou'n vwar lenportans sa mo soutenabilite, akòz paret Onorab Pillay in fer- in dir apre midi ou pa anvi ariv en sityasyon kt ou lapès ou pou telman lapès an bonnavini san annan en lobzektif ki popilasyon pou *crash*.

E annefe popilasyon bann lespes pou *crash*. Parey nou'n vwar dan plizyer ka *Rodrigues* par egzanp nou pou konnen ki zot lapas zourit e ti'n *crash* e la prezan zot in bezwen met en sezon e asire ki i pa ganny eksplwate e nou tou nou konnen ki dan Atlantik Nor bann *outer banks* sa bann lespes kord li osi i ti *crash* a en serten moman.

E resaman atraver *IOTC* ti annan sa deba eski ton zonn pe *crash* li osi oubyen eski sa ki nou pe pran i tolerab e donk mon kontan vwar ki sa mo soutenabilite i sa mo kle dan sa Lalwa.

E ki tou sa ki nou fer nou bezwen fer li dan en fason soutenab pou bann zenerasyon ki pou swiv nou. Nou pa kapab regard nou eksplwat sa ki nou kapab gannyen ozordi pou nou tir larises oubyen pou nou manz byen e ki bann lezot dimoun ki pou swiv nou i ava viv dan lapovrete oubyen i ava mor lafen aköz nou, nou'n egois e nou nou'n pran tou sa ki zot bezwen.

Donk sa, premye pwen, e nou vwar sa Mr Speaker, mwan mon pe lir, mon pa pe lir Lalwa la mon pe lir *the objects and reasons* i en *explanatory statement* ki absoliman

ekstraordiner dan lafason ki in fer sa.

Dezyenm pwen ki sorti ladan se ki nou pe parey nou'n deza fer pou pirat, sa ki nou pe fer la, nou pe *extend* Ziridiksyon Sesel an deor teritwar Sesel. E sa i rar, i rar ki sa i arive, i rar ki en pei i dir ki i pou annan ziridiksyon lo sa ki pase an deor son teritwar.

E nou, nou pe fer sa dan en fason *limited obviously*, me sa ki pe arive *beyond national jurisdiction* si i annan en lenpak lo sa ki nou fer anndan dan nou *jurisdiction*, nou Lakour pou annan drwa ziz sa bann forfe, sa bann kas Lalwa ki pe arive.

E sa ankor *set* en nouvo ledan ki nou pe mete pou morde e pou asire ki se pa zis nou ki viv dan soutenabilite, se pa zis nou ki promouvwar soutenabilite, me nou fer sir ki bann lezot dimoun ki pe lapas an deor zot osi zot bezwen konsyans ki nou soutenabilite e si zot pa fer li zot ava reponn avek Lalwa dan lafason ki zot devret.

Mr Speaker, lapas parey mon'n dir i en sekter enportan. E sa ki mon kontan avek sa Lalwa se son *range*, e tou sa ki nou bezwen e fer se regard sa 154 lartik, sa 154 *clause*, sa 154 seksyon, oubyen paz ki dan

sa 140 ekek seksyon dan 154,155 paz.

E nou ava vwar en fason regarde, en larsitektir si mon kapab servi sa mo ki fer en kantite sans. Sa Lalwa i komans avek konservasyon *management* ek devlopman dan en fason soutenab. E bann premye *clause* 6, 7, 8 eksetera i koz lo la, i koz lo dezir bann *zone* kot nou pou kapab fer serten keksoz, bann *area* kot ou pou kapab fer keksoz bann Lalwa Lanvironnman Maren ki pou bezwen ganny swiv.

Aprè i ganny swiv par en seri *management*, ki mannyer ou pou *manage* bann *bycatch* akòz zot osi zot enportan. Si ou pe lapès en ton e ou atrap en lot, ou atrap en lot kalite pwason ki ou pou fer avek sa pwason akòz li osi i antre dan sa konsepsoustenabilite.

Ki mannyer ou pou *manage* ou resous zenetik, ki mannyer ou pou *manage* bann bato ki lapès avek bann *gear* ki zot annan lo zot bato, ki mannyer ou pou *manage* bann *FAD*.

E nou koz bokou lo *FAD* e zot tou zot konnen Minis sirtou ki mannyer mwan mon lager pour ki bann, pour ki *FAD* en zour i ava nou pou nepli koz lo la me antretan akòz nou bezwen *play hard* lapès reel,

nou bezwen gard li pou en peryod letan me avek en loptik lo ki mannyer nou pou kontrol li e ki mannyer evantyelman nou pou kapab tir li.

Aprè i annan en seri proibisyon, bann keksoz ki ou pa kapab fer, *shark* fin, *driftnets*, bann *nets* ki *ghost fishing* lotrozour dan *Bills Committee* nou ti annan sa konseps *ghost fishing* kot en lasenn i zis *drift*, akòz ou'n perdi li oubyen sa bato in koup li in les li *drift* e li i kontinyen atrap pwason ki personn pa pou rekòlte me ki zot pou mor.

E mon ti a kontan Mr Speaker, a sa moman remersye e felisit *Bills Committee* pou sa travay eksepsyonnel ki zot in fer lo sa *Bill*. Zot in fer en kantite travay e tou bann Manm lo sa komite in angaz zot lekor, mon'n pas en pti git letan avek zot e mon'n vwar pou mwan menm ki mannyer zot ti enterese e zot in travay.

Aircraft pa kapab servi *drone* e ou pa kapab servi lalimyer artifisyel eksetera. Tousala i annan en seri proibisyon pou fer sir ki sa soutenabilite i reste primordyal dan sa ki nou pe fer. Aprè i annan bann *requirements* ki mannyer *gear* i bezwen ganny garde lo bato, ki mannyer bann bato zot menm zot antre dan

por, ki mannyer zot bezwen kontinyelman dir kote zot ete pour ki nou konnen ki zot pe fer e ki zot pa devret fer.

Access, apre nou annan sa seksyon lo *aqua* kiltir, ki parey in ganny dir mwan mon pa pou koz lo la apre midi aköz mon napa konpetans pou fer li. Me i en sekter ki an devlopman e i bezwen ganny *regulated* li osi, alor i annan son par dan sa *Bill*.

E apre tousala Mr Speaker, nou ankor *still* lo seksyon 50. Savedir i annan en kantite, kantite keksoz ankor. Ki mannyer i pou anmas *data*, statistik lenformasyon. Aköz soutenabilite i bezwen, nou bezwen annan *data* nou bezwen annan lenformasyon pou fer sir ki nou pa pe eksplwat an plis.

Apre i annan *obviously* lafason pou *licensed* bann aktivite komersyal dan Sekter Lapes, aköz se *license* ki non selman anpes leksplwatasyon, *over exploitation* me ki gard soutenabilite me ki osi en sours reveni.

Me apre sa nou vwar ki mannyer e la lezot Manm in koz for lo la, mwan mon pa pou fer ki mannyer ou kontrol, ki mannyer ou *monitor* e ki mannyer ou sirvey, e ki mannyer ou pran ka avek bann lofans ki pe arive. Ki ou fer avek

bann keksoz ki'n ganny sezi, sa *catch*, sa *gear* sa *net*, sa bato li menm ki pe lapès dan en fason ilegal.

E Mr Speaker, mwan mon kapab dir ou ki dernyen fwa ki mon ti al Aldabra i annan 2 bato ki nou pe servi Aldabra *SIF* ki nou'n *capture* avek bann dimoun ki ti pe lapès ilegalman Komoryen ek Malgas e lo lans Asonpsyon i annan enn gro ankor ki'n ganny sezi ki nou- sa set en fason, pa pou nou ganny bato *for free* me pou fer sir ki sa bann dimoun ler zot vini zot fer sa bann kalite aktivite e zot perdi zot lanmen drwat, zot perdi sa keksoz ki zot bezwen.

E tousala parey mon koze i annan ziridiksyon ki al bokou pli an deor nou teritwar, ki mannyer levidans i ganny anmase, ki mannyer ou fer rapel kont lefe ki ou pa'n ganny *license* oubyen ou *license* i dan en kondisyon ki ou pa kontan oubyen ou'n ganny arase, oubyen in ganny sanze eksetera.

E finalman sa bann penalti ki ankor enn fwa bann Manm in koz lo la ki bann penalti ekstrememan for, aköz si nou anvi en lapès soutenab nou bezwen fer sir ki dimoun i swiv Lalwa e ki aköz bann dimoun ki pe *manage* sa Lalwa e sa se prensipalman *SFA* e

bann dimoun ki konnen sa lendistri akòz zot in travay ladan pou plizyè lannen, ki manner zot atraver sa bann ledan ki nou pe donn zot pour ki zot kapab morde pou fer sir ki nou lapès i reste soutenab.

Alor Mr Speaker, avèk sa detrwà mo, mon ti a kontan parey mon'n dir remersye Minis avèk son lekip pou anmèn en Lalwa osi konpreansiv devan nou. Remersye tou bann dimoun ki'n travay lo la e asir Minis avèk Lepep Seselwa ki nou koman en Lasanble nou pou sipòrt ou demars Minis dan sa direksyon kot ou pe ale. Mon remersye ou Mr Speaker.

MR SPEAKER

Mersi Onorab. E Onorab Georges i dènyen non ki mon annan lo mon lalis. Donk, mon a zis verifye si napa okenn Manm ki anvi pran laparòl ?

Dan sa ka mon krwar nou pou fer pli byen *adjourn* e nou a pran repons *summing up* Minis *demain matin*. Donk Lasanble i *adjourn* e nou a rezwenn *demain matin* 9er. Mersi.

(ADJOURNMENT)

